

**NATIONAL ASSEMBLY OF
SEYCHELLES**

Thursday 18th December, 2025

The Assembly met at 0901am

National Anthem

Moment of Reflection

Mr Deputy Speaker in the Chair

MR DEPUTY SPEAKER

Mon a dir bonzour tou bann Manm Onorab e bonzour tou nou bann dimoun ki pe swiv Lasanble ozordi.

Ozordi lo nou *Order Paper* nou pou pran *Penal Code (Amendment) Bill*. An vi ki nou napa 7 day's notice, mon pou demann request for motion pou weave Standing Orders par Leader of the Government Business.

HON SYLVANNE LEMIEL

Bonzour Mr Speaker. Bonzour tou mon bann koleg Manm Onorab, tou bann dimoun ki pe ekout nou. Mr Speaker, anba *Order 97(1)* mon demann ou permisyon pou mon move pou sispann *Order 69(1)* pou permet ki *Penal Code (Amendment) Bill 2025* i ganny lir en Dezyenm Fwa malgre ki son peryod 7

zour depi son *First Reading* pa ankor pase. Mersi.

MR DEPUTY SPEAKER

Segonde, Onorab Vidot.

HON AUDREY VIDOT

Morning Mr Speaker. Morning members. Motion seconded Mr Speaker.

MR DEPUTY SPEAKER

Bon, nou ava pran en vot. Tou bann ki annakor pou sispann Lord 69. Okenn Manm ki kont? *Motion to suspend Order 69* pou allow *Bill* pou ganny lir, 16 Manm in vot pour e 9 Manm in abstain e personn pa'n vot kont. Nou ava demann motion for the *Second Reading*.

HON SYLVANNE LEMIEL

Mersi Mr Speaker. Anba *Order 69(2)*, mon move ki *Penal Code (Amendment) Bill 2025* i ganny lir pou en Dezyenm Fwa. Mersi.

MR DEPUTY SPEAKER

Onorab Vidot, Segonde.

HON AUDREY VIDOT

Motion seconded Mr Speaker.

MR DEPUTY SPEAKER

Mersi. Mon a demann pou fer antre delegasyon ki pou prezant *Bill*.

Nou a dir bonzour VP, e avek li nou annan Mr Victor Hill *Principal Legal Draftsman*, e osi nou annan Mrs Alvina Uranie ki *Senior Public Relations Officer at MLH*. VP, laparol i a ou pou ou prezantasyon.

VICE-PRESIDENT SEBASTIEN PILLAY

Mersi Mr Speaker. Bonzour Mr Speaker e ankor enn fwa felisitasyon pou ou apwentman koman Deputy Speaker. Mon'n retenir loportinite pou mon fer sa ziska ler mon kapab ganny ou dan *chair* e mon swet ou tou bonn sans dan ou travay.

Mr Speaker, *Leader* Lopozisyon, *Leader* Zafer Biznes Gouvernman, tou Manm Onorab e tou dimoun a lekout, bonzour. Mon annan gran plezir pou prezant sa Lalwa Lamannman Kod Penal 2025 avek Lasanble. Mr Speaker, sa Lalwa i anliny avek en prononsman Prezidan Dr Patrick Herminie e osi en komitman *manifesto* pou sa premye 100 zour.

Mr Speaker, an 2024 Gouvernman avan ti amann Lalwa Kod Penal pou entrodwir en nouvo lofans apele *hate speech*, e parmi bann eleman ki sa lofans ti kree serten bann karakteristik proteze ki ti ganny gete koman bann eleman ki pou

fer sa lofans ganny en *aggravating factor*.

Savedir i vin pli grav ler ou komet lofans an prenon kont sa bann karakteristik sa tel ki ras en dimoun, son larelizyon, son dezabilite, son loryantasyon seksyèl, son *gender identity* e son afilyasyon politik. Fodre nou a rapel Mr Speaker ki ler sa Lalwa ti pase ti annan bokou deba otour en konponan sa Lalwa enn sa bann *aggravating factor* e sa sete afilyasyon politik.

Mr Speaker, deswit ti annan bokou reaksyon lo la en pe partou sirtou parmi bann groupman ki ti prononse ki sa Lalwa ti kapab ganny servi par politisyen oubyen bann ki dan lotorite pou silans oubyen *censure* bann kritik vizavi bann politisyen oubyen bann dimoun ki annan bann pozisyon dan lotorite ki annan en koneksyon politik.

Set alor Mr Speaker, ki nou vwar pre bann aktivis politik in komans ganny targete par sa Lalwa e in annan bann *case* menm ki'n al Ankour e menm bann ki'n bezwen ganny arete an relasyon avek serten komantr ki zot in fer.

Mr Speaker, dan en pei kot lademokrasi i an bonn sante, kritik politik i en keksoz normal e i ganny permet pour ki

dimoun ki deside vin dan sekter piblik oubyen pran en rol politik e dan lenstans politik zot devret kapab osi aksepte ki i annan en *scrutiny* piblik lo zot, swa byen, swa mal.

Mr Speaker, i malere ki i posib prezan ki atraver sa Lalwa i a kapab anann en persekisyon politik e se pour sa rezon ki Prezidan Patrick Herminie in vwar li nesese pou propoz en lamannman dan sa Lalwa e enn son bann *commitment* 100 zour ki nou retir sa konponan karakteristik dan lawla e fer ki bann *aggravating factors* ki reste i ava bann *aggravating factors* ki reste an relasyon avek bann ka konstitisyonnel.

Me proteksyon pou en dimoun annan son afilyasyon politik oubyen son drwa lasosyasyon i ganny retenir anba konstitisyon e okenn lezot lofans ki ganny fer par egzanp pou atak en dimoun aköz son karakterisik politik i ava en lofans ki pe ganny kree anba lezot Lalwa an egzistan tel koman nou Kod Penal.

Mr Speaker, i enportan pou nou konpran en keksoz lo en pei ki pe bouz devan, e sa se polarizasyon politik dan nou pei i pa nesese man parey dan lezot pei e konteks politik nou pei i pa nesese man parey pou lezot pei.

Malgre ki dan serten pei kot ou vwar poudir oryantasyon politik i kapab vin en keksoz ki kapab ganny disipe parske la kantite relasyon ki i annan pou Sesel i diferan.

Set alor ki i ase fasil pou servi karakteristik politik koman en mezir persekisyon an sa ki konserne, e la mon pou dir drwa lekspresyon en endividi. I annan lezot kad legal ki deza an plas pou protez afilyasyon partisipasyon e *être* en aktivis politik.

Sa ki bezwen reste kler a tou moman, se ki donn en group dimoun e se pour sa rezon e mon konnen pou annan bann largiman me sa i pa pe donn zis sa group dimoun me Lalwa i kre kondisyon se sa problem ki nou annan, Lalwa ki kre sa kondisyon pou donn en group dimoun en prtoteksyon an plis.

E lefe ki se sa group dimoun ki fer lenplimantasyon Lalwa e si nou regard bann lezot provizyon Lalwa lo ki mannyer determinasyon sa lofans i ganny fer, sa i reste avek lenterpretasyon lotorite pou li determinen si en endividi oubyen kelkonk in si oule afekte sa karakteristik politik ki sa endividi an kestyon sirtou sa *public person* oubyen sa politisyen.

Se pour sa rezon ki i nesesser pou reset kandida ler e anmenn en rebalansman e pou byensir annan bokou deba lo sa size i pu anan ki pou dakor e i annan ki pou pa dakor be nou bezwen al lo baz levidans.

Mr Speaker, bokou keksoz pou ganny dir lo bann politisyen, e ler ou antre dan lemond politik ou espekite ki ou karakter pou ganny atake, ou karakter pou ganny asasin e pou annan bokou keksoz ki pou ganny dir ki pou sey detroun latansyon oubyen kre persepsyon lo en endividi.

Sa ki nou pou demande, se ki dan legzersis sa drwa ki tou dimoun i fer li, avek konprenezon ki son drwa i fini kot pou en kot dimoun i komanse. Me pou met en lot nivo prtoteksyon anba Lalwa ki a kapab permet en labi sa drwa limenm i antitez avek lespri e prensip nou konstitisyon.

Se pour sa rezon alor ki Gouvernman pe propoz retir *political affiliation* koman enn bann *protected characteristics* anba Lalwa. Mr Speaker, bomaten e pour Lepep Seselwa sa lamannman ki devan nou i tre kourt e mon pe espekite ki devan i ava kourt me sa i zis en lekspektasyon lo mon par.

Parey nou Prezidan i kontan dir, “*let there be a*

debate” Lasanble i ava debat, nou ava regard tou bann konsiderasyon deba e apre nou ava bouz devan, me anfenn kont ler nou sorti dan Lasanble nou ava’n pran en desizyon lo *political characteristic, political affiliation* koman en karakteristik proteze anba Lalwa *Penal Code*.

Mr Speaker, mon swet tou bann Manm bon deliberasyon, mon swete ki nou ava ganny en deba kordyal, respe avek respe e ki nou a kapab sorti la avek en rezilta ki ava enform Lepep Seselwa ede pou avans sa la demokrasi e sa ki pli enportan protez drwa fondamantal tou dimoun pou annan en drwa a laliberte lekspresyon. Mersi Mr Speaker.

MR DEPUTY SPEAKER

Mersi VP pou ou prezantasyon. Prezan nou pou al antre lo deba zeneral sa *Bill*. Parey labitid le 2 *Leaders* i pou ganny 20 minit e bann lezot Manm i ava ganny 10 minit pou fer, lasal i ouver pou ou komans deba. Nou a donn laparol Onorab Athanase.

HON KENETH ATHANASE

Mr Speaker, VP ek ou delegasyon, Manm Lasanble, e tou zabitan Perseverance a lekout bonzour.

Sa *Bill*, i reprezant en amelyorasyon neseler e apropiye dan nou kad legal. Pou fer sir ki nou Lalwa i reste zis, balanse e protez drwa tou sitwayen san kre okenn konsekans ki pa'n prevwar. Ler sa kad legal ti ganny amande an 2024 ti entrodwir serten provizyon enportan pou adres *hate speech* ek lofans motive par laenn.

Sa bann sanzman ti enportan pou protez dimoun kont diskriminasyon ek ostilite baze lo karakteristik ki zot pa kapab sanze. Tel ki ras, relizyon ek lezot oryantasyon seksyel, karakterisik proteze. Me dan menm moman afilyasyon politik koman en karakteristik proteze anba seksyon 5 ti azoute.

Mr Speaker, menm si lentansyon ti bon, afilyasyon politik in lev bokou konserne serye. Politik par son natir *menm* i baze lo deba kritik en sirkilasyon lib, si afilyasyon politik i reste koman en karakteristik proteze anba Lalwa *Hate Speech* nou riske anpes deba politik normal e kriminaliz bann diskisyon demokratik ki solid. Sa i kapab kre en lafreder lo laliberte lekspresyon, okenn demokrasi pa devret permet sa.

Mr Speaker, sa *Bill* ki devan nou ozordi ti pe koriz sa

ki'n retir afilyasyon politik dan definisyon bann karakteristik proteze. Sa pa vadir ki nou pe afeblir nou pozisyon kont *hate speech* nou pe zis asire ki Lalwa pa vin en proteksyon malapropriye pou bann idantite politik. Oubyen en bayer ki kapab anpes sitwayen asir dan zot drwa pou fer zot dirizan rann kont.

Par donn sipor sa *Bill*, nou pe afirm 2 prensip fondamantal liberte lekspresyon. San lademokrasi nou pa pou kapab fonksyonnen. Egalite devan Lalwa, *Hate Speech* i devret konsantre lo bann karakteristik ki dimoun pa kapab sanze, pa lo bann swa politik ki toultan ouver pou deba ek sanzman.

Mr Speaker, sa lamannman i raforsi nou sistenm legal par prezerv lespas pou deba politik tou an kontinyen protez dimoun kont vre domaz ek diskriminasyon, i pa, i en pa responsab ek neseler pou avanse. Mon ankouraz tou bann Manm pou donn zot sipor sa *Bill* e pou soutyen bann valer demokrasi ki benefisye nou pei. Mersi.

MR DEPUTY SPEAKER

Mersi Onorab Athanase. Mon a donn aprezan laparol Onorab Georges Romain.

HON GEORGES ROMAIN

Mersi Mr Speaker, bonzour Mr Speaker, bonzour tou koleg Onorab e tou dimoun a lekout e bonzour VP avek ou delegasyon.

Mr Speaker, mon ti a kontan prezant mon pwennvi lo sa propozisyon ki Ladministrasyon US pe vin avek pou retir afilyasyon politik dan karakteristik proteze anba Lalwa kont okenn *hate speech* dan *Penal Code*.

Mr Speaker, lannen pase ler LDS ti vin o pouvwar sa Lasanble ti pran en desizyon ker pou enkli afilyasyon politik koman en karakteristik proteze nou pa ti fer sa par aksidan, par met refleksyon lo nou listwar- - (pardon Mr Speaker)-, me par met refleksyon lo nou listwar ek leksperyans ki bokou Seselwa in viv e fer fas avek koman en nasyon.

Sa ki nou ti fer pa ti enn pti lamannman teknik me plito i ti santre lo fason ki nou protez nou demokrasi, fason ki nou zer bann dakor politik dan nou koutim Seselwa, e fason ki nou asire ki laliberte lekspresyon pa vin en mwayen pou entimid lezot.

Annou pa bliye Mr Speaker, pandan plizyer lannen isi Sesel apre koudeta 1977 bokou Seselwa in ganny viktimize zis aköz zot krwayans

politik, dimoun in perdi zot travay, loportinite pou zot bouz devan e dan serten ka zot laliberte e sekirite zis aköz zot ti annan en lopinyon politik ki ti diferan avek Gouvernman SPPF, US a sa letan.

Annou pa bliye ki ti annan dimoun ki ti mars ek lafreder, ti annan ki ti ganny mete dan kaso, ti annan ki ti perdi zot lavi e ti annan ki ti bezwen al egzile aköz zot lavi ti an danze.

Mr Speaker, ler LDS ti vin o pouvwar an 2020, nou ti vwar li neser pou fer sir ki sa bann viktimizasyon politik ti pou vin en keksoz lefase. E Mr Speaker, ler sa Lasanble ti aprouve pou met afilyasyon politik koman en karakteristik proteze dan kad *hate speech* dan Lalwa an 2024. Mesaz ki nou ti anvoye sete ki zanmen ankòr ki fodre en Seselwa i ganny ensilte, menase, oubyen imilye zis aköz son krwayans politik i diferan.

Nou ti pe fer en promes ki protez laliberte lekspresyon e anmenn respe dan nou demokrasi dan nou pti pei Sesel. Nou ti dir ki zanmen ankòr fodre krwayans politik i ganny servi koman en baz pou menas, imilyasyon oubyen pou ankouraz vyolans. E se sa ki ti labaz desizyon ler nou ti fer sa lamanmman an 2024.

Ozordi nou pe ganny demande pou retir sa proteksyon pou mwan Mr Speaker, sa i en pa an ayè e pe anvoy en sinyal danzere pou nou e pe anvoy en mesaj ki pe dir nou ki si en dimoun i maltret oubyen i menas ou, oubyen i servi langaz obsenn akòz ou krwayans politik sa i parfètman akseptab e sa i vreman en direksyon ki nou pa anvi nou pei i pran.

Eski nou anvi fer Sesel vin en pei kot politik i vin en zouti pou divizyon? Laenn ek lafreyer? Mon krwar pa Mr Speaker, e ler zot pe vote pou retir afilyasyon politik koman en karakteristik proteze, eski zot pe realiz konsekans ki pou annan?

Premyèman Mr Speaker, i sa i pou retir en proteksyon legal ki ti la pou anpes viktimizasyon politik, savedir apreman dimoun pou kapab ganny ensilte, menase oubyen imilye akòz zot krwayans politik san okenn reperikeyon.

Dezyèmman i afeblir nou demokrasi par fer dimoun per pou eksprim zot lopinyon politik e sa i redwir diversite lopinyon ki en demokrasi i bezwen. Trwazyèmman, i donn en sinyal ki politik i kapab vin en zouti pou divizyon e

lafreyer olye en platform pou deba.

Nou osi bezwen mazin ki i annan bokou legzanp bann lezot pei omonn kot nou'n vwar rayot, vyolans ek enstabilite sosyal zis akòz napa kontrol avek proteksyon *hate speech* lo pwennvi politik. E nou Sesel nou pa devret mars lo sa semen sirtou ler nou pei i vreman divize politikman parey i ete ozordi.

US pe dir ki nou pe anpes dimoun koze me –Madanm, me – (pardon Mr Speaker)–, me Mr Speaker, la demokrasi i vdir annan laliberte pou koze. Me laliberte pa vdir ou kapab ensit dezord, i pa vdir ou kapab sali non lezot, i pa vdir ou kapab ankouraz vyolans.

Mr Speaker, laliberte lekspresyon i vin avek responsabilite. Deba politik devret baze lo respe e non pa lo lensilt. E ozordi i enportan pou Seselwa konpran ki proteksyon kont *hate speech* politik i pa pou silans pou person, i la pou fer sir ki okenn dezakor i reste sivilize e ki okenn Seselwa pa santi li ganny targete akòz son krwayans politik.

E ozordi i sagrinan pou vwar ki zot pe al retir sa proteksyon san realize ki sa pou fer nou sosyete vin pli frazil. Olye kre en sosyete kot nou

zanfan i kapab grandi dan en pei kot zot lib pou siport nenport ki parti politik sa lafreyer US pe vin afeblir sa prensip.

Mr Speaker, e la mon anvi fer en remark lo en keksoz ki Prezidan Dr Herminie in dir tre klerman dan son kanpanny e dan sa Lasanble. I ti dir tre for ki i pou kriminaliz viktimizasyon politik e ki nou pa- e ki ek nou pa ek nou pou en keksoz lepase, me ki nou pe vwar ozordi Mr Speaker?

Olye vin anmenn sa Lalwa ki pou kriminaliz ek ou pa ek nou, zot pe fer konpletman lekotrè. Savedir Mr Speaker, zot pa ti onnet dan zot lapros. Akoz si sa ti vreman enportan sa Lalwa ti devret fini devan Lasanble Nasyonal ozordi e i ti pou ganny sipor nou tou nou bann Manm dan sa Lasanble akoz sa ti pou vin koman en garanti pou tou Seselwa ki pe travay dir la deor ki zot pa ti pou bezwen perdi zot plas travay zis akoz diferans dan pwennvi politik.

Pou mwan Mr Speaker, sa i en gran kontradiksyon ant sa ki Prezidan in dir e sa ki Gouvènmàn pe fer, si nou vreman krwar dan fini viktimizasyon politik nou pa kapab retir sa proteksyon ki met la pou anpes menas,

imilyasyon e langaz degradan kont dimoun akoz zot krwayans politik. Nou pa kapab dir nou anvi protez sa pep me an menm tan ouver laport pou viktimizasyon retourn dan nou sosyete.

Mr Speaker, nou osi bezwen konsider en lot konsekans ki pou afekte nou pei, Sesel i en pti pei e avek en pti popilasyon, si nou retir sa proteksyon eski nou pa pe kre en lanvironnman kot dimoun pa pou oule partisip dan politik son pei a lavenir?

Mr Speaker, zot pou per akoz zot konnen ki zot kapab sibir menas, lensilt e langaz degradan san okenn proteksyon legal. Sa i pou definitivman dekouraz bann zenn, bann profesyonnel, e bann sitwayen ki annan bon lentansyon pou kontribye dan gouvènmàn e politik nou pei.

Politik pa devret vin en teren danzere, i devret reste en platform pou esanz lide e respe. Si nou toler *hate speech* politik nou pe fer politik vin en keksoz ki dimoun pou evite e sa i pou fer nou demokrasi vin pli feb par redwir kantite dimoun ki i anvi partisipe.

Pou sa bann rezon Mr Speaker, mon pa pou kapab siport sa lamannman ki pe ganny propoze. Pou mwan, olye

ki zot retir sa proteksyon nou ti devret pe ogmant nivo nou diskour politik e ranforsi respe koman en valer nasyonal. Mersi Mr Speaker.

MR DEPUTY SPEAKER

Mersi Onorab Romain. Nou aprezan donn laparol Onorab Robert David.

HON ROBERT DAVID

Bonzour Mr Speaker. E mersi, e bonzour tou Manm Onorab. En bonzour tou dimoun ki pe swiv nou, en bonzour spesyal bann zabitan Mont Buxton e osi bonzour Vis-Prezidan avek ou delegasyon.

Mosyon ki devan nou ozordi Mr Speaker, pe demann nou pou aprouv *Penal Code (Amendment) Bill, 2025*. Sa Lalwa ti ganny amande an 2024 anba Penal Kod (*Amendment) Act, 2024*. Sa ti annan bi klasifye *hspeech* koman en lofans kriminel e enkli lafilyasyon pilitik koman en karakteristik propoze.

Sa letan i ti pou anvoy en mesaz kler ki Sesel i angaze pou protez dignite e sekirite tou son sitwayen pe enport ou lorizin oubyen ou idantite. Ti al pli lwen pou note ki okenn krim motive par laenn pa pou ganny tolere. Anba sa Lalwa Mr Speaker, afilyasyon politik ti

ganny definir koman lasosyasyon pros oubyen sipor ouver pou en parti politik. Seksyon 89(b) dan Penal Kod i konsern *hate speech*, detay lo lamannman *Bill* ki pe ganny propoze i *comme* swivan; -

Lalwa ki definir *hate speech* koman parol ekrir sinyal oubyen konportman ki kapab ankouraz vyolans, lafreyer oubyen mepri kont dimoun akoz serten karakteristik. Bann karakteristik propoze- proteze -(eskize Mr Speaker)-, i enkli ras, larelizyonm, nasyonalite, *gender*, dezabilite ek lezot.

Dan sa lamannman ki pe ganny propoze Mr Speaker, son lobzektif se pou retir lafilyasyon politik koman karakteristik proteze anba Lalwa *Hate Speech*, e sa i aplik osi pa zis pou bann politisyen osi pou bann aktivis ek siporter politik.

Sa rezon se ki i pou asire ki deba politik i reste lib e demokratik san ki Lalwa ki ganny servi pou silans lopinyon politik. Kwa ki pou sanze Mr Speaker? Afilyasyon politik pa pou ganny konsidere koman en karakteristik proteze anba Lalwa *Hate speech*.

Proteksyon pou bann lezot karakteristik sa Lalwa i kontinyen donner, bann lezot karakteristik parey relizyon,

gender, ras rasyal, dezabilite, e sa pou reste Mr Speaker.

Lamannman pe propoze ki lafilyasyon politik pa pou ganny konsidere koman en karakteristik propoze- proteze anba sa seksyon. Savedir, si ou kritik oubyen fer en komanter lo lopinyon politik, sa pa pou ganny konsidere koman en *hate speech* anba sa Lalwa.

Prezan bann benefis ki sa Kod Penal pou anmennen, sa Lalwa i definir lofans ek pinisyon, i donn sitwayen ek bann zofisye Lalwa en kad legal kler pou idantifye e plitar pourswiv bann krim. I etabli bann mezir ki dekouraz dimoun fer lofans atraver lazistis, lanmann ek konfiskasyon. Sa i ede gard lord ek lape dan en sosyete.

Bann lamannman i piblik, i fer ki i pli fasil pou bann profesyonnel legal ek manm piblik ganny akse avek. Sa Lalwa i donn proteksyon bann group mardinalize, par egzanp Mr Speaker, bann etranze ki ganny trete dan bann landrwa travay dan en fason malapropo. E osi Mr Speaker, nou bezwen rekonnet ki tou dimoun i bezwen ganny trete egal e tou dimoun i annan mennm drwa e nou tou nou bezwen protez e respekte enn a lot.

Isi Sesel, sa prensip legalite dan loportinite i en prensip fondamantal Parti *United Seychelles*, afen ki tou dimoun i kapab vin sa ki i anvi vini. Sa Lalwa i mentenir proteksyon kont lofans baze lo ras, larelizyon, dezabilite ek oryantasyon seksyel e fer ki i ganny kondannen koman grav e aplik pinisyon pli sever.

Sa Lalwa Mr Speaker, i kriminaliz diskour laenn e fer li ilegal pou ankouraz laenn kont en lot dimoun ouswa en group baze lo bann karakteristik spesifik. Bann lamannman i klerman montre langazman Gouvernman anver legalite ek dinyite imen.

Drwa pou dinyite imen i resorti dan Konstitisyon Sesel atraver Lartik 6, e nouvo ladministrasyon in al pli lwen Mr Speaker, in etabli en Minister ki apel Minister pou Zafer Sosyal, Lafanmir ek Legalite. Sa i montre komitman Gouvernman dan sa demars pou promouvwar legalite dan lasosyete.

Sa Lalwa Mr Speaker, i ankouraz bann viktim pou raport bann lofans e ogmant konfyans dan sistenm lazistis Sesel. Sa Lalwa osi i fer kler ki ban krim baze lo prezidis pa pou ganny tolere. Kod Penal i ganny amande regilyerman pou

reflekte valer e bezwen en sosyete ki kontinyelman sanze.

Bann dernyen lamannman i montre langazman, devlopman progresif i fer kad legal Sesel reste relevan ek modern e finalman adapte pou fer fas avek bann nouvo defi. Lefe sa bann lamannman Mr Speaker, avan sa lamannman okenn krim motive par afilyasyon politik ti kapab ganny konsidere koman en lofans agrave anba seksyon 38 ek seksyon anba sa Lalwa.

Swivan sa lamannman afilyasyon politik pa pou ganny konsidere koman en eleman agravan anba sa Lalwa Mr Speaker. E pour sa Mr Speaker, mwan mon pou donn mon sipor sa *Bill* e mon pe demann mon bann koleg pou osi siport sa *Bill*. Mersi Mr Speaker.

MR DEPUTY SPEAKER

Mersi Onorab David. Bon, mon napa ankor Manm ki'n eksprim lentere. Onorab Georges.

HON BERNARD GEORGES

Mersi Mr Speaker. Bonzour Mr Speaker, bonzour Vis-Prezidan avek pou delegasyon, bonzour tou mon bann koleg Onorab, tou bann dimoun ki pe ekout nou. Mr Speaker, i kler ki zot pe esper mwan koze pou zot

prezan vin koz lo sa ki mon pou dir e alor permet mwan pou pran laparol e pou retir zot dan zot problem.

Ankor enn fwa Mr Speaker, Vis-Prezidan i vin devan nou avek en lot Lalwa 100 zour, ki bezwen fer vit, bezwen pase e i telman vit ki nou'n bezwen bomaten sispann *Standing Orders* pou permet sa Lalwa pase. Keksoz ki ler i ti asiz dan sa sez, toultan, toultan sanzeksepsyon i ti koz kont, i ti kritik nou eksetera la prezan nou war zot menm zot ki pe vin fer.

Ou war Mr Speaker, annan de fwa la, lavi i montre nou ki nou devret realize ki lemonn i tournen, ozordi zot, demen i nou, demen i nou, apre demen i pou zot, sa ki- sa soulye ki ou mete en zour la, en lot dimoun ki pou mete en lot zour.

E Vis-Prezidan i vin isi ankor bomaten avek en lot bann *forward to the past* parey mon kontan dir, menm keksoz ki zot fer apre midi nou pou ganny en lot oubyen osito ki sa enn *Bill* i fini nou pou ganny en lot. Kot sel keksoz zot pe fer, zot pe retourn nou pei an aryer e tir tou keksoz ki *LDS* in fer aköz tou sa ki *LDS* in fer pa ti byen *including* sa Lalwa *Hate Speech* ki devan nou la ozordi.

Mon'n ekout atantivman sa 3 Manm ki'n koze e an partikilye Onorab Georges Romain ki'n fini son pti diskour bomaten avek sa parol ki tap for, olye retir *hate speech* nou devret pe promot latolerans avek la demokrasi e mon ava azoute avek linite dan nou pei.

Annou pa bliye ki sa ki Prezidan Herminie ti dir zour son linogirasyon se ki li i sa Prezidan ki pou anmenn linite dan nou pei. Mon pa war, mon pa war bokou keksoz ki in fer ziska prezan pou anmenn linite dan nou pei, mon'n war en kantite Lalwa ki i pe dir i pe vin tire aköz nou, nou'n fer, mon war en kantite *witch hunt* ki i pe fer.

Lanket par isi lanket par laba pou al gete ki sa Gouvernman avan ti fer, la STC, Assomption, tousala, tousala se sa ki mon war mon, mon pa'n war en gran kantite linite. Nou, Manm Onorab ki'n koz avan mwan in dir ki nou sa Gouvernman ki la o pouvwar pe asire ki tou dimoun i annan son merit e son plas eksetera.

Mwan yer swar mon ti pas en sware dan konpanni Onorab Naddy Zialor ki li pou en rezon ou pou en lot in trouv son lekor *out of a job*, pourtan i enn sa bann *protected characteristics*. Zot pa'n trouv en fason pou vin

anmas li pou donn li en lot landrwa travay, sel keksoz ki zot in fer, zot osi pous li e i en dimoun ki pe viv avek en dezabilite i ti en Manm Onorab nou Lasanble.

Me sa Gouvernman ki sipoze pe siport, pe rod siport son pep i bliye en bann son bann pep aköz? Aköz Onorab Zialor i LDS, setou napa okenn lezot rezon. Alor pa sey fer nou krwar ki soley i lev dan was e i kous dan les nou, nou'n fini pase sa bann letan nou nepli dan *kindergarten* Mr Speaker.

Nou'n grandi nou'n konn egzaktaman sa ki pe arive. E sa ki pe arive la bomaten, e se sa ki pou arive taler se yer oubyen semenn pase nou ti pe koz oubyen detrwa zour pase nou ti koz lo *revenge pornography*, sa ki nou pe fer la ozordi sa ki nou pe war e *revenge legislation* se sa ki zot pe fer.

Zot pe zis vin ranplas sa ki zot pa ti kontan, sa ki zot ti opoze sa ki zot ti anmenn en *Private Members Bill* pou sanze ler zot ti napa sifizaman vot ozordi zot pe vin fer. Eski sa set en fason pou rasanble nou pep? Set en fason pou rod linite Vis-Prezidan? Mon demann ou sa kestyon.

Mr Speaker, Vis-Prezidan bomaten in dir nou sa legzersis ki nou pe fer se protez en drwa

lekspresyon. Non, se pa protez okenn drwa lekspresyon, drwa lekspresyon i la li, i la depi *cette* epok, depi 1993 ler nou'n met li dan nou Konstitisyon. Sa ki nou pe fer la se la pli lwen, se fer sir ki dimoun pa abiz sa drwa ki zot annan.

E angiz servi *hate speech* oubyen angiz *aggravate* en krim pou fer li vin en *hate crime*, setou, setou ki nou pe fer. Alor, pou fer krwar ki sa ki nou pe fer la se nou pe protez drwa lekspresyon se pou *mislead* nou popilasyon aköz se pa sa ditou ki nou pe fer, sa ki nou pe fer nou pe donn en sans bann dimoun ki- i annan en kantite zot laba deor, ki anvi denigre en dimoun aköz son lapartenans politik pou les li fer e pou aplodir li ler i fer.

Se sa ki nou pe fer Mr Speaker, e nou bezwen konpran sa, nou pa pe protez okenn drwa, drwa i ganny proteze sa ki nou pe fer se anvoy en mesaz e sa ki nou ti fer lannen pase ler nou ti pas sa Lalwa se anvoy en mesaz poudir kritik politik i *ok* i normal, politisyen i bezwen ganny kritike, me ou pa devret servi sa pou *incite hatred*. E sa i en gran diferans e sa zot pa'n eksplik nou bomaten, ni Vis-Prezidan pa'n eksplik nou bomaten.

E mon a demann zot en lot keksoz, eski se sa ki Prezidan Hermine i ti promet? Eski i ti promet vin tir *political affiliation* Onorab David avek Onorab Athanase? Eski sa, sa ki? Aköz se sa ki zot in dir bomaten. Pa sa ki mon'n tande mon, mwan mon'n tann li dir i pou vin tir *hate speech*, i pa'n zanmen dir i pou vin tir sa pti bout *political affiliation* dan *hate speech*.

Tou son bann dimoun in desann, in vot pou li aköz i pou tir *hate speech*, la prezan i vini i koul non, non, pa sa ki nou ti sir nou pou tir zis sa pri bout *political affiliation* tou larestan pou reste.

Ou war Mr Speaker, ou war egzaktaman ou war, ler ou debout lo en *podium* la e ki ou koze, dan en *rally* politik ou dir en kantite keksoz, dir en kantite keksoz, be ler in ariv pou ou fer ler in ariv, wi mon konn byen aköz mwan menm mon, mon'n koze lo *rally* politik, pandan en kantite letan, pandan en kantite letan 30an mon pe fer sa mwan.

Ler i ariv pou ou delivre i vin en keksoz konpletman, konpletman diferan e mon ava eksplik zot aköz mon pe dir sa. Ou vwar, diferans ki nou bezwen aplike e ki nou bezwen konpran, se diferans ant dir avek en dimoun mon pa kontan

ou akòz ou *LDS*, sa i normal, oubyen ou fay akòz ou *LDS*, oubyen ou bet akòz ou *LDS*, sa tousala i normal e sa nou kapab *rebuke*.

Sa ki nou pa kapab, sa ki nou pa kapab e nou pa devret aksepte se pou dir avek en dimoun ou, ou napa en plas dan sa pei, ou napa en plas dan sa pei, ou bezwen ganny detri ou bezwen retoun dan ou lot pei akòz ou ras, oubyen akòz ou lapartenans politik, sa nou pa devret kapab annan, e in ganny dir e nou tou nou konnen in ganny dir.

Mwan Mr Speaker, mon pa pou zanmen aksepte, dimoun i ava zot ava kritik mwan, zot kritik mwan toultan zot akòz mwan toudsort keksoz sa napa problem mon aksepte. Me enn mon bann Manm dan sa Lasanble Nasyon mon pa pou aksepte ki okenn dimoun isi anndan oubyen deor i vin maltret li dan en fason kot pou fer *hate speech*, sa i pa akseptab e mwan mon pa pou aksepte.

E se sa akòz nou pe lager ozordi, ou konnen zot propaz zot Lalwa, sa i kler me en zour ki apel en zour bout pou retournen e nou ava vin devan sa Lasanble ankò e se la zot zot, zot pou ganny zize lo sa ki zot pe al fer la bomaten.

Mr Speaker, en keksoz ki nou pa'n ganny dir ozordi, se sa ki nou pe fer se pa nou ki deside si i annan *hate speech* oubyen si i annan *hate crime*. I annan en boug laba deor ki apel *Attorney Zeneral*, se li ki deside, si ou kit sa Lalwa la, e ki li i pa krwar ki dan legzersis son drwa lekspresyon en dimoun in *attend* sa nivo ki in vin *hate speech* oubyen *hate crime* i pa pou pourswiv ou.

Alor ou annan en gardfou e nou ti dir zot sa lannen pase me zot pa'n ekout nou. Gard fou se pa nou, se pa sa drwa ki ou annan pou koze, se lefe ki lapolis pa pou pran en ka avek ou e *Attorney Zeneral* pa pou pourswiv ou si i pa krwar ki sa ki ou'n dir i *amount to hate speech* oubyen *hate crime*, se la gard fou.

Akfer zot, zot anvi tir sa gardfou? Les dimoun dir sa ki zot anvi, kritik en dimoun pou son lapartenans politik avek tou lenpinite posib, me anpes li fer sa pou *sex, gender, race, HIV status* eksetera. Akòz ki zot anvi fer sa?

Ou war Mr Speaker, les mwan eksplik zot egzakteman diferans ant sa ki zot, zot krwar e sa ki larealite i ete, e mon pou pran en legzanp ki mon fek mazin lo la, en keksoz ki

zanmen in arive me mon a servi koman en legzanp.

Annou pran koman en konparezon en politisyen ki pe rid ganny elekte, e annou *assume* ki dan en *rally* politik i dir ki bann dimoun ki pa dakor avek li e mon pe dir en keksoz koumsa mon fek envante, i dir ki bann dimoun ki pa dakor avek li pou trouv zot lekor dan en rigol anba en pon, *let us assume* en dimoun in dir sa i pa'n arive, nou tou nou konnen i pa'n arive, mon pe met sa, mon pe fer sa la mon pe zis *make up* en lenstans.

Let us assume ki en politisyen ki anvi ariv o pouvwar i dir dan en *rally* politik ki bann oponan si zot pa vey zot, zot pou *end up* dan rigol anba en pon. Sa, li tousel si i pa mansyonnen dimoun si zis i en threat koumsa nou kapab les pase. Me si sa menm dimoun anba sa Lalwa ki devan nou ozordi i dir bann dimoun ki en ras bann Grek oubyen bann Portige zot, zot pou *end up* dan en rigol anba en pon, sa i al kont seksyon 5 aköz i en *protected characteristics*.

Race. Ou pa kapab ou pa kapab servi *race* pou ou fer *hate speech*, si i dir bann dimoun ki Anglikan zot pou trouv zot lekor dan rigol anba en pon sa i al kont Lartik 5, i al kont Seksyon

5 aköz *religious belief*. Si i dir bann dimoun ki annan *down syndrome*, par egzanzp oubyen ki dan *wheelchair* zot pou trouv zot lekor dan en rigol anba en pon sa i pou vin *hate speech* aköz son karakteristik ki ganny proteze se dezabilite.

Si i dir bann dimoun ki *gay* dan nou lasosyete ki annan en loryantasyon seksyel diferan pou trouv zot lekor dan en rigol anba en pon sa i pou vin *hate speech*. Si i dir bann madanm oubyen bann zonm aköz zot *gender*, zot, zot pou trouv zot lekor dan en rigol anba en pon sa i pou al kont sa Lalwa.

Si i dir bann dimoun ki annan *HIV* zot pou trouv zot lekor dan en rigol anba en pon, sa i pou vin *hate speech*. Pou tou sa bann keksoz sa dimoun si i ti'n dir sa, i ti pou kapab ganny en vizit par lapolis e si *Attorney Zeneral* ti krwar ki sa ti sifizaman grav i ti'n kapab trouv son lekor devan en Lakour.

Me, la prezan si i dir bann dimoun ki *LDS* sa politisyen fiktif ki mon fek envante i dir tou bann dimoun ki *LDS* zot pou trouv zot lekor dan en rigol anba en pon, la ozordi i ti a kapab ganny pourswiv demenler zot in pas sa Lalwa i pou nepli kapab ganny pourswiv.

Lala sa ki nou pe fer ozordi, lala rezon akòz ki *political affiliation* antre ladan, pa Gouvènman LDS ki'n met *political affiliation* ladan, mon ava dir zot, e Onorab Romain in dir sa Lalwa sa Lalwa ti ganny propoze par en lorganizasyon ki ti travay longman avek Biro Attorney Zeneral, en lorganizasyon ki apel *Global Equality Caucus* akòz mwan mon ti okouran.

Zot in travay longman avek Biro Attorney Zeneral avan ki zot in ariv lo sa Lalwa ki'n ase. Ler mon dir longman mon pe koz lannen, pa en kestyon detwa semenn oubyen detwa semenn oubyen detwa mwan be zot in travay pandan en long peryod letan e zot in sanze, zot in tire, zot in mete pou ariv a sa *protected characteristics*.

Nou pa'n al osi lwen pou fer en lofans *hate crime*, nou'n fer en lofans *hate speech* me nou pa'n al osi lwen pou fer en lofans *hate crime* akòz tou dimoun ti krwar- e mon dakor ki nou pa ti ankor pare pou nou ariv laba alor sel keksoz ki nou'n fer se ki nou *aggravate* en lofans ordiner.

Ler ou pe ganny- ler en boug i vini avek en gran kouto Larivyer Anglez par egzanp e i vini i menas ou e i koup ou, sa i en lofans. Me si an mezir ki i

pe fer sa i dir ou mon pe koup ou akòz ou Anglikan, oubyen akòz ou *gay*, oubyen akòz ou annan *HIV*, sa i *aggravate* li i fer li vin en lofans pli serye.

Me si i vini i fer menm zafer avek ou e i dir ou mon pe koup ou akòz ou LDS, non sa i ok akòz, VP i dir nou bomaten sa i en legzersis en drwa. Zot in konpran, zot konpran defayans dan sa ki mon pe dir zot pa ozordi?

E la mon fek ganny war, sa 100, sa promes 100 zour la, *abolish hate speech law- abolish the hate speech law to strengthen freedom of expression, abolish the hate speech law*. Pa *political affiliation the hate speech law*, se sa ki, se sa ki 34 sepa 32mil dimoun in desann pou al vote.

E la ozordi VP i dir nou, non pa sa, pa sa ditou, larestan pe reste nou pe zis tir en pti bout, pou dimoun kapab egzers zot drwa a lekspresyon. Alor ou war Mr Speaker, ki sa ki arive ler ou tay tro vit? E mon'n dir sa avek VP yer, e mon pou dir li ankor, sak fwa ki zot anmenn en Lalwa ki zis sel keksoz zot anvi fer se defer keksoz ki zot pa ti dakor avek.

E taler mon pou repete ankor, se zis taye ede fer keksoz ki zot pa dakor avek fer 2 Manm prepar en diskour vin lir avek

nou eksplike akòz ki zot pe fer sa, san reflesir lo tou konsekans ki sa i kapab anmennen.

Mwan mon pa anvi vwar Mr Speaker, mon pa anvi vwar dan nou pei en dimoun al lo rezo sosyal pe dir avek en Seselwa ki i bezwen retourn dan en lot pei kot i sorti akòz i napa plas isi, *is not acceptable*. E si nou en pep toleran e nou konnen ki nou en pep toleran, nou fer politik isi me nou en pep toleran e si nou en pep toleran nou pa kapab aksepte sa, e nou bezwen met tou bann gardfou neseler an plas.

Nou pa kapab zis vin tire akòz nou pa ti kontan ler en lot Gouvernman ti fer, akòz sa Mr Speaker pa pou anmenn nou okenn par, i pou anmenn nou dan presipis, oubyen i pu anmenn nou dan en rigol anba en pon. Se la kot nou pou al *end up*. Nou bezwen aksepte ki i annan serten keksoz ki serten Gouvernman pou fer ki kekfw nou pa 100 pousan dakor avek.

Ala mon'n ganny en pti not, zis pou montre zot ki manner sa pei pe ale ki lapant i pe pran, e nou ti konnen ti pe vini sa, nou konnen, nou ti konnen ti pe vini sa, madanm Onorab Romain, *CEO SEYPEC*

fek ganny *terminated* la *that's the country* ki zot pe anmenn nou ladan mon bann zanmi akòz zot ki la, zot ki for nou pou tir tou sa bann dimoun, *out!*

Aprè vin pres linite, *it's not gonna happen*, zot in anbark dan en semen divizyon, zot in anbark dan en semen nou ki la, zot in anbark dan en semen fer sa ki nou, nou dir zot fer menm si nou en vwal en pe depi ler nou ti promet zot dan rafal eleksyon, aksepte ki se *US* ki pe *rule border* zot esper 5- anfe les mon retourn lo la, les mon fini avek sa pti pwen akòz yer Onorab Grancourt in fer en pwen isi e i ti dir aksepte desizyon lepep dan sa dernyen eleksyon.

Wi, mon'n aksepte desizyon Lepep mon'n sorti la kot Onorab Lemiel i asize mon'n vin la, akòz nou'n aksepte desizyon Lepep. Mon'n vin la kot Vis-Prezidan ti asize se akòz nou'n aksepte desizyon lepep. Me pa akòz nou'n aksepte desizyon Lepep ki fodre zis nou reste trankil pandan 5an e nou esper nou trou parey Mr Rene ti kontan dir reste trankil dan 5an retournen vin pran par dan eleksyon ankor.

Non, Mr Speaker, Lopozisyon Sesel i from en parti Gouvernman Sesel, pa zanmen bliye, *VP* in dir zot sa yer, *VP* in

dir zot sa yer, sa Lopozişyon ki la i form parti Gouvernman e mon a dir zot aköz.

Onorab Grancourt ekoute, aköz, i annan 3 brans Gouvernman, e Egzekitiv, Lezislatif, Zidisyer, e dan Lezislatif i annan 2 kote, mazorite avek Lopozişyon, alor nou tou ki isi nou form en parti Gouvernman Sesel, nou pa dir en parti Ladministrasyon *US* non, nou pa anvi form en parti Ladministrasyon *US*, me nou form en parti dan Gouvernman Sesel.

(APPLAUSE)

HON BERNARD GEORGES

Konpran sa, konpran e avek nou 15 Manm nou pou lager nou pou lager pou fer sir ki drwa ki aki bann Seselwa pa ganny *watered down* par zot Gouvernman e ki sakenn sa bann dimoun ki zot pe pran zot pe pouse la, sakenn sa bann dimoun nou pou defann zot e nou pou defann zot ziska ler en zour i arive kot zot pou ganny *vindicated* e zot pou rebran zot plas.

Konpran nou, konpran nou aköz nou, nou en Lopozişyon serye nou, e nou pou travay pou fer sir ki i an mezir ki zot, zot pe anmenn nou

dan lepase kot nou ti ete nou, nou lobzektif se devan.

Gara zot, eleksyon pou vini en zour eleksyon pou vini en zour, eleksyon pou vini en zour fer sir ki ler sa eleksyon i vini personn pa *end up* dan en rigol anba en pon. Mon remersye ou Mr Speaker.

MR DEPUTY SPEAKER

Mersi Onorab Georges. Mon a donn laparol prezan Onorab Gill.

HON CHURCHILL GILL

Mersi Mr Speaker. Bonzour *VP* ek ou delegasyon. Bonzour tou Manm e tou dimoun ki pe ekout nou.

United Seychelles in partisip dan en eleksyon demokratik, nou ti dan Lopozişyon, nou konn tre byen ki savedir Lopozişyon e nou konnen ler ou dan Lopozişyon ki ou sipoze fer e lo sa bout mon pa krwar nou pou bezwen lektir. E lot keksoz nou osi konnen poudir i annan 3 brans Gouvernman e ozordi se *United Seychelles* ki dan Egzekitif, menm si dan Lasanble i annan 2 brans se ankor *United Seychelles* ki annan mazorite.

E nou, nou'n vin la pou fer en travay, e nou travay i pou ganny fer. Lopozişyon i lib pou li dir sa ki li i oule, me selman

nou travay i bezwen ganny fer. Nou'n ganny dir bomaten ki sa lamannmman mannyer in vini pou dekouraz Seselwa pou pran par dan politik.

Mon pa konnen si sa i en keksoz ki lot kote latap pe santi, *United Seychelles* i annan en kantite dimoun dan politik ek li.

(APPLAUSE)

HON CHURCHILL GILL

E nou, nou la pou fer en travay, nou'n ganny dir bomaten ki politisyen i mont lo *stage* dan *rally* i dir bokou keksoz, mon toutafe dakor.

Sa Lalwa *Hate Speech* ti ganny anmennen par Ladministrasyon *LDS*, e dapre entervenman avan mwan, zot, zot ti met sa pou en rezon. Selman, ler zot ti Anse Royale, zot *leader* ti donn nou tou Manm Lopozisyon sa letan 10 nou sakenn en *post* Minis lo *stage*. Non barok ti ganny servi, selman la bomaten nou'n ganny dir sa Lalwa ti'n met la pou protez sa bann keksoz.

Ou ki ti met Lalwa, ou ki sipoze proteze, selman ou menm ou ki kase. E la ozordi ler nou pe tann dir tou sa bann keksoz eski nou devret ekoute? Mon krwar nou bezwen les ladministrasyon fer son travay, les *United Seychelles*

delivre lo promes ki in fer avek bann dimoun ki'n deryer li, e zour ou letan i arive parey ou'n dir eleksyon pou anann ankore, zour ou letan i arive ou a ganny ou trou pou fer sa ki ou, ou krwar ou sipoze fer.

Me selman la, realite ou pou bezwen les *United Seychelles* fer son travay. Dan sa lamannman napa landrwa ki'n dir i pe toler *hate speech* parey mon'n tann ou dir, napa landrwa ki dir sa, napa landrwa ki dir sa. So, ler nou pe koz ek dimoun deor, i enportan nou dir dimoun parey i ete dan sa lamannman, annou pa envant keksoz zis pou anbelir nou *speech* me selman sa bann keksoz pa egziste dan lamannman.

Nou'n osi tann dir plizyer keksoz pe arive depi ler Ladministrasyon *United Seychelles* in pran pouvwar, me selman nou bliye 2020 ki ti arive ler *LDS* ti pran pouvwar. Mon pa krwar zot in bliye, me selman zot pa koz lo la, ti zot Gouvernman pa mwan ki pou dir ou. Ou, ou konnen ki ou'n fer, nou, nou konnen ki nou pe al fer ler nou, nou dan Gouvernman.

Alor Mr Speaker, sa lamannman in vin dan en letan kot i devret vini, son konteni i kler i pa pe ankouraz okenn

keksoz ki'n ganny dir, ki'n sey met dan latet Seselwa deor konmkwa sa Lalwa pe vin fer tou sa kantite dezord. Napa naryen dan sa direksyon, tou keksoz i kler e ler VP pou donn son *right of reply* zot a konpran poudir tou keksoz in ganny fer dan en fason ki pou benefisye Seselwa.

E fer tou politisyen kapab partisip dan politik Seselwa san ki zot bezwen annan okenn lafreyer e ki tou keksoz i a kapab bouze dapre ki nou Gouvernman i deside fer li bouze. Mersi Mr Speaker.

MR DEPUTY SPEAKER

Mersi Onorab Gill. Nou a donn laparol pran Onorab Roucou.

HON MICHEL ROUCOU

Mersi Mr Speaker. Bonzour VP ek ou lekip, bonzour tou dimoun ki pe ekout nou. Bonzour zabitan Mont Fleuri.

Mr Speaker, annefe ler mon'n ekout Onorab Gill in fer mwan mazin enn de bann pwen. Onorab Gill atraver ou Mr Speaker, i pe dir poudir sa Lalwa ki pe ganny- ki VP in anmennen ozordi la se ki i napa okenn ou kapab dir, lefe advers lo okenn dimoun demen ki pou anvi fer okenn, ou kapab dir komanter denigrasyon anver politisyen.

E ozordi nou ki asiz dan sa Lasanble nou pe ankouraz bann zenn demen pou zot pran en profesyon dan politik, ki apre nou i ava annan bann zenerasyon ankore ki zot ava vini pou zot kapab antre politik aköz ozordi i enkyetan la deor Mr Speaker. Ozordi i enkyetan la deor, demen, eski nou war zenn i annan en lentere pou zot antre dan politik?

Si mon kapab envit Onorab Gill, annou desann, annou al dan en leköl dir ek bann zenn poudir demen ler ou antre dan politik dimoun i kapab zour ou avek ou manman, i kapab denigre ou mannyer i anvi. Napa en zenn ki pou anvi zwenn politik. E sa Lalwa ki nou, nou ti anmennen, se ki pou ankouraz bann zenn demen ki zot konnen poudir demen ler zot pou al dan politik i annan en landrwa kot nou kapab rann rekour, e ler nou anmennen nou vini nou tire.

E Mr Speaker, sa dernyen 5an menm ki sa Lalwa in la nou'n vwar poudir Seselwa in koze, in eksprim zot lekor, mizisyen in mont lo *stage* in zoure, in zour Prezidan sa letan avek son manman, nou'n war poudir lo *Facebook* i annan plizyer *video*, kot ti pe ganny denigre bann politisyen. Be sa Lalwa ti la li, be selman i donn

sa dimoun ki pe ganny afekte en opsyon pou li demen kapab al rod rekour.

E ler nou vini nou tire Mr Speaker, pa akòz nou en politisyen nou pa imen, nou en imen nou annan santiman nou osi. E demen eski akòz nou politisyen ki nou pou les dimoun- parey Onorab Loze toultan i dir ler ou pe vin politisyen ou bezwen anann ou en lapo epe ki pou ou- be eski demen Mr Speaker, eski akòz mon en politisyen oubyen akòz sa dimoun la deor ki anann en *views* diferan avek nenport ki dimoiun sa dimoun pou pran en kouto pou vin ponnyard li parey dan lepase?

Non, i mon lopinyon pou mwan annan en drwa, pou mon siport sa ki mwan mon anvi ki mon krwar i byen. E sa Lalwa ki la ki nou ozordi nou pe, Lasanble li menm li, Gouvernman pe demande pou revwar Mr Speaker, nou demen nou ti pe ankouraz dimoun pou zot pran en responsabilite.

Ou annan en lopinyon be selman ou annan en *sense* responsab kot demen en dimoun i santi li lib me selman in fer li dan en fason byen responsab kot Marie-andre i pa tann son garson kot pe ganny zoure ek son manman akòz son lopinyon politik.

E ozordi Mr Speaker, mon pran par avek mon koleg, mon pran sagrinasyon avek mon koleg Onorab Romain la obor mwan, nou la dan Lasanble zis akòz ki i fini fer son lentervansyon, i ganny en *call* ki son madanm i perdi son lanplwa akòz son lopinyon politik, sa ki'n arive.

E bann keksoz koumsa nou, nou ti anvi ki i arete- e si zot, zot war poudir nou, nou ti pe fer mal, zot fer pli byen. Sanmenm sa ki zot ti dir dan lepase, zot fer pli byen, be sanmenm sa ki nou, nou pe demande, fer pli byen si nou, nou ti pe fer sa ki mal, zot vin pli byen akòz zot ti dir poudir zot pou fer pli byen e ozordi nou pa war poudir zot pe fer.

E zot siporter laba deor pe dir, pa sa ki zot ti dir e zot dan lepase zot ti *remind* nou lo la, e nou, nou la ozordi dan sa pozisyon pou nou *remind* zot, zot osi. E ozordi Mr Speaker, i en zour sagrinen, nou vreman sagrinen ler nou get nou bann frer ozordi.

Mon mazin Onorab Naddy Zialor ki yer swar nou ti ansanm nou'n asize, nou'n koze Mr Speaker, si ti mwan, mwan mon leve mon debourye, be Onorab Naddy Zialor Mr Speaker, *ok* ou anvi tir li laba

donn li en lot landrwa pou li travay.

Donn li en lot landrwa met li dan en lofis oubyen met li kek landrwa, i ti travay kot lanplwa, ou anvoy li laba ou dir li ale al debourye mon frer nou pa bezwen ou la anler, be pa aköz-e Onorab Naddy Zialor Mr Speaker, i ti parey mwan, nou ti *SPPF* nou, nou'n sorti Mr Speaker aköz sanmenm sa bann mantalite e nou, nou espekte zot fer pli byen ki nou.

(APPLAUSE)

HON MICHEL ROUCOU

E, mazine, fodre pa ki nou bliye, fodre pa ki nou bliy sa, sa madanm mazine i annan fanmir li, e son fanmir osi i annan fanmir ki petet i siport zot.

E nou, nou sel keksoz ki nou pe demande Mr Speaker, se ki bann keksoz ki'n arive dan lepase kot en dimoun ki pe debout pe eksprim son lopinyon i pa war en boug pe mont deryer li dan milye semen pou vin ponnyard li oubyen nou tande poudir in disparet aköz son lopinyon politik.

E son lopinyon politik oubyen in dir serten keksoz. 5an pase dimoun ti pe koze, bonnavini, eksprim zot lekor sa ki ti menm pe zoure, maltrete,

be napa person ki'n ganny anmennen anba sa Lalwa be aköz, Mr Speaker? Nou, nou anvi ki dimoun i pran en *sense of* responsabilite ou konnen ki ou dir, ou konnen mannyer ou pou eksprim ou lekor byen dan en fason avek en fason kot ou annan respe.

Mr Speaker, mwan mon annan dimoun ki'n dir keksoz lo mon, mon zwenn sa bann dimoun nou koze byen, nou koze byen nou. Ou war? In eksprim son lopinyon, me selman ler mon zwenn li mon montre li poudir mwan mon en dimoun i ganny sivilize.

E pa aköz ozordi ki nou annan pouvwar ki nou krwar poudir demen Lepep Seselwa pa kapab sanz- fodre parey Onorab Georges in dir, pei i diviz an 2 li e zour eleksyon i vini sa pep ki son fanmir- aköz dimoun ki ozordi ki dan mon fanmir, me i annan dimoun ki annan diferan lopinyon. E ozordi ler ou war ou fanmir pe pas koumsa en dimoun parey Onorab Naddy Zialor, Seselwa pa bliye, i pa bliye bannla.

E nou, nou pe demande ki zot, zot fer pli byen si nou, nou'n fer sa ki mal. Mr Speaker, mon pa pou kapab siport sa Lalwa aköz mon pou mon ozordi mon war en pe dimoun zot ti pe eksprim zot lekor e dimoun pou

komans per pou zot eksprim zot lekor akòz zot konnen poudir se ki ler mon annan mon lopinyon politik demen sa i ganny tire Mr Speaker, ki pou arive?

Ozordi nou pe zis- dimoun pe zis vini zour en boug akòz dan lepass sa ki'n arive, be pou rekòmans ankò kot ou pou tann en boug in ganny bate, in ganny antoure in ganny isi, in ganny laba akòz son lopinyon politik ouswa larelizyon i pou trounen Mr Speaker.

E nou, nou la nou devret pe protez sa bann dimoun, parey Onorab Georges in dir se annou met en gardfou la, ki demen nou konnen poudir i annan en Lalwa la ki sa dimoun i kapab ganny proteze anba la. Mersi Mr Speaker.

MR DEPUTY SPEAKER

Mersi Onorab Roucou. Prezan laparòl Onorab Loze.

HON JOHAN LOZE

Mersi Mr Speaker. Mr Speaker mon a gard sa ton solannel ki pe ganny servi dan nou Lasanble depi se maten menm si en ton vreman solannel, kalm, ki pe deroule dan en konplet labsans laverite.

Mr Speaker, ki fer ki mon pe dir labsans laverite? Nou'n konstate resaman ki i annan dimoun ki per AI, selman zot

oule gard Lalwa kont *witchcraft* akòz si oule gard Lalwa kont *witchcraft* vèdir ou krwar dan *witchcraft* alor sou per *witchcraft* selman ou pa oule AI ou.

Be mon a montre Seselwa en pti lavantaz AI akòz yer mon'n tann dimoun pe maltret kanmarad akòz *ChatGPT*, be selman en pti legzanp. Mon osi dan mon bet, bet mon'n fer mon pti ledwa marse lo sa masin la e mon'n demann li en kestyon bet Mr Speaker. Mon'n demann avek AI *“in which country has the Global Equality Caucus proposed for political characteristic to be included as part of hate speech legislation”*.

Zot ava rapel poudir Onorab Leader Lopozisyon in fek eksplik nou poudir *Global Equality Caucus* in travay longman, longman avek nou e se sa rezon ki nou annan sa. Bon, prezan mwan dan mon bet Mr Speaker, AI i dir mwan *“the global equality Caucus has not proposed including political characteristic as a protected category in hate speech legislation in a specific country according to provided search results*.

The GEC is an international network of Parliamentarians focused exclusively on tackling

discrimination and advocating for rights of LGBTQ plus people, their activities and advocacy efforts are detailed in search results focused on- lala- sexual orientation, gender identity, race, ethnicity and religion”.

Mon ankor pe rode kote politik i antre la mwan, mon ankor pe rode dan tou sa bet ki mon bet la mon pe rode menm. *”Existing Hate Speech Laws in various countries of an include political opinion or views as protected characteristics example Estonia, however, the specific proposal by the GCE as a dedicated LGBT plus advocacy group, centers on advancing legislation related to sexual orientation and gender identity banning conversion practices”.*

Napa politik dan zot *advocacy* zot, pa zot ki'n dir nou fer nou fer sa, i kler sa, zot pa'n dir nou fer sa zot. Prezan *ce maten* nou annan en dirizan dan Lasanble Nasyonal Sesel, mon donn li tou son respe, i asiz la anndan i dir nou poudir *Global Equality Caucus* in travay longman avek nou pou fer nou fer antre politik koman en karakteristik proteze dan nou lezisasyon.

Mon a les Lepep Seselwa desid pou zot menm. Mr Speaker, bokou keksoz i ganny

dir dan nou Lasanble e i annan keksoz nou kite e i annan keksoz nou lese, be i annan keksoz nou pa kapab les pase.

Letan nou ganny dir poudir ozordi Sesel i an 2, i divize, be mon pa konnen si nou anvi normaliz sa, si i en panse ki nou anvi normalize, si i en keksoz ki nou anvi fer antre dan latet nou pep konmkwa nou divize, nou bezwen desir an 2. Mon rapel lontan SNP zot ti kontan dir en parol, i annan 2 Sesel, i annan enn pou sa ki-apre i annan en lot Sesel.

La konmela zot in arete dir nou i annan 2 Sesel zot dir nou Sesel i an 2. Be, i posib i en keksoz ki zot, zot anvi fer antre dan latet Seselwa, mon pa konnen ki zot rezon e aköz zot oule fer sa, aköz zot santi li nesaser pou kontinyen zwe dan sa boubou divizyon.

Mon a met en keksoz devan Lepep Seselwa, letan mon dir boubou divizyon, i annan en kantite *cynicism*, *sinisizm* i ganny eksprimen. Ou- ou konnen mon asize la anndan mon en dimoun en serten laz, en serten zenerasyon, mon menm laz, mon menm zenerasyon avek lezot dimoun.

Be letan en dimoun mon konnen mwan, mon konnen ou tonton in piblikman admet

poudir li ki ti fer koudeta, in dir, li ki ti fer koudeta. Ou, ou fanmir pandan bann letan Dezyenm Repiblik zot pa'n zanmen opoz ou tonton ki ti fer koudeta, e in monte desann la anler kot ou li. Ziske lakaz ki ou bann *in laws*, ou bel fanmir i reste ladan li ki ti al sers zot kazern kot zot ti reste i ti anmenn zot la i ti propoz zot sa lakaz.

So, mon pran sa dan direksyon kot en dimoun ki'n personnelman benefisye, benefisye ozordi ou vin ensit en bann zafer, bann ki'n ganny bate, ki'n ganny isi, ou pa'n ganny bate ou, ou'n ganny proteze ou, ou fanmir in ganny proteze ou, ou bel fanmir in ganny proteze, zot in grandi, grosi, zot in gra, ozordi ou vini ou zwe dan en boubou.

Wi i annan Seselwa ki'n soufer, i annan Seselwa ki'n soufer, be ki ou'n fer? Ki ou, avek ou bann dimoun lo ou kote avek ou Prezidan ki zot in fer pou rektifye sa douler, sa soufrans? Ki zot in fer pou pez en pe soufrans sa bann dimoun? Ou vini ou zwe ankor ladan la, ou vini ou zwe ankor ladan kan ou prop tonton in avoue piblikman ou defen tonton li ki ti fer koudeta.

E, ou pa'n zanmen dir ou tonton naryen, ou pa'n zanmen

opoz son pozisyon, ofet ou'n benefisye. Be prezan letan nou vini nou zwe dan soufrans nou prosen, en soufrans ki nou, nou pan partisip *first hand* ladan nou, nou pa konnen son soufrans nou, selman nou eksplwat li son douler.

E la pa ni en letan pou sa, ki ti anann pou nou al laba? Ki annan pou nou al laba? Nou oule ouver bann boubou ki pa an proporsyon avek size ki lo latab devan nou. Nou oule kontinyen fouy dan en keksoz ki'n aport nou serten benefis dan lepase a konsekans soufrans lezot zis pou nou ganny ankor benefis.

Mr Speaker, se sa ki mon pe dir i annan sinisizm poliitk, ou konnen ozordi, mon ekout dimoun koze, mon reste ebete. I annan dimoun pe koz ou sa ki'n mizisyen i mont lo *stage*, in zour manman Prezidan, ou konnen Mr Speaker, mwan sa bann dimoun ki pe koze mazorite bann zanfane Corgate Estate mon byen ek zot fanmir, mon byen avek zot, mon annan respe pou lafanmir.

Mon pa en portre ek sa bann dimoun mwan, en portre mon napa avek sa bann mizisyen ni dan nou *rally*, ni prive. Be i annan nou, nou'n fer *show* laplenn kolez, nou ti lo *stage* pe tir portre ek zot, nou al

ziske dan *barel*, dan *barel* nou la filme, fer *video*, tir portre avek zot, ozordi nou asiz dan Lasanble nou maltret zot.

Nou asiz dan Lasanble nasyonal nou gele in zour manman Prezidan, be ler ou ti pe tay deryer zot, ou'n kit laplenn kolez ou'n tay deryer zot ziske *barel*, ou'n al fer *video clip*, ou'n al tir portre avek zot. Be, la ozordi ou vini ou servi zot koman legzanp aköz i annan en deba.

E se sa ki mon pe dir nou, nou pe annan nou en deba, wi ton i byen wi napa maltrete, wi ton i solannel, be i annan en labsans laverite, i annan en lipokrizi, i annan en sinisizm, nou pa pe byen reprezant nou lekor. E i annan bann keksoz ki nou ganny dir de fwa ou dir be aköz sa bann keksoz pe ganny dir.

La nou ganny dir i annan en gardfou, gardfou se *Attorney Zeneral* se li ki pou deside. Ser pep Seselwa, si ou pran ou en avyon ou al aletranze, ou rod ou en *Attorney Zeneral* an poud, ou desann avek Sesel, ou kas son pti pake ou met dan en lanmok, ou vid delo so lo, la, ou ganny ou lala en *Attorney Zeneral* fek fer, anpoud ki ou, ou dir li tou sa ki pou fer ou.

Tou le 14 zour ou dir li ale al Ankour demande pou

kontinyen tenir sa bann dimoun dan kaso, zot a fer ankor 4an dan kaso. Konmsi oule dir mwan letan ou annan ou en *Attorney Zeneral* anpoud, sa *Attorney Zeneral* anpoud ki ou, ou'n met la ki ou pe kontrole i pou anpes ou li aret Veronique Adeline en.

Ou *Attorney Zeneral* anpoud i pou defann ou persekit e viktimiz Antoine Hoareau sa gardfou *Attorney Zeneral instant decaffeinated* anpoud la.

MR DEPUTY SPEAKER

Onorab Loze. Onorab Loze en pti moman. Annou pran kont 59(1) lo *Standing Orders*, mansyon bann personnaz sirtou parey bann Ziz ki enkli osi *Attorney Zeneral* letan nou pe- menm si ou pa'n mansyonnon, nou konnen poudir i annan zis en *Attorney Zeneral*, *please*.

HON JOHAN LOZE

Mersi Mr Speaker. Mon pran kont sa ki ou pe dir mwan, selman prezan mon a poz zot en lot kestyon, be Mr Sullivan li, ki gardfou ki ti anpes li ganny persekute? Gard pa ti fou sa letan latet to bon?

Ler Mr Sullivan ti ganny persekute, Gard ti *ok, ok*, so ou vwar Mr Speaker, nou pe viv

nou dan en Sesel ozordi kot ler ou lans en lanket Lasanble Nasyonal i dir ou, ou'n fer en *witch hunt*.

Mon'n tandé bomaten mwan, in dir i annan diferan lanket pe ganny fer, *witch hunt*, la i *witch hunt* la. La ozordi si nou pou al fer lenvestigasyon Cascade i pou *witch hunt* i pa pou en lenvestigasyon. Si nou pou al fer lenvestigasyon Assomption i pou *witch hunt*.

Mr Speaker, mwan mon pou annan en keksoz pou dir mwan, Seselwa parol ki i dir plis se bonzour, dezyenm parol ki Seselwa i dir plis se mersi. I pa ou manman, ou manman, ou manman akòz Seselwa par natir i en nasyon poli. Mon annan en mesaz pou politisyen, ekoute ki Kreol i dir; -

Whether ou santi i pe denigre ou, i pe isi, i pe laba avan ou reponn ou gele, ekoute ki in dir ou silvouple. Se sa rezon ki nou koman politisyen nou perdi kontak, nou toultan pe rod fason pou protez nou lekor, letan nou met politisyen koman en karakterisrik proteze nou pe sey kre en elit dan nou sosyete pe sey met nou apar avek larestan nou sosyete.

Nou sey met nou a en pyer kot sa dimoun laba ki annan son douler son soufrans li i pa puy kapab tous nou zanmen li i

pa pou kapab montre nou en ledwa li akòz nou, nou proteze mwan mon pa anvi vin en elit, mon en politisyen mon pa en aristokrat.

Mon pa dan en Sesel divize, mon pa dan en Sesel ki'n kas an 2, mon en Seselwa, dan tou son lanpler mon en Kreol mazanbik epe. E napa naryen ki ganny dir lo mwan ki tous mwan kot mon sansib mon pa konnen akòz zot.

MR DEPUTY SPEAKER

En minit Onorab.

HON JOHAN LOZE

Ki okenn parol ki ganny dir i tous zot profon sansib, ki zot bezwen Lalwa pou protez zot. Mersi Mr Speaker, mon pou byen servi mon minit ki reste mwan.

Mr Speaker, mon'n enn bann sel dimoun ki'n asiz la anndan pou defann Mr Conrad Benoiton, i ti ganny pouse akòz en *tanker* ki ti disparet menm ler *tanker* ti ganny trouve zot ti *still* pous li. Mon pa konn kondisyon mon zanmi lekol, Mrs Sarah Romain mon ofer mon senpati pou sa ki'n arive avek li.

Be selman, ti napa enn zot ki ti kapab debout pou defann Mr Conrad Benoiton ler i ti ganny met deor pou en *tanker*

disparet ki pa ti'n disparet, mwan mon ti fer li. Ti napa enn zot ki ti dir naryen ler Mr Marco Francis ti ganny trete koman son son figir i parey lisyen, ti kont bag dan son ledwrwa, ti kont bag dan son ledrwa parey en pti fanm zaksyon pe vey bag dan ledrwa zonm.

Lo *stage* politik ti kont bag dan ledrwa, ti napa enn zot i ti dir naryen ler malere boufon ti dir vini Marco, vini Moumou, vini lot ki mannyer i apele? Zot pa ti dir naryen lensilt lo politisyen. Akoz ozordi lensilt lo politisyen i en problem? Ler Marco son figiy ti parey lisyen ti *ok?* ler ti pe fer lodit ek resansman bag dan son ledrwa ti *ok?*

Be mon ava anmenn pli pre avek zot, ler la anndan dan kantin ti pou sot dan likou Onorab Noline Sophola pou trangle, ti *ok?* Letan ti pou kalot Onorab Chantal Ghislain la anndan dan kantin, ti *ok* avek zot? Zot pa ti anvi en karakteristik proteze pou anpes zot dirizan bat en Manm lo kote *US?* Zot pa ti sot dan milye zot. *LGB* ki ti sot dan milye.

MR DEPUTY SPEAKER

Onorab terminen.

HON JOHAN LOZE

Mersi Mr Speaker.

MR DEPUTY SPEAKER

Bon, avek sa nou pou pran en *break* ziska 11er, apre nou a trounen. Mersi.

(BREAK)

MR DEPUTY SPEAKER

Bon nou pour kontiny deba lo sa *Bill*, mon le zis met a latansyon bann Manm ki nou anvi fini deba lo sa *Bill* apartir midi e ki ler nou retournen 2er *VP* i kapab donn son *right of reply*.

Pour lemoman mon annan 2 Manm, 2 Manm sorti lo kote *LDS* mon ti a kontan demann bann Manm akoz mon pour ferm lalis, bann ki anvi entervenir pour endike silvouple.

Onorab Wavel Woodcock.

HON WAVEL WOODCOCK

Mersi Mr Speaker. Bonzour *VP* ek ou delegasyon, tou Manm e tou Seselwa a lekout. Mr Speaker mon pour bezwen komanse premyerman par eksprim mon senpati, avek mon koleg Onorab Romain. Nou fek aprann la bomaten ki son madanm in ganny *terminated on the spot* koman *CEO SEYPEC*.

Fodre rekonnet travay ki sa madanm in fer dan 3an koman *CEO*. Mon en pe emosyonnel aköz ou konnen nou bezwen rekonpans travay dir, en madanm *SEYPEC* lannen pase in pey plis ki R250milyon *dividend* Gouvernman. Byento *SEYPEC* anba son *leadership* pe al ganny li 2 nouvo *tanker*. E pour li ganny *terminated* koumsa i vremen sagrinen i montre poudir sa latak i en latak lo en dimoun, aköz son lapartenans politik aköz son msye i en Manm Lasanble Nasyonal.

E ler Onorab *LGB* ti pe dir sa, in fer sa lanons bomaten ou konnen ki *United Seychelles* in fer son bann Manm? Zot in riye, zot in gognarde, sirtou Onorab Rocky, manman ledan deor parey sat ki'n war bwat dile Madanm Speaker.

Selman li i *ok* li, *I mean* pour Nwel sa fanmir pour dan en soufrans, li son madanm i la devan li, pe asiz obor *VP*. Son madanm pour selebre Nwel byen.

Selman nou koleg li, nou koleg li aköz son madanm in ganny met deor, zot selebre, zot kontan ...

MR DEPUTY SPEAKER

Onorab Woodcock.

HON WAVEL WOODCOCK

Sa ki mon pe dir Mr Speaker i annan pour fer ek mon *Bill*, mon vin lo la. Nou pe koz *hate speech*, nou pe koz lo ek nou pa ek nou, nou pe koz lo viktimizasyon politik ki pe arive dan nou pei Sesel ozordi. Sagrinan, *shame on United Seychelles!*

(APPLAUSE)

HON WAVEL WOODCOCK

Ozordi nou pe koz en lamannman dan *Penal Code* kot i konsern *hate speech*. Maltrete ensilte, *threatened* en dimoun aköz son lapartenans politik.

Mr Speaker sa pep sanses pour lannen e de lannen zot in soufer aköz bann *threats* viktimizasyon politik aköz zot lapartenans politik.

Soufrans i la, i ovif, Mr Speaker – *TRNUC* en kantite, mon fanmir in fer fas avek. Mon fanmir kote mon manman, lafanmir Grandcourt nou'n pas dan en kantite kou, kantite soufrans Mr Speaker.

Ziska ozordi nou ankor pe soufer, bann keksoz ki nou'n fer fas avek e ozordi en lamannman i vini, ki pe protez nou pep, protez nou pep aköz son afilyasyon politik pour anpese ki zot *threatened* atake, ensilte zoure ankor.

Ler lo zot *stage* pe sant en sanson pe maltret Prezidan, anndan son manman, VP devan pe sote, mon kouzen pe bat lanmen bravo, *wonderful*.

Zot bliye soufrans ki zot fanmir in fer fas avek. Mr Speaker eski *United Seychelles* i vreman serye? Eski *United Seychelles* koman en parti i vreman serye? Eski *United Seychelles* koman en parti i vreman serye? Zot in dir zot pour anmenn en Lalwa kont ek nou pa ek nou. Mon ti pe ekspekte sa Lalwa enn bann premye Lalwa, ki pour vini pandan sa 100 zour.

Olye anmenn en Lalwa ek nou pa ek nou, nou anmenn en Lalwa ki pe tir proteksyon ki nou frer ek ser Seselwa i annan la deor ki pour anpes zot ganny targete, *threatened*, ensilte maltrete.

Deza *as we speak now* ozordi nou'n aprann *faith* mon ser Sarah Romain Onorab Loze i dir, '*ah* mon koleg lekol', lot solman ler lanons i ganny fer zot selebre zot kontan. Ozordi *threat* in plis ki zanmen, dan sa pei anver nou bann koleg, nou sitwayen ki siport *LDS* dan Gouvernman.

Zot bann siporter aköz ozordi rekonpans pe ganny *rewarded* bann ki siport *US*, menm si dan lepase bokou sa

bann dimoun in fel, in *involve* dan bann ka koripsyon sa ki'n ganny later pour nanryen, sa ki'n pran later - later ler ti *SMB* in partaz ek kanmarad dalon isi laba.

Ozordi zot tou pe ganny rekonpans, ozordi nou annan en parti ki pe protez *dealers*, drwa bann *dealers*, drwa bann droger i pli enportan ki drwa larestan Lepep Seselwa.

Dealers ki ka ti devan Lakour ki ti annan *case* kont zot, *asset* in ganny sezi, transpor, par, par - mon pa konnen ki kantite transpor, ki'n ganny sezi pangar - anba *POCA* pa konnen ki mannyer in kapab eksplik ki kantite transpor, lakantite larzan milyon de milyon in ganny deporte ozordi *dealer* pe retourn Sesel.

Son drwa pe ganny proteze plis ki drwa en madanm ki'n travay, ki'n prouv son lekor, plis ki drwa en madanm ki ti pe anmenn desarz son responsabilite kot prizon, plis ki drwa enn nou frer ki annan en dezabilite ozordi.

United Seychelles ozordi sanpyon Drwa Imen. Protez nou pep, siport nou pep *from the cradle to the grave*. Ozordi lanmwatye nou sitwayen pe ganny targete, targete aköz zot lapartenans politik. Ek nou pa ek nou in retourn Sesel dan tou

son splander. Ou konnen ou? Ozordi Prezidan Herminie, mwan mon *believe* sa i anvi *rule by fear*.

I annan de fason *rule*, ou *rule by love* kot ou pep i kontan ou, ouswa ou *rule by fear*. Fodre Lepep Seselwa pa per se zans aköz zot bann move dimoun. *The more* ki nou per zot, *the more* ki zot pour viktimiz nou plis. Fodre nou debout pour nou drwa.

Sa 14 Manm ki lo sa kote latab, nou pour la pour nou koze e napa person ki pour fer nou reste trankil. Mwan Onorab Woodcock, de fwa elekte Grand Anse Praslin, e parti ki mon ladan in santi ki mon bezwen retourn dan Lasanble Nasyonal ozordi mon la, mon'n debout dan eleksyon, lot kote i annan en bann ki'n - zanmen in debout dan en eleksyon, mon pa konnen konbyen fwa in retourn dan Lasanble Nasyonal.

Ozordi mon la anndan aköz i annan en travay ki mon pour fer e mon pour kontinyen fer pour defann drwa sa pep Seselwa.

Afilyasyon politik, lapartenans politik, drwa lekspresyon sa bann keksoz ozordi nou pe rezouir aköz lalit ki *LDS*, lalit ki en zonm *Father Wavel Ramkalawan* anmennen depi o komansman ki ozordi sa

pep i annan sa liberte pour li koze.

E la ozordi, zot le vin avek en Lalwa angiz konmkwa, *ah* nou pe protez drwa lekspresyon me selman an menm tan, ler ou pe tir sa proteksyon sa proteksyon kont latak personel lo en dimoun aköz son afilyasyon politik ou pe ouver en laport.

Ou pe ouver en laport kont en kantite dimoun, aköz pour annan en lafreier pour en dimoun, pour annan en lafreier lo en dimoun aköz si demen mon montre ki mon siporte mon annan *the risk of being* ganny pouse, ganny zoure, ganny maltrete, ganny *threatened*.

Zis parey dan *lobby* la dan koulwar Onorab Loze ti *threatened* en zournalis Denise Dufresne pour bat li, met ledwa anba son nennen, ti dan lartik *Today*. La deor la, la deor la ti dan *Today*, ti dan *Today* Mr Speaker.

MR DEPUTY SPEAKER

Onorab Woodcock! Onorab Woodcock!

HON WAVEL WOODCOCK

Ti dan *Today*!

MR DEPUTY SPEAKER

Onorab Woodcock en moman.
Onorab Woodcock i annan de moman...

HON WAVEL WOODCOCK

Mon kapab *substantiate* Mr Speaker en.

MR DEPUTY SPEAKER

De moman, mon pe zis gid zot mwan. I annan *Standing Orders* ki gid nou malgre nou annan nou *freedom of speech* pour nou koze la anndan. 59(1) i fer referans avek ou fason ki ou entervenir lo size ki devan nou.

Boner ou'n nonm size *drug dealer United Seychelles*, i pa *the content of* size ki devan nou la. Size ki devan nou se lamannman *Penal Code 5(2)(g)* ki fer referans pour retir *political affiliation*.

E dezyenmman ou pa kapab nonm en Manm san ki i annan en Mosyon, ki devan latab devan li. I kler lo la sa. So Onorab Loze lo ou *point of order* mon'n fini adrese e mon demann tou Manm pour swiv nou *Standing Orders* silvouple pour gard Lasanble annord. Mersi.

HON WAVEL WOODCOCK

Mr Speaker ozordi en kantite keksoz ki pe ganny fer, bann lamannman, bann lapwentman

ozordi dan Gouvernman i senpleman pe diviz sa pep.

Sa Lalwa ki la i en Lalwa, sa lamannman ki pe anmennen la, i pa en lamannman ki dan benefis nou Nasyon.

I en lamannman ki pe al ouver en laport pour plis nou bann frer ek ser ganny targete, ganny viktimize. I pour kree en lafreder dan nou frer aköz demen si i fer komanter politik lo rezo sosyal, zot pour targete, zot pour ensilte li, zot pour *threaten* li.

Sa Lalwa ki la, sa lamannman ki zot pe fer i pe al anmenn plis soufrans dan nou pei parey nou pe war ozordi pe arrive avek bokou nou bann frer ek ser dan sa pei. Lepep Seselwa ouver zot lizye, ki pe arrive la deor, nou ti dir zot nou zot pa'n ekout nou, plis nou frer ek ser pe al soufer pour annan ankor lamannman ki pour vini, zot pour war.

Pour annan ankor nou bann frer ek ser ki pe al ganny met deor sirtou la, Nwel pe vini, nou sipoze nou tou dan sa *mode* pour nou selebre nesans nou sover Zezi Kri me selman en kantite nou bann frer ek ser ozordi e posibleman i pa pour dernyen nouvel ki nou pour gannyen avan lafen sa lannen.

Ler nou anmenn en Lalwa mon bann frer ek ser *or* okenn

lamannman la, annou pa zis vini defann *rubberstamp* - zot ti akiz nou pour *rubberstamp* dan lepase. Me selman la ler mon e gete zot pe *rubberstamp*. Zot pe adopte bann lamannman bann Lalwa ki pa pour bon pour nou pei demen.

Met zot dan soulye sa bann dimoun ki ozordi pe soufer, nou ti dir ki zanmen ankò nou pour annan en *TRNUC*, me selman mon annan en krentif mwan. Apre 5an nou kapab war en lot *TRNUC* ankò.

Akoz ler nou pe gete manner pe ale sa bann lamannman ki pe vini, sa direksyon ki zot pe ale i pour move pour zot demen.

Seselwa pe gete, nou war zot nou lo sa kote latab nou pour la pour nou defann sa pep pour nou koz pour sa pep.

Reflesir byen mon bann frer ek ser, sirtou lot kote latab letan zot pe konsider sa lamannman ozordi, konsider byen. Avek sa de mo Mr Speaker, mon pa pour kapab siport en tel amannman akòz mon konnen son lenplikasyon. Mersi.

(APPLAUSE)

MR DEPUTY SPEAKER

Mersi Onorab Woodcock. Mon'n fini ferm mon lalis, laparol avek

Onorab - avan mon donn ou Onorab Savy mon zis anvi fer zot konnen poudir i annan 3 Manm ki reste lo kote *LDS* e 2 Manm lo kote *US*. Onorab Savy.

HON DOMINIC SAVY

Mersi Mr Speaker. Bonzour Mr Speaker. Bonzour *VP* ek ou delegasyon. Bonzour tou Manm Lasanble Nasyonal e bonzour pep takamaka e lezot dimoun a lekout.

Mr Speaker permet mwan komans par sey vwar ki si sa *hate speech*? *Hate speech* i nenport parol ki promot laenn e ankouraz vyolans ver en dimoun ou en group dimoun baze lo ras, relizyon oubyen oriyantasyon seksyel. Sa *hate speech* ki nou pe koz lo la ozordi i baze lo oriyantasyon politik.

Mr Speaker dan son lentrodiksyon, *VP* in dir ki en dimoun ki zwenn politik i bezwen aksepte e sibir bann deformasyon karakter me mwan mon enn sa bann dimoun, ki pa totalman krwar ladan.

Akoz senpleman si nou met nou responsabilite o premye, si nou met lentere nou distrik o premye e pli enportan met lentere nou pei avan tou, nou pour napa plas pour fer *hate speech*.

Mon mazin Anbasader Patrick Victor ki ti la ek nou sa semenn, ler i ti dir, 'ki tou dimoun i annan son fason enterpret patriyotizm'.

Permet mwan Mr Speaker pour mwan fer li kler, ki nou senserite e lwayote anver nou parti politik pa fer nou vin en patriyot. O kontrer en patriot i sa enn ki met son pei avan son parti politik.

(APPLAUSE)

HON DOMINIC SAVY

Alor en patriyot pa sipoze fer *hate speech* aköz i sipoze konsyan ki an fezan sa i pour pe met son pei an aryer. E li i pou fel koman en patriot. Mr Speaker mon'n tann sa souvan enkli isi dan sa Lasanble, kot politisyen pe dir sirtou apre eleksyon, bliye sa ki'n ganny dir e annou travay ansanm.

Mwan mon kestyon i aköz sa bann parol ti bezwen ganny dir o premye, parol ki ofans dimoun pa efas sitan fasil parey nou krwar. E i fer ki travay ansanm i vin pli difisil. Alor mon swe se ki nou menm bann politisyen, nou vin pli patriyotik e mazin de fwa avan nou dir parol ofansif.

Mon fyer pour mwan dir ki pandan kanpanny sa dernyen eleksyon, in enn mon gran

prensip pour pa dir nanryen mal lo personn. Mon'n kanpanny lo sa ki mwan, mon pe anmennen pour dimoun Takamaka e non pa ki lezot pa kapab fer pour Takamaka.

Mon'n dir sa, mon dir sa Mr Speaker pour ilistre ki politik i kapab ganny fer san ofans lezot. Menm si mon'n adopte sa prensip i pa'n eparny mwan kont *hate speech*. In annan bokou latak personnel lo mwan. Me mwan mon'n gard mon prensip e dimoun Takamaka in prouve ki zot apresye sa prensip ler zot in anvoy mwan isi pour reprezant zot.

(APPLAUSE)

HON DOMINIC SAVY

Alor Mr Speaker, *hate speech* i annan sa mo 'hate' ladan. Laenn e mwan mon pour toultan siport tou lesey pour anpes laenn propaze enkli laenn politik. Mersi Mr Speaker.

(APPLAUSE)

MR DEPUTY SPEAKER

Mersi Onorab Savy. Nou annan parol Onorab Sopha.

HON GERRY SOPHA

Mersi Mr Speaker. Bonzour VP avek ou delegasyon. Bonzour

tou koleg Onorab. Bonzour tou dimoun ki a lekout. Mr Speaker bomaten sa lamannman in fer nou antann bokou lopinyon.

Me nou'n antann serten lopinyon, ki mon krwar i pa fer sans aköz avan sa lamannman i vin la devan 8enm Lasanble, nou ti annan sa enn ki ti ganny amande 2024. Kestyon ki mon demann mon lekor koman en nouvo Manm 8enm Lasanble. Eski sa amannman 2024 in ganny respekté par LDS ki ti amann li 2024.

Mon konsènen Mr Speaker, aköz en kantite fwa letan mon pa ti ankò vin dan Lasanble mon'n tann dan 7enm Lasanble kot in ganny prononse legzanp i konmans par bann Manm Lasanble nou menm.

E i annan bann keksoz ki mon'n tandé bomaten ki pour mwan mon tre, tre konsènen ki'n pase dan bann Lasanble avan. Mwan mon pa ti la, me touzour i zistwar kot in annan aksyon vyolan anver Manm Lasanble avan, sirtou madanm.

E sa in fer resorti par Onorab Loze. 2 fwa Onorab Loze in fer sa sorti. Tousala i bann aksyon vyolan ki pa pe donn nou sa konfyans ki isi ler nou dan Lasanble tou dimoun i koze e zot pa pare pou pratike sa ki zot koze.

Mr Speaker, mon'n antann en kantite fwa dan bann rasanbleman politik ki ladministrasyon sortan in fer, mon pa kapab repeté tou, bann latak ki nou apel *hate speech* par bann Dirizan LDS.

E letan mwan mon ti deor laba mon demann mon lekor, ki legzanp nou konman bann sitwayen nou pou kapab swiv avek bann dimoun ki sipoze pe diriz pei, me i a pe maltret son oponan?

Mr Speaker, ler mon'n antre dan sa Lasanble mwan menm apre ki LDS in perdi eleksyon, mon osi mon'n war mwan par menm dimoun, par menm dirizan ler in perdi eleksyon servi sa langaz *hate speech* ki zot menm zot ti amann sa Lalwa an 2024 i servi Praslin anba langar kot i ti al fer son *meeting*.

Lo nou kote latab i annan 3 nou ki ti pas dan sa konvèrsasyon kot *hate speech* i aparann. Erezman in perdi eleksyon e in perdi eleksyon aköz sa *hate speech* ki zot menm zot, zot ti amande apre zot pa'n kapab onore pou met an pratik.

Ozordi nou war en lamannman devan nou ki pe dir nou pou tir afilyasyon politik. Pour mwan mon pou sipòte aköz mon krwar i enportan pou

siporte, akòz ler ti annan zot pa ti respekté. Plito nou tire, aprezan nou tou nou a bezwen war nou dan menm grander. Akòz avan, i paret sa Lalwa ti ganny amande pou protez *quelqu'un*.

Akòz i pa'n aplikab pou zot pratike bann dimoun ki swadizan zot ti bann *decision maker*, bann *leaders*. Swadizan zot ti dir zot *leaders*. Zot ti pe azir konman *boss* Mr Speaker. Me nou ozordi nou'n ganny en *leader* ki annan kalite ki'n war ki direksyon ki nou bezwen pran.

Mr Speaker, mon'n atann osi la bomaten kot i annan serten Onorab lot kote latab in fer sorti ki nouvo ladministrasyon in pous dimoun dan travay e mon fek fer referans mon'n tann fer avek en madanm. Mon pa ankò war li ofisyel, me selman mon respekté sa alegasyon.

Me mwan a tou leka mon ava dir an 2020, konman en dimoun ki a latet – mon'n a latet en *Trade Union*, an 2020 Mr Speaker. I pa zistwar ki mon'n tann dan bor rigol dan semen.

An 2020 konbyen ka ki'n vin devan mwan konman en *unionist*? Bann senp manm fanmir, manman ki napa msye, zot napa en lakour, en msye pou ed zot - en manman lakour

ek zot zanfan. I annan msye osi ki'n ganny met a laport avek Ladministrasyon *LDS* ler zot ti fek pran lofis.

E mwan mon'n pran sa bann ka. I annan – i annan dimoun sorti *State House* Mr Speaker. Ansyen Prezidan Ramkalawan ti dir en fwa li i pa'n pous personnen letan in vini. Me ki ti arive? En ta dosye i vini anba lartik – dan *PSO 138*. Prezidan in pous sa bann dimoun avek sa bann *letter of termination 138* tire dan *PSO*.

Mon pran sa bann zafer mon'n anmenn kot *PSAB*. *PSAB* in tir lord in dir fodre rod en travay avek Sekreter Prensipal *State House* pour sa bann madanm. I annan sa bann madanm ziska ozordi zanmen *State House* in fer demars pou met zot dan en travay. Ki mannyer i apele sa?

(APPLAUSE)

HON GERRY SOPHA

Mr Speaker, bann Onorab lot kote latab, si zot le lenformasyon sa ki mwan mon'n dir, lenformasyon formel, konfirman, mon dir zot ganny an kontak ek mwan, mon pou ed zot akòz zot bezwen ganny ede.

Mr Speaker, nou pe dir poudir *hate speech* ti byen ler i

ti annan dan sa Lalwa avan. Mr Speaker, zournalis i koz lo Assumption. Zot dir poudir medya i 4enm pilye nou demokrasi. Zournalis i vin avek lenformasyon ki korek. Ki plis ki zot ti oule?

Prezidan sortan Mr Wavel Ramkalawan i dir i pa pare pou travay ek en medya ki'n anmenn laverite devan pep Seselwa ki li i ti pe kasyet. Ki i anvi fer ek sa nasyon?! Ki i ti anvi fer?

Ozordi *Stop Notice* in mete lo Assumption. Savedir sa ki Mr Volcere ti pe dir dan son zournal ti laverite. En dezyenm legzanp ankore mon a fer sorti la, i pe koz – i ti pe koz lo zournalis i anmenn fo lenformasyon pa bezwen ekout zot.

Mr Volcere i al dekouver bann gran *pickup* pe tir keksoz lo erport. Ler i tir portre zot anmenn li, zot sarz li. Ozordi ni en sarz pa reste lo Mr Volcere. Lakour pa'n war li koupab.

Vwala Mr Speaker kot *LDS* i merit ganny ede. Si zot in *fail*, se sa marsandiz ki zot in vann Seselwa ki Prezidan sortan, Prezidan Ramkalawan ti dir “mansonz i vann pli vit ki laverite”. E zot, zot in vann mansonz Seselwa...

(Interruption)

HON GERRY SOPHA

Prezan Seselwa in santi poudir mansonz pa en medikaman, o kontrer pe kontamin zot. Seselwa in prefere ganny zot lasante e zot in met *United Seychelles* o pouvwar!

(APPLAUSE)

HON GERRY SOPHA

Mr Speaker, i fasil pou *LDS* opoz tou keksoz ki Ladministrasyon *US* dirize par Dr Patrick Herminie ki'n montre i annan en a kalite konman en *leader* e person pa pou kapab *deny* sa. In montre i annan kalite konman *leader*.

Zot pou kontinyen opoz tou keksoz. Me nou, nou pou anmenn bann fe pou montre Seselwa ki la deor aköz tou sa ki Ladministrasyon Prezidan Herminie i anmenn la, la i pou fer zot lavi meyer, aköz atraver ou Mr Speaker, Onorab Georges in prononse ki wi, sa 43an ki la zot in amelyor lavi Seselwa.

MR DEPUTY SPEAKER

En minit Onorab.

HON GERRY SOPHA

Apre Mr Speaker, an terminan. Nou'n tann pa pou kapab travay ansanm par Onorab Savy, aköz ler ou ofans dimoun i pa fasilman efase dan dimoun.

Byensir, *US* in ganny ofanse dan 7enm Lasanble, atraver ou Mr Speaker, kot Onorab Gervais Henrie, mon krwar i absan ozordi, i ti dir la dan sa Lasanble Nasyonal ki zot pa le war *US* egziste. Zot le ki *US* i disparet.

Me ozordi *US* pa'n disparet. *US* in releve in debout pli for. E se sa zot douler ozordi Mr Speaker! Mon a remersi ou Mr Speaker.

(APPLAUSE)

MR DEPUTY SPEAKER

Mersi Onorab Sopha. Laparol Onorab Sathya Naidu.

HON SATHYA NAIDU

Mersi Mr Speaker. Bonzour zabitan Sat Louis ki pe swiv *sitting* Lasanble ozordi. Dabor, mersi pou sa sipor ki zot in donn mwan pou met mon isi dan Lasanble kot sa ki'n siport mon la, sa ki'n donn zot sipor atraver en vot napa enn ki mon'n bezwen aste pou mon kapab ariv kot mon'n arive.

E mon pran lafyerte ladan aköz, mon pran lafyerte ladan aköz mon onor bann provizyon legal dan Lalwa eleksyon. Dan konteks Sesel, in toultan annan en kiltir sa ki donn plis se ki li pou ganny elekte. Me selman lo sa kote latap lafason ki nou'n

travay pandan sa prosesis elektoral nou'n reste nou atase avek bann prensip legal.

E i annan serten prensip byensir i pa pou kapab vin avek okenn negosyasyon ler i konsern mwan. Lo sa size ki devan nou, *droit des expressions* i en laspe ki vremen enportan ki ede pou en pti avanse kot Lepep i ganny sans pou eksprim zot santiman lo nenport ki size.

E byensir, i bezwen ganny itilize dan en fason ki responsab baze lo travay ki'n ganny fer konzwentman avek en lorganizasyon enternasyonal akote Biro *Attorney Zeneral* pou avans nou demokrasi pli devan in annan sa lamannman sa Prozedlwa dan Kod Penal ki konsern *hate speech*.

E byensir, i idantifye diferan karakteristik ki asosye avek en endividi i kapab son ras, son larelizyon, son oryantasyon seksyel e lezot ankor. E zisteman, dan konteks Sesel nou'n azout afilyasyon politik. Aköz lafason ki nou kiltir li menm li i ete sak dimoun la deor i idantifye zot baze lo diferan kriter, i kapab lo baz relizyon.

Me dan konteks Sesel nou osi konsyan poudir ki afilyasyon politik osi i form parti lidantite en dimoun, e alors dan

sa konteks ki la prenon kont listwar Sesel dan li menm annou pa bliy bann rekomandasyon *TRNUC* kot in annan bann sizesyon ki'n ganny fer. E mon panse ki lespri par deryer afilyasyon politik ki'n ganny *insert* ki ozordi zour ladministrasyon- Ladministrasyon *US* i oule retire.

Annou pa bliye poudir ki dan zot *manifesto* zot in dir zot pe al aboli *hate speech* dan son totalite. E ozordi nou'n war poudir- zot in war poudir ki sa ki zot in pibliye i pa neseserman en keksoz ki zot pou kapab enplimante akòz dan lezot konteks i pou kapab *backfire*, zot in deside zis retir sa laspe afilyasyon politik.

San realize poudir ki i annan bann konsekans ki atase avek, bann konsekans ki negativ prenon kont listwar nou pei. Mon pa pe dir pou nou antre dan 43an, ouswa 45an, 48an, sa ki mon pe sey dir se nou bezwen retir leson lo sa ki'n arive dan lepass pou nou pa repet e fot ozordi zot kot nou'n arive.

E zisteman in annan en largiman konmkwa in ganny proteze koman en drwa Konstitisyonnèl, be zisteman dan sa konteks ki nou pe fer referans avek, si ou pe al dapre

drwa Konstitisyonnèl pou mwan personelman nou kapab dir ki *right to life* akòz *right to life* i *enshrined* dan nou Konstitisyon.

Be i vedir ki nou pa bezwen met *murder* koman en provizyon dan Kod Penal, nou konnen poudir be *penal offences* i en ekstansyon *it's an extension that where rights are violated to a criminal extent* e zot dwatet ganny pini.

E annou pa bliye dan sa konteks ki la, nou provizyon legal i oule ki ler i konsern bann diskour ki annan pou fer avek laenn ki osi promouvwar sa laspe *assault* i ganny kriminalize. Alors, mon pa war okenn keksoz mal e i bafwe mon pou dir ki i annan en pe largiman ki pe ganny avanse ozordi kot zot pe fer referans avek bann drwa ki'n ganny liste dan Konstitisyon.

Be zisteman an relasyon avek sa size ki la, *VP* ti'n fer en mansyon en ka, en ka ki'n ganny anmennen e mon panse ki zot pe dir ki politisyen pe itiliz zot, prerogativ ouswa zot pozisyon pou enfluyans bann Antite pou anmennen. Ditou, ditou kontrè tou bann dimoun ki'n anvoy bann mesaz apre ki sa lensidan in arive ki'n fer mon fer le neser koman e n sitwayen.

Annou pa regard afilyasyon politik ki limite senpleman avek politisyen me i aplikab pou tou sitwayen ordiner egalman la deor. E nou pa pou kapab toler serten keksoz dan nou lasosyete ozordi. Nou bezwen kapab debout pou sa ki byen, nou bezwen kapab debout kont sa ki mal e dir kote i mal.

Ou dwatet annan kouraz piu dir kot i mal, pa senpleman aköz i pa *politically correct* ki ou pa fer bann *statement* ki merit ganny fer pou asire ki nou elev nivo moralite nou pep. En komanter i kapab enstig en lot group, dimoun pou menm al bril batiman tou bann dimoun ki annan pou fer avek en ras spesifik.

Parfwa nou pa pe realize ki nivo ki i kapab arive ler en dimoun i alim en dife, ki mannyer i kapab propaze. E zisteman dan mon konteks aköz in anna non en dimoun ki'n ganny mansyonnen, mon pa pou la pli lwen ki sa aköz i ka i stil ankour aköz mon pa konnen si ladministrasyon dizour i pou enfliyans Biro *Attorney General* pou retir sa ka e lezot ankör.

Me selman i enportan pou fer resorti pou dir ki ler sa size in ganny anmenn devan in ganny anmenn devan lo baz

rasyal, pou annan pou fer avek ras. Napa naryen pou fer avek afilyasyon politik dan sa size ki la, e i enportan pou Lepep Seselwa analize aköz nou war.

E mon vreman apresye ki Mr Speaker, in kapab koriz en Manm atraver provizyon *Standing Orders* pou dir i pa ok pou maltret *Attorney General* dizour senpleman aköz son ras pou servi en bann parol pou denigre li. Be kote eski nou pou ale koman en Lasanble Nasyonal?

Byensir sa Manm ki la in ganny plase li avek en bi, pou maltret nou, in fer sa pandan 5an, in fer sa pandan 10an, *that's all he is there for*.

Pa pou kapab zanmen met son non ki en *ballot paper* aköz i *unelectable*, i *unelectable*, pa pou ganny elekte sa, pa pou zanmen ganny elekte. Aköz ler mon pas dan distrik St Louis, dimoun i annan komanter pe ofer konträr mon dir non, non, non respe li. I kapab annan diverzans an term lopinyon li selman annan respe pou li, pa bezwen nonm manman en dimoun.

Konträr sa parti politik ki o pouvwar ozordi zot lo *stage* pe aplodir ler en zenn onm pe servi en parol obsenn, sa dan li menm i montre ki kantite lespri

nou annan par deryer nou bann dirizan ki pe diriz Sesel ozordi.

Ou konnen i annan en ta Seselwa la deor pe regard keksoz de pre, pouvwar i pa zis dan lanmen bann dimoun ki'n ganny elekte, pouvwar i dan lanmen Lepep se tou le 5an atraver bwat vote zot pou koze. E byensir atraver leksperyans ki nou'n pas ladan nou'n retourn en kantite leson.

Be ou ti pou espekite ki zot osi atraver sa kantite leksperyans ki zot in pas ladan o pouvwar dan Lopozisyon zot pa pou repete menm fot, be get sa ki zot pe fer ozordi, ozordi wi, Sesel i divize.

Rikord- *I mean* rezilta eleksyon i demontre poudir en poursantaz for i ankor siport *LDS* e en poursantaz ki'n fer ki nou'n bezwen la dan en dezyenm *round* pou nou elekte dezyenm *round* nou'n bezwen ale pou elekte en Prezidan. Sa dan li menm i montre poudir ki Lepep la deor i annan en group zot ki siport nou ki krwar dan nou.

E i enportan pou nou osi egalman defann zot lentere pou asire ki zot pa pou trouv zot anba en rigol Mr Speaker. Rezon mon pe dir sa se aköz nou pa oule ki afilyasyon politik i ganny itilize koman en zouti

pou viktimiz nou bann ser ek frer.

Ou war dan *civil service* enn bann fot ki nou bann siporter in dir nou'n fer se gard sa bann dimoun ki la pou plizyer lannen, plizyer deseni nou'n gard zot la nou. Aköz nou ti vin lo slogan Sesel pou tou son zanfani ki ti'n mars anliny avek prensip ki fortman krwar dan egalite.

Mon ti'n tann Onorab Gill pli boner poudir zot in fer keksoz alors nou pe fer- nou pe vin fer parey dan en serten konteks, mon pa'n vremen konpran li e mon ti konpran li me e ti pe demann li be dir nou lekel ki nou'n viktimize dapre li, dir nou, mansyonnen bann non, met devan bann fe.

Aköz i annan en gran group dimoun la deor ki rekonnet poudir ki sa zafer ki apel Sesel pou tou son zanfani dan en serten sans la se sa ki'n fer ki nou'n tonm dan Lopozisyon, sa i santiman dimoun. Me a lafen dizour mwan mon fyer poudir nou'n debout akote bann prensip ki zis, ki nob.

E zisteman sa in aplik pou tou keksoz ki nou'n fer, *be it* donn lozman, *be it* donn later. E mon swe se ki sa *VP* ki pe asize ki'n pran sa portfolyo i ava anpese ki politik i ava ganny

itilize koman en kriter. Byensir zot, zot annan zot mazorite zot, zot pou fer sa ki zot annan pou fer zot pou *rubber stamp*.

Kantmenm i annan enn ou 2 Manm zour mon ti'n ganny ensilte par sa swadizan aktivis US, kot ler mon'n bezwen anmenn en ka zot in mesaz mwan personnelman pou dir *I'm sorry my brother for what has happened*. Savedir zot, zot menm dan zot konsyans pou zot, zot in rekonnet poudir sa ki ti'n arive i mal, selman ozordi nou ava regarde mannyer zot pou vote.

Mr Speaker, pou konklir mon annan sa pou dir;-mon oule fer resorti poudir ki lepep pou analiz tou keksoz ki pe arive, zot, zot annan pouvwar dan zot lanmen, selman si zot vin avek larogansite lo lafason ki zot krwar zot pou diriz sa pei, en keksoz ki nou kapab dir avek zot se nou, nou pou debout akote Lepep Seselwa.

Si i annan okenn dimoun menm si zot retir provizyon ki dan sa Prozedlwa ki pou ganny targete kot son lavi pou ganny menase, pa krwar ki Lepep Seselwa *will take it lightly*. Nou pou itiliz nou bann drwa, larestan drwa ki zot pe kit avek nou la, nou pou itilize pou fer sir ki nou fer tande nou lavwa.

Akoz sa nou'n toultan fer pou ariv kot nou arive, dan tou repriz nou'n krwar fortman *the rule of law* e nou pou servi bann mezir nesese pou debout akote Lepep Seselwa e i enportan pou Lepep Seselwa pa per. Nou'n ariv lwen pou anmenn sa demokrasi kot in arive ozordi kot en kantite dimoun in zwir sa benefis pandan letan kot nou ti o pouvwar kot dimoun ti kapab eksprim zot dan toudswit kalite fason.

Pa krwar pou annan okenn dimoun ki pou met en lafen avek sa aköz demokrasi Sesel i bezwen prospere, e si foudre nou desann nou desann.

MR DEPUTY SPEAKER

Terminen Onorab.

HON SATHYA NAIDU

Nou oule swiv bann prosedir legal pou fer en protestasyon nou a fer, kontrer Viktorya pou tro ptipti.

Si zot krwar, mon repete si zot krwar zot pou afeblir drwa nou an sitwayen e sa ki pe arive ozordi i en regresyon e mon swe se ki bann lorganizasyon enternasyonal e byensir in annan enn ou 2 ki ti'n mem ekrit mwan dan letan sa lensidan ti pe arive.

In menm annan plizyer Anbasader ki ti'n ekrir pou

eksprim zot senpati avek mwan. Mwan mon pou osi fer mon bout pou demontre zot aköz ki i enportan egalman pou medya silvouple desarz zot responsabilite dan totalite pou asire ki drwa nou bann sitwayen pa ganny afeblir e sa ki pe arive ozordi i anmenn gran sagrinasyon pou mwan personnelman, espesyalman avek sa bann ek nou pa ek nou.

Kontrer zot pe anmenn en lezislasyon nou a gete, nou a gete ki pou ou ganny met ladan, me selman ozordi nou vwar sa ki pei arive e dimoun la deor zot in ganny ase ek resiklaz, zot in ganny ase avek *the same old, same old* e pa krwar ki Lepep Seselwa pou tolere. Mersi.

MR DEPUTY SPEAKER

Mersi Onorab Naidu, laparol Onorab Uranie.

HON ROCKY URANIE

Mersi Mr Speaker. Bonzour VP ek ou delegasyon. Bonzour tou koleg Onorab, en bonzour spesyal pou tou zabitan Zil Pros ki a lekout.

Mr Speaker, atraver ou Onorab Naidu ki ti en Onorab ki ti dir li i pe anmenn en sanzman radikal dan sa pei, in dir i pa'n aste vot, li i pa aste vot mon pa konnen lekel ki aste vot. Me selman Onorab, zour eleksyon

ou ti a demann nou lekor ki i ti a pe rode Bel Air ler i ti fer aksidan ek en ta larzan dan transpor, pa ti pe al aste vot manke sa?

Ou konnen, Mr Speaker, sak fwa nou Gouvernman pe rod sa ki pli meyer pou Sesel, pe rod sa ki pli bon pou nou pep pou koriz bann lenzistis ki'n arive pandan sa dernyen 5an, *LDS* i toultan pe konplent e zot oule vin donn nou leson lo ki mannyer pou fer pli byen.

Nou pa konpran ki mannyer perdan i kapab montre gannyen ki mannyer pou fer pli byen la isi anndan. I annan en lot Onorab li Mr Speaker, sa enn mon pa konnen, li parey nou dir i pa oule mars apye sa i atraver ou Onorab Woodcock Mr Speaker.

Onorab Woodcock i enn bann *MNA* ki'n fer plis *hate speech* la anndan, lo nou sirtou ler i ti asiz lo sa kote latab. Preski menm landrwa la mon krwar kot mon pe asize la oubyen kot Onorab Gabriel i asize. Maltret nou kriminel, touy dimoun en bann zafer. Li i enn li, konmsi ou war sa lipokrizi ler ou war sa boug i la anndan i vin koze.

Ou konnen mwan mon enn ki *friendly*, preski tou bann Onorab laba i a dir ou kot mon pase dan *break* mon pou dir zot

en bonzour en alo. Onorab zis avan nou antre la anndan in pas obor mwan deor, dernyen er mon dir li bonzour ni en reponn, selman aköz i ti'n fini prepar en zafer pou li vin dir lo mwan la.

Ou konnen, mwan mon enn bann Manm ki toultan ti pe anmenn bann keksoz pozitiv pou Seselwa, nou zabitan sirtou zabitan Praslin e zabitan La Digue. Me sa Onorab li toultan i ti pe gognarde pe riye pe boufonnen avek plizyer lezot son bann koleg.

E i dir poudir li in ganny eleksyon 2 fwa, tre byen. Premye fwa wi mon krwar zabitan Grand Anse Praslin ti vot pou li, in fer son fot zabitan in pardonn li i dir *ok* i a donn li en dezyenm sans, e zot ti donn li en dezyenm sans. Sa boug i vin la i fer menm larogansite e menm zafer, me i bliye poudir trwazyenm fwa ki'n arive, trwazyenm fwa zabitan Grand Anse Praslin in dir li in ganny ase avek li e in fou li deor.

Me, me mon krwar i annan son sef ki anvi i perdi, son sef in remet li ankör, pou fer sir ki *LDS* i perdi plis sez dan sa Lasanble par remet sa Onorab ankör, pou vin fer plis larogans e kalonmni lo nou. Ou konnen, sa Onorab i pa'n aprann en lesön ditou, mon

krwar i ankör dan douler sa 397 vot ki zabitan Grand Anse Praslin in fou li avek.

I annan en sanson ki sante, ki yer mon ti pe ekoute par Raymond Libanotis. Ou konnen, i fer mon mazine sa Onorab i sanble i parey sa sanson i dir i en zonm ki ti pe al tyonbo pentard in ganny bate ek mal kannar.

Ou konnen, Mr Speaker, zot pe koz lo viktimizasyon 2020 kantite dimoun ki'n ganny pouse lalis i long, mon senpatiz avek sa bann ki- mon pa konnen mon napa levidans la devan mon la mon senpatize me selman lalis i long 2020 dimoun ki'n ganny pouse.

Lalis i long, Roma Edmond, Fabienne Palmir, Cindy Vidot, *you name it*, Josie Michaud Payet, lalis i long. Lalis i long, me sa bann dimoun in reste trankil. La ozordi nou tann en bann plennyman lot kote ki nou pa konnen ki zot pe rode.

Wi, nou pa pou bliy Mr Conrad Benoiton ki ti annan-mon pa konnen ki mannyer *tanker*, en gro *tanker* i disparet apre i re aparout zis pou fer leskiz pou pous en boug. Ou konnen, Mr Speaker, La Digue bokou dimoun dernyen er dan sa dernyen 5an ti'n preski pa kapab koze, ti annan serten

dimoun ki ti zis marse avek en *camera*, tir portre nenk raporte.

Dernyen er Digwa ti'n trankil, me selman granmersi nou ti la dan zot sipor pou donn zot sipor e Digwa ti'n devlop sa rezilyans pou fer sir ki zot kapab finalman vote, met sa Gouvernman deor pou zot kapab re ganny zot lazwa de viv. Digwa pa ti'n kapab eksplik zot-eksprim zot.

2016 LDS ti la li dan sizyenm Lasanble zot ti an mazorite, sa bann boug nou ti swiv *Facebook*, sa bann boug ti mont lo *Facebook* ti fer tou kalite. La ex-Prezidan Danny Faure ti anmase menm, me ki nou'n vwar apre?

Ler zot in vini 2020, i annan en bann ki vreman *petty*, zot, zot per kritik, alor zot ti deside taye, met sa zis pou protez zot, pou kasyet zot, e koman ou ti vini ou ti dir en keksoz nenk ou ti ganny arete, *search warrant* in arive kot ou, met dan kaso, ou konnen e zot ti anpese, ti anpese, dimoun ti'n per pou koze.

Me dimoun ti'n komans re ganny lafors pou koze, ler Dr Patrick Herminie in vreman montre son lafors US in komans vreman montre son lafors pou donn Seselwa sa kouraz sa konfyans pou koze e la dimoun in komans kapab reganny

lafors pou koze e santi ki zot en pti pe pli lib. E la ki nou'n ganny eleksyon, dimoun in pli lib pou koze.

E alors, sa Lalwa pe anmenn en pe plis lazistis pou Lepep Seselwa e osi latransparans. E sa Lalwa- sa lamannman i pe ede pou aforsi lademokrasi dan pei, pou donn dimoun sa *freedom of speech* pou zot kapab eksprim zot lekor, en keksoz ki zot pa ti kapab fer apre eleksyon 2020.

So alors, mwan mon pou donn mon sipor nou ladministrasyon pou sa lamannman anmenn par Vis-Prezidan Sebastien Pillay. Enn bann zonm ki ti laba lot kote latab kot Mr Onorab Georges i asize ki ti donn lanmen koz pou Seselwa, plenney sor Seselwa e ede pou fer ki Seselwa i ganny sa kouraz pou koze.

Me i annan ti'n ganny peye parey nou dir pou maltret li, atraver ou Onorab Georges li menm i enn ti dir la piblikman, ler i ti asiz la koman *Leader of Government Business*, nou, nou'n ganny peye nou, nou isi pou maltret zot, i get mwan. Ti ok avek sa li pou fer sa bann keksoz, ou konnen i annan tro bokou lipokrizi isi dan sa Lasanble sirtou bann Manm ki dan Lopoziyon.

So alors, mwan mon pou dir ki sa Lalwa ki sa Lalwa in vin a en bon moman, nou pa ni pe tay avek keksoz, me nou bezwen fer keksoz byen boner lo komansman pou kontinyen fer sa la demokrasi retournen an vi ki nou Lasanble i dir *serving a modern democracy*.

So, alor nou anvi ki an servan sa Lasanble nou annan sa pouvwar pou nou vin ek bann Lalwa ki pou donn ki pou ranforsi sa fer nou demokrasi vin bokou pli for.

Alors Mr Speaker, anba gidans nou Prezidan Dr Patrick Herminie e nou Vis-Prezidan Onorab Sebastien Pillay, nou, nou anvi ki Seselwa i ganny sa *freedom of speech* e Seselwa i vin pli ini me kantmenm sa nou war tou fason *LDS* pe rod tou fason pou anpese ki nou ladministrasyon i kapab inifye Seselwa.

Sa i pa pou zot premye mannev e i pa zot dernyen mannev, zot pou kontinyen rod tou fason aköz zot *leader* ki ansarz zot i kontan ler Seselwa i divize.

MR DEPUTY SPEAKER

Terminen Onorab.

HON ROCKY URANIE

Me nou, nou la pou fer sir, pou fer sir ki nou anmenn sa ki bon

pou Sesel, fer sir ki Seselwa i ini.

E alors, kantmenm Onorab Georges pe per bann envestigasyon, si napa naryen pou per, les lenvestigasyon pase, *trust the process*. Lenvestigasyon i ava prouve, i ava dir ki annan e Seselwa i a ganny lazistis nou ava war latransparans en keksoz ki *LDS* ti koz lo la bokou me zot pa pe pratike.

Avek sa 2 pti mo Mr Speaker, mon a dir ou mersi.

MR DEPUTY SPEAKER

Mersi Onorab Uranie. Laparol Onorab Labonte.

HON ANDY LABONTE

Mersi Mr Speaker. Mr Speaker, ou konnen pou mwan ler pe koz lo *hate speech*, i en keksoz ki pros avek mon leker e mon leker i fermal ler mon tann lot kote latab ki mannier zot pe koz lo la, konmsi pou zot ou a krwar i en komodite ki ou kapab aste dan laboutik.

Ler mon'n tann Onorab Rocky pe koz lo pentard, mon pa konnen kot i antre ladan, mon tann Onorab Sopha in koz bokou, in vin koz lo marsandiz osi kot i vini ladan mon pa konnen kot i antre, *I trust the process* sa ki Seselwa pe fer, nou pe *trust the process*.

Me selman ler nou pe *trust the process* Seselwa i anvi en keksoz ki i dan zot lavantaz e sa ki in ganny dir dan zot *manifesto*. Mon zis anvi port latansyon tou Onorab lot kote lo paz 3 program 1 ki koz lo liberte, program 3 aboli Lalwa *Hate Speech*. Sa i dan zot *manifesto*, ki i dir lo la? Aboli Lalwa *Hate Speech* pou amelyor e anbelir sityasyon laliberte lekspresyon.

Mr Speaker, i annan en proverb ki dir fot dibwa se dife ki tenny li, sa i en ta parol sa. E ozordi ler mon pe get ki zot in vin dir la, i konpletman diferan, ler in dir aboli *hate speech* la, zot vin avek en lot keksoz ki parey Onorab Naidu in dir pa sa ki zot in dir dan zot *manifesto* zot.

Savedir zot in fer krwar ek Seselwa poudir zot anvi aboli *hate speech* ki ti enkli sa Lalwa annantye. Me la ler in fini in dir poudir i anvi tir proteksyon politisyen, i pa politisyen li i Seselwa ki annan en parten an politik, ki ti arive le 5 Zen 1977 an montan kot ozordi nou annan en *TRNUC*.

Savedir mwan mon *ok* mon, mon parey mon labitid, anvoy tou mon anmase mon lapo mir, me sa pti Seselwa ki deor ki ler li i annan son lopinyon politik parey nou war

ozordi, ki mon leker i fermal Mrs Sarah Romain ozordi i ganny tire dan son pozisyon zis aköz son afilyasyon politik.

Savedir- e parey i pe ganny dir li i profesyonnèl dan son louveraz li i pa'n zanmen met politik dan son louveraz li. E, ler sa endividi ki li- mon anvi poudir Vis-Prezidan Sebastien Pillay i ekout byen sa, mon pe koz pou pep Seselwa, pou tou sa endividi ki la deor.

Eski en endividi ki annan son lopinyon pou li personnel savedir li i napa proteksyon li? I kapab ganny tire dan son louveraz i kapab ganny menase zis aköz i pa siport zot oubyen siport *US*, anba en pon, nenport ki fason ki i merite dan en rigol?

Me si sa Lalwa ti pe protez sa bann endividi pa nou politisyen non, fodre Seselwa i konn byen, pa nou ki pe ganny proteze se sa endividi ki la deor. Aköz li, li i annan drwa pou li annan en lopinyon politik personnel e koz li fran parey nou, nou'n lezot tou koze, si ozordi zot in vin o pouvwar se aköz nou'n donn zot laliberte pou zot koze.

E sa zabitan Larivyer Anglez i mazin byen sa e mwan mon pou kontinyen lager, mon en dimoun ki'n lager pou Drwa Imen mon pou lager pou Drwa Imen pou en sel rezon. Mon an

vi zot mazin sa tre byen silvouple, aköz, aköz zot anvi tir sa bout ladan?

Sa ki mon anvi Vis-Prezidan Sebastien Pillay i dir mon ozordi, aköz li ler i ti la anndan i ti koz nenport kwa nenport keler. Malgre i dir poudir Speaker pa ti les li koze, ozordi, ozordi nou kapab dir poudir nou annan en *LOTO* ki i respekt e kontrè i sivilize e i protez menm lot kote an menm tan.

E ler zot pa konn prosedir i ed zot tou, mon pwennvi se mon anvi Seselwa deor i konn en keksoz, sa Lalwa pa ti pe protez nou politisyen non, sa i en mansonz ki zot anvi fer krwar. Parey toultan zot in fer si zot in ganny eleksyon mon dir zot, zot in ganny li aköz mansonz ti vin laverite e ozordi Seselwa pe war.

E mwan mon anvi Seselwa i konn en keksoz, sa Lalwa ti pe protez zot aköz zot ana en lopinyon, mon kapab vin devan mon koze, aköz mon lopinyon politik mon kapab ganny anmenn Ankour *or whatsoever*, non. Me la prezan zot pe fer nou retourn kot nou ti ete kontan pase.

Parey mon gran manman ti dir mon kontan si ozordi mon sipòt sa parti ki la pa aköz mon pa kontan Albert Rene non,

aköz i annan bon prensip li mon krwar dan *LDS* ki pe met ladan ki mon anvi nou lazenes i konpran en keksoz, nou tou nou annan en drwa, afilyasyon politik, koz ki mannyer ou anvi avek respe selman.

Aküz si ou pa respe ou kanmarad, ou krwar ou kapab koz nenport kwa nenport keler ki mannyer ou anvi sa i mal. Mr Speaker, ler mon pe get laliny ki *US* i pe pran la konmela, mwan mon apresye poudir toultan mon pou dir Dr Patrick Herminie Prezidan Sesel i sorti Larivyer Anglez mon apresye, selman kot i mal mon bezwen dir.

Sa Lalwa ki la mon pe dir, silvouple nou pe retourn an aryer, e mwan mon'n lager mwan mon en dimoun ki'n lager pou sa Lalwa pou en santenn rezon, e mon pou dir *no turning back* parey mon ti dir lo komansman. E Onorab lot kote laba ki pe koze laba i konn tre byen mon bon dalon laba i bezwen konn en keksoz.

MR DEPUTY SPEAKER

Address the Chair! address the Chair, Onorab.

HON ANDY LABONTE

Wi Mr Speaker. Onorab Loze i koz bokou parler li, mon kontan ekout li, atraver ou Mr Speaker,

me selman i bezwen mazin en keksoz, zanmen mon'n war li in mont lo en poto elektrik son portre pou li ganny elekte.

I pa'n zanmen ganny elekte li, pou en sel rezon ou konnen aköz, aköz ler i vin la li i koz nenport kwa li, be nou, nou bezwen defann nou kons-nou, nou bezwen defann nou zabitan Larivyer Anglez parey mon pe defann mon.

E Mr Speaker, mwan mon anvi dir avek Vis-Prezidan, dir pep Seselwa aköz ou pa oule donn zot, zot drwa pou zot koze avek respe en lot si zot annan en lot afilyasyon politik? Aköz nou la dan Lasanble nou ganny proteze nou wi, be sa bann dimoun ki la deor zot dir mon oli zot proteksyon? Pou zot ganny tire dan en louvraz aköz zot pa krwar dan en prensip US?

Savedir nou pou retourn ankor parey in dir en *TRNUC* ankor, en *TRNUC*? Be Mr Speaker, mwan mon anvi zis en keksoz mwan, sel keksoz se ki Vis-Prezidan i bezwen dir nou aköz i anvi tir drwa Seselwa pou li- non, be aköz i enportan, nou bezwen dir non ganny mete la pou nou koz en keksoz nou, drwa nou pep.

Prezan si ou, ou pa defann ou pep sa i konsern ou e pou nou i enportan pou nou. E

mwan ki'n ganny elekte pou dezyenm fwa e-

MR DEPUTY SPEAKER

En minit Onorab.

HON ANDY LABONTE

Mr Speaker, sel keksoz ki nou pou dir se ki Seselwa i bezwen ganny proteze. Aköz zot pe tir sa bout, se Vis-Prezidan i bezwen dir nou sa. Mersi Mr Speaker.

MR DEPUTY SPEAKER

Mersi Onorab. Aprezan donn dernyen entervenon ki'n rezerv son drwa Onorab *LGB*.

HON SYLVANNE LEMIEL

Mersi Mr Speaker. Mr Speaker, mon ti a kontan dir en keksoz la, i annan bokou keksoz ki'n ganny dir ozordi lo tou lede kote lata, i paret mwan osi ki *LDS* bann Manm ki'n koze serten zot pe senm en bon pe konfizyon dan latet pep Seselwa la deor, e zot abitye fer sa.

Me selman si ou pou regarde i annan en keksoz ki Onorab Labonte in dir, ou konnen, si i annan en parti ki'n ganny eleksyon lo mansonz se lekel? Se *LDS*. Mr Speaker, si i annan en parti ki'n ganny eleksyon atraver mansonz se *LDS*. Mr Speaker, an 2020 zot tou zot ti ganny zot sans koze, nou ti ekout zot, les mon koze

silvouple mersi bokou, sak fwa mon pou koze zot tou zot pou fer tapaz.

Mr Speaker, ziska ozordi zot ankor pe koz mansonz, zanmen zot pou arete koz lalang, petet la nou kapab dir lalang prezan aköz i dan vokabiler Kreol. Aköz avan nou pa ti kapa dir lalang. Zot ankor pe koz lalang avek sa pep e sanmenm sa ou'n war zot i perdi eleksyon Mr Speaker. Aköz? Zot in anmenn en ta pake mansonz lalang ankor dan eleksyon 2025 la, sanmenm sa zot in perdi.

Annou aprann silvouple, nou'n tann koz lo podyonm, ler zot mont lo podyonm nou dir nenport kwa, i vre sa, sa mon pou dakor avek Onorab LOTO, mon pou dakor aköz li osi i mot lo podyonm laba ICCS i ti dir pa 2027 la zot pe al pran pouvwar, zot pou al monte *State House ok*, ki fason i pou mont *State House 2027* mon pa konnen. Me sa osi i en fason dir, ki ler nou mont lo podyonm nou dir nenport kwa avek nou bann siporter.

Mr Speaker, ozordi nou pe tann koz lo viktimizasyon, mon'n ganny en mesaz ki mon pou bezwen fer pase aköz sa manman, sa manman in dir mwan son leker i fermal ler i ekout Onorab Woodcock koze.

En pti moman, mon pou lir sa mesaz me selman mon pa pou nonm non sa dimoun.

“Madam good morning, I’m so angry ek sa Woodcock, ler LDS ti pous son piti kot SIB, zot ti dir li fodre i kit lofis by noon, pa ti sagrinan sa? I enportan konnen ki zot pe dir” Ok, sa i mesaz sa madanm ki'n anvoy kot mon.

Me ler ou regard sa bann problemm koumsa la, viktimizasyon dan travay, pous dimoun dan travay, i pa nanryen pou fer ek sa *Bill* sa, me in ganny monte ki nou bezwen fer sorti.

Zot pe pretan dir ki se *US* sa pli gro bebet ki annan ki pe pous tou dimoun dan Gouvernman, me ler *LDS* ti vin o pouvwar zot in pous sepa konbyen dimoun la zis get sa enn ki sa madanm in anvoye par midi, pa rod mon non, mansyonn non. Nou mansyonn non si nou, nou anvi mansyonn non *ok*.

So i fer ki- i dan ou distrik menm Onorab Sathya Naidu, i dan ou distrik sa dimoun, si ou ti marse ou ti vreman koz ek tou dimoun ou pa ti fer problemm ek dimoun tou le ou al devan laport dimoun ou ti a konnen lekel.

Mr Speaker, mon vin lo *Bill*. Mr Speaker, mon kapab

ganny en lape ek Onorab Satya Naidu, silvouple?

MR DEPUTY SPEAKER

Bann Manm silvouple. Bann Manm silvouple, Onorab *LGB* pe koze e letan tou Manm in koze mon pa'n tann li enteronp person mwan. Silvouple annou akord menm respe.

HON SYLVANNE LEMIEL

Mr Speaker, *VP* avek ou lekip, tou dimoun ki pe ekout nou osi mon dir zot bonn apre midi nou'n ariv midi 10.

Mr Speaker, sa *Bill* ki devan nou ozordi *Penal Code (Amendment) Bill 2025* pe propoz en amannman spesifik targete dan Kod Penal par afilyasyon politik, par retir afilyasyon politik lo lais karakteristik proteze ki aplikab pou *hate crime aggravation* e *hate speech provision*.

Lalwa kot *hate crime* i bezwen reste restren, vedir ganny enterprete parey i ete e osi dan en fason strik e tresi, e respekte bann lareg legal san okenn konpromi. Mr Speaker, sa Lalwa i sipoze protez endividi kont vyolans ki motive par lostilite anver bann karakteristik ki nou dir esansyel oubyen vreman personnel pa volontermen afilye politikman.

Ler Lalwa i etann lo afilyasyon politik e swa volonter e ekspresif i riske fer lalwa Kriminel rantre dan dezakor politik oule lalit lo a lostilite lo baz idantite. Okenn kad ki permet afilyasyon politik vin en rezon pou agrav responsabilite kriminel i anmenn en risk, en risk striktirel ki Lalwa Kriminel i kapab servi pou prosekut olye pourswiv en aksyon kriminel.

Mr Speaker, okenn Gouvernman pa devret ganny drwa servi Lalwa *Hate Crime* avek son sanksyon pli sever kont lekspresyon politik, parski sa ti pou totalman pa anlany avek sa garanti Konstitisyonnel ki nou annan laliberte lekspresyon.

Mr Speaker, vyolans, menas e *harassment* zot deza bann lofans kriminel e sa pou reste parey sa, an realite si nou regrade ozordi, Lakour i deza annan sa pouvwar kot i donn sanksyon e i pini bann dimoun ki pe fer *harassment*, ki pe anmenn menas, ki pe fer vyolans kont okenn dimoun.

Alors Mr Speaker, mon santi ki sa Lalwa *Hate Crime* li menm dan son konteks *political contestation* par retir afilyasyon politik koman en karakteristik proteze, sa Lasanble pe ranforsi nitralite Lalwa Kriminel, i

konsantre lo konportman san okenn enterferans politik.

E ler mon pe dir sa Mr Speaker, mwan mon krwar ki i vremen enportan aköz nou tou dan fason ki non koze nou pe senm serten doutans avek piblik la deor ki ou pa pou kapab koze, si i tir sa bout afilyasyon politik ou byen karakteristik lo lalis ou pa pou kapab koze.

I pa sa, tou dimoun i ankor annan drwa koze, tou dimoun i ankor annan drwa dir sa ki zot oule, la zot pe dir lo *Facebook* zot pe mete, maltrete toulezour i annan, ansyen Prezidan ti fer li, mwan menm mon mon'n pas ladan avek li.

So i fer ki Mr Speaker, nou pa kapab senm bann keksoz koumsa dan lespri dimoun la deor pou dir dimoun ki arr... sa Lalwa ki pe vini pou anpes ou koze, pou anpes ou isi laba i pa vre, i pa vre Mr Speaker e nou bezwen edik nou bann dimoun la deor.

E mon ti a kontan ki VPler i ganny son *right of reply* VP ou adres tou sa bann konsern, tou sa bann, mon kapab dir manson ki'n ganny dir isi dan sa Lasanble pou fer dimoun la deor pou met dan latet dimoun laba deor pou fer zot krwar ki zot drwa lekspresyon pe ganny retire ek zot ki sa i pa vre.

Alors Mr Speaker, mwan mo ti ava demann nou bann dimoun pou zot siport sa *Bill*, mwan mon krwar sa i en bon keksoz aköz sa *Bill* ti ganny fer ler ou gete zis serten nou lo kote politik ti krwar nou kapab ganny proteze anba la, tou dimoun i ganny proteze anba Lalwa.

Ziska ozordi mon redir ankor tou dimoun i ganny proteze anba Lalwa. Alors Mr Speaker, mon ti a demann Lasanble pou zot donn zot aprouvasyon pou sa *Bill*. Mersi.

MR DEPUTY SPEAKER

Mersi Onorab LGB. Bon, Lasanble pou pran son *break*. Zis an pasan, Komite IAC pou zwenn imedyatman apre la dan *Committee Room 3*. Lasanble pou *adjourn* e i pou rebran 2er apre midi avek *right of reply* VP. Mersi.

(BREAK)

MR DEPUTY SPEAKER

Bon, mon a dir bonn apre midi tou Manm e tou bann dimoun ki pe swiv nou. Nou ankor lo *Penal Code (Amendment) Bill, 2025*. E la nou pou al ekout larepons Vis-Prezidan lo deba ki ti annan bomaten. Vis-Prezidan, ou *Reply* i a ou.

VICE-PRESIDENT SEBASTIEN PILLAY

Mersi Mr Speaker e mersi ankorenn fwa pour loportinite ki mon'n gannye pou prezant sa Prozedlwa devan Lasanble Nasyonal.

Mersi bann Manm pour zot bann lentervansyon e mon ava komans mon Drwa De Repons baze lo bann diferan entervansyon ki'n pase devan Lasanble depi bomaten.

Mon ava rekonnet ankorenn fwa *Leader* Lopozisyon e *Leader* Zafer Gouvernman e osi tou bann Manm Lasanble. E en bonn apre midi spesyal byensir pour tou dimoun ki pe swiv e ekout deba ozordi apre midi.

Mr Speaker dan sa Prozedlwa ki nou ti'n prezante parey mon ti fer kler bomaten, i en sanzman vreman miner me avek en lenpak oubyen avek en konotasyon ase serye ki ou ti pou anmenn avek li en deba enteresan e en deba neanmwenn lo sa size, parey nou ekspekte ki Lasanble Nasyonal i fer.

Nou'n prezant sa Prozedlwa dan lespri e program ki nouvo Gouvernman i le antreprann an relasyon avek bann mezir ki nou le pran.

E dan sa konteks enn bann mezir sete pou retir sa karakteristik proteze, e sa se

political affiliation an sa ki konsern nou seksyon 5 nou Kod Penal e fer ki sa i pa vin en *aggravated offence* ler en dimoun i fer en lekspresyon an relasyon avek sa.

Mr Speaker mon'n ekout bann lentervansyon bann Manm atantivman e nou'n fer en zefor pour not zot bann diferan pwen lentervansyon, e ou ava permet mwan pou pas enn pti pe dan sa bann lentervansyon, zis pou ede pou ou konpran pou edifye sa deba. Me osi pou eksplik Lepep Seselwa la deor aköz nou pe ganny sa deba.

Mr Speaker, i enteresan - enteresan ki mannyer toultan lepase i en form bann size ki nou le al avek devan. E lepase byensir i donn nou bann leson, ki pour nou pa repete oubyen parfwa osi bann legzanp ki nou kapab servi pour nou amelyor keksoz e fer li vin pli byen.

Me si nou reste fokalize dan lepase, e nou reste fokalize lo sa ki kote negativ dapre nou perspektiv lo lepase, souvandfwa pour nou bouz devan i vin ekstrememan difisil. I vin difisil aköz nou prezan regard lefitir avek en lizye lepase, e sa pa anmenn nou pou anmenn solisyon, me plito pou konsantre lo problem. E si nou kontinyen konsantre lo

problemm, byensir nou pa zanmen war solisyon pour lefitir.

Sesel i bezwen bouz devan. Sesel i bezwen avanse e nou bezwen war en lot lapros. E la nou pe koz en lapros demokratik lo ki mannyer nou eksprim nou lekor.

Deba ozordi lazournen in santre otour sa size karakteristik politik, me in debord osi dan lezot size. Lezot size ki ti napa nanryen pour fer avek sa Prozedlwa li menm. Me byensir sa i konteks en deba dan en Lasanble Nasyonal, aköz apre tou se en Lasanble Nasyonal ki fer en deba politik.

Malerezman oubyen erezman, mon pa en Manm Lasanble Nasyonal e mon ti ava'n kontan partisip dan sa deba dan mon perspektiv. I ti ava annan serten keksoz ki mon ti a kontan dir.

Par egzanp, ler mon'n ekout Onorab Romain si mon ti pou ekout li e mon ti pou sey reponn li an relasyon avek son *statement* dimoun ki'n ganny viktimize aköz politik, mon ti a kapab ouver plizyer *file* ozordi kot *MLH* kot dimoun in ganny viktimize aköz politik. Me mon pa en Manm Lasanble, alors mon pa pou fer li.

Mon ti a kontan osi koz lo plizyer ka ki pa'n ganny adrese

atraver bann proze dezas ki ti'n ganny met devan, aköz zisteman sa bann dimoun ti annan en lot kouler politik depi 2023. Me mon pa pou fer li aköz mon pa en Manm Lasanble.

Mon ti a kapab koz osi lo fer vin fer vin en zouti pour lafreyer dan plas kontrol, sa size i enteresan Mr Speaker.

E la mon pou zwenn avek Onorab Rocky Uranie, wi i vre ki lo La Digue plizyer dimoun ti per pou eksprim zot lekor, aköz si non zot aplikasyon pour en *buggy* pa ti pou ganny aksepte. Zot aplikasyon pour lasanm zot *quest house* pa ti pou ganny aksepte. Bann keksoz ki ti pe arive e ki lo rikord e ki lo bann *file*. Ankor enn fwa, mon pa en Manm Lasanble, mon pa pou fer li. Mr Speaker, retir karakteristik politik dan sa Lalwa pa pou fer ki okenn dimoun ki anvi partisip dan en deba politik pa pou kapab eksprim son lekor.

Sa ki nou bezwen ekspekte se ki nou sosyete in evolye, e savedir poudir nou bezwen osi evolye avek letan. Fodre pa ki nou reste fikse tou le 5 zen 1977, aköz si nou al lo largiman le 5 zen 1977, alors *US* pa ti devret retourn o pouvwar.

Me malerezman, Lepep Seselwa in ekout program *US*, in vwar poudir program *US* i

pli bon. E se pour sa rezon ki *US* ozordi i annan en mazorite dan Lasanble Nasyonal e ki son Dirizan Dr Patrick Herminie i ozordi Prezidan Larepiblik Sesel.

(APPLAUSE)

VICE-PRESIDENT SEBASTIEN PILLAY

A sa pwen Mr Speaker, mon le fer en keksoz tre kler. Premyerman, personn pa pou anpes *US* konstrir lakaz kot lakaz i devret ganny konstri. Personn pa pour anpes *US* fer semen kot semen i devret ganny fer. Personn pa pou anpes *US* ed en endividi ki dan bezwen aköz i bezwen ganny ede, ki swa aköz son politik, ki swa aköz okenn lezot keksoz.

Mon'n zwenn ase dimoun pandan tou dernyerman pandan ki mon'n pran sa pozisyon pou konpran poudir menm si en dimoun i *LDS* i annan pour li kontribye dan sa pei. Menm si en dimoun i *US* i annan pour li kontribye dan sa pei.

E a sa pwen si i annan en desizyon ki'n ganny pran par en *Board*, par en antite pour en rezon kelkonk pou retir en dimoun dan sa pozisyon ki i ti ladan, nou ava espere pou vwar

ki leksplikasyon ki ganny donnen pour sa desizyon.

Me selman, e la mon met sa devan zot tou la anndan, si sa dimoun pa ti en relasyon avek en Manm Lasanble oubyen en dimoun o plase, eski sa dimoun son *case* ti pour ganny menm drwa regar parey nou pe donnen ozordi? Larepons i non.

(APPLAUSE)

VICE-PRESIDENT SEBASTIEN PILLAY

E la Mr Speaker avek tou leskiz ki mon annan pour Lasanble, mon pou dir en *statement* politik. Aköz ler *LDS* ti annan en mazorite zot ti sourd lo tou dimoun ki ti ganny met deor dan Gouvernman avan.

Ni pour defann. Ni pou debout akote. Ni pou dir en parol an faver sa bann dimoun. Aköz zot tou zot ti pe siport sa ki zot Gouvernman pe fer.

Prezan Mr Speaker, annou koz lo rikord, aköz nou'n koz lo rikord sa Gouvernman aktyel ki pa pe fer e pa pe delivre lo sa ki i pe fer.

Mr Speaker, rikord i anmenn nou pou vwar ki *State House* ti'n annan en *breakdown* konplet lo lafason ki lord e lerarzi (*hiérarchie*) Gouvernman i fonksyonnen. Lo enn bann lofis pli o dan sa pei, ti pe *act*

koman en garaz. E nou annan levidans pou prouve.

Pyès pe ganny aste lo non *State House*. Pe ganny fer vini lo non *State House*. E menm loto dezyenm men ki'n fer vini ki swadizan ti bon, ozordi i bezwen retourn garaz akòz pa bon.

E ler kestyon ti ganny demande e *LDS* ti an mazorite enkli Onorab Andy Labonte, *micro* ti ganny koupe, larepons pa ti ganny donnen, larzan ti pe pas lanmen e ozordi Gouvènmàn i lo loto dezyenmmen ki pa bon. Sa i rikòrd ki nou'n anmase.

Nou pa le koz lo la akòz nou pa le fer politik, me zot in obliz mwan ozordi apre midi pou reponn serten *statement* ki zot in fer par lefe ki zot anvi al dan serten direksyon, e i enportan pou met keksoz o kler.

Mr Speaker, Onorab Bernard Georges i dir nou, nou pe retourn nou pei an aryer. Olye retir *hate speech* nou devret pe anmenn linite e tolerans dan nou pei.

Be Mr Speaker plizyer dimoun in anvoy mwan *video* kot madanm Twomey ti pe ganny maltrete deryer en *pickup*. Oli Onorab Georges sa letan sa gran defender la demokrasi, pour li vi dir anmenn plis latolerans?

Pourtan, sa enn son tre bon koleg.

En lot keksoz se ki pandan son *statement* an antye, eski zot konnen konbyen fwa Onorab Georges in konnekte *hate speech* avek sitwayen ordiner? Zero fwa. Eski zot konnen konbyen fwa Onorab Georges in konekte *hate speech* avek politisyen? 4 fwa. Savedir i montre ou lentansyon Gouvènmàn avan sete zisteman pou entrodwir karakteristik politik anba sa Lalwa pou protez politisyen.

(APPLAUSE)

VICE-PRESIDENT SEBASTIEN PILLAY

E la nou annan rikòrd Mr Speaker, akòz ki nou'n fer, nou'n pran letan pour nou pas dan tou sa bann *speech* e not lamazorite bann komanter ki'n ganny fer. Mon pour kontinyen Mr Speaker akòz i enportan pour nou met keksoz o kler.

Eski Prezidan ti promet pou tir *political affiliation* oubyen *hate speech*? Ou konnen, mwan en keksoz ki mon'n aprann se ki Prezidan Sesel ozordi i enn bann dimoun pli brav e pli kouraze ki annan. Rezon mon pou dir sa Mr Speaker se akòz?

(*Interruption*)

**VICE-PRESIDENT SEBASTIEN
PILLAY**

Aprè ki nou, nou'n fer en *meeting* resaman avek bann devlope Assomption, nou'n *find out* poudir ti annan lentansyon pou zot anmèn 1400 travayè lo Assomption.

(*Interruption*)

**VICE-PRESIDENT SEBASTIEN
PILLAY**

Menm si *Planning* ti'n donn en *approval* pou zis 500. Dezyenmman, ti annan lesey - ti annan lesey pou fer *flight* direk Assomption ki'n arive e ki sa Gouvènman ki la pe anpese.

(*Interruption*)

**VICE-PRESIDENT SEBASTIEN
PILLAY**

Trwazyenmman, *jetty* lo Assomption pa'n zanmen ganny fer an relasyon avek bann rekomandasyon ki ti met an plas pou biodiversite, olye devlope ti pe demann en *slipway*. E ziska ozordi napa en *core* dan Biosekrite akòz sa bann devlope zot lentansyon sete al fer *snorkling* dan lagon Aldabra.

Alors Mr Speaker, ler zot kòz nou lo rikòrd e zot kòz lo

travay ki zot in fer, petet demann zot lekor ler zot ti pe defann zot Gouvènman lekol ki ti pe asize e pe fer sa bann desizyon lo zot par? Ki benefis zot ti pe gannye pa lo zot par e ki ti pe arive apre sa? Akòz apre tou Mr Speaker, i kler ki poudir Seselwa ti'n vremen ganny anbete an 2020.

En lot keksoz ki enteresan dan sa ki'n ganny dir Mr Speaker par Onorab Georges, in dir nou les lapolis ek Atorni Zeneral fer zot luvraz dan plas tir sa *clause*. I byen. Me i enteresan ki Atorni Zeneral in swazir pou fer son luvraz an relasyon avek zis serten endividi.

Sa ki pli enportan pou mwan Mr Speaker se eski enn bann lofis pli o dan pei pe fonksyonnen alaoter ki i devret pe fonksyonnen? Par egzanp zot a kontan konnen i annan byento bann lenformasyon ki pou sorti, lekip Sesel ki'n al negosye aletranze in fer serten progre an relasyon avek *grey listing* Sesel.

Me eski sa ki pe arive pa osi poz en risk ozordi dan nou pei akòz travay ki pa'n ganny fer par ladministrasyon avan pou rezourd en kantite demann pou *mutual legal assistance* ki zot pa'n fer nanryen pou dil avek Mr Speaker?

Sa Gouvernman avan in en *failure* e en *complete failure*. E malgre zot pou dir mwan *otherwise*, kot mon'n asize e partou kot mon'n regarde, in annan en *breakdown* konplet dan lerarzi (*hiérarchie*) Gouvernman lo ki mannyer travay i sipoze ganny fer.

Par egzanp Mr Speaker, yer menm Prezidan in pran an men en size ki'n arive English River kot bann dimoun ti pe lager avek gran kouto e nou'n deplway *SIA* pou al rod mezir pou ed Onorab Andy Labonte avek bann sitwayen English River pou kapab bar sa landrwa, me osi propoz en alternativ semen.

Me eski zot konnen ki kantite letan Onorab Labonte pe lager sa size avek son Gouvernman? Preski pandan tou son manda i pe lager sa size e personn pa'n oze fer nanryen pou ed Onorab Labonte. Pourtan son Gouvernman ti enn ki ti pe fonksyonnn dapre zot a en tre o nivo.

Mon al en pe pli lwen Mr Speaker. Plizyer proze lakaz ki swadizan ti pe bouze e kot bann kontrakter ti an retar lo sa bann proze, eski zot konnen konbyen let Gouvernman avan in ekrir sa bann kontrakter pou fer zot konnen poudir zot an retar e

komans bouze lo proze Gouvernman? Zero.

Se sa Gouvernman ki'n konmans kosyonnn bann kontrakter. E la mon lans en lapel piblik pour zot ki si zot an retar lo proze Gouvernman, nou pou rebran sa bann proze ek zot e met dan lanmen kontrakter ki kapab fer li.

(APPLAUSE)

VICE-PRESIDENT SEBASTIEN PILLAY

Faver pou donn dalon proze in fini. Proze Gouvernman i bezwen ganny fer aköz Seselwa i ekspekte *delivery*. Mr Speaker, sa ki mon'n tande ozordi dan sa Lasanble i montre mwan klerman ki nou annan en Lopozisyon ki demode, depareye e dekonekte. Trwa rezon prensipal;

Enn, demode aköz zot in bliye ki model politik zot pou servi konman en Lopozisyon. Zot pa konnen si zot pe vini oubyen si zot pe ale.

Dezyenmman, depareye aköz zot napa en *leadership* kler kote ki pou anmenn zot e kan zot sipoze fer.

Ler enn i dir en keksoz lo politisyen dan Lalwa, lot i dir en lot keksoz an relasyon avek en lot provizyon Lalwa. Dekonekte, levidans i la. Dekonekte aköz

zot le sel le sel mazorite, mazorite ki'n perdi vot Lasanble e prezidansyel dan eleksyon. Sa i montre ki mannyer Lepep Seselwa in ziz zot performans.

Mr Speaker mon'n vin dan sa Lasanble pou rod en deba serye lo en Lalwa ki ase serye e konsekan. E rezondet pour nou fer sa bann sanzman dan sa Lalwa ti enn ki tre senp. Se ki nou pe dir avek ou, ou pa kapab donn politisyen en proteksyon adisyonnell.

Wi, i annan en largiman ki kapab ganny avanse pou dir sa proteksyon ti pour tou sitwayen. Me, lefe ki se politisyen ki fer determinasyon e kontrol Lalwa se pour sa rezon ki i danzere pour en sitwayen pou donn sa pouvwat dan lanmen en politisyen. Mon pou eksplike aköz.

Mr Speaker nou a rapel sa fame ibou. Be eski zot ti konnen poudir ibou apre in redir tou bann *server* ki ti annan ki montre lo ou bann *bodycam* kwa ki'n pase.

Tousala in ale. Kot in ale? Tou dimoun ki ti pe fer lentervansyon avek ibou ozordi pa konnen ki ti pe pase. Mon pa ti la, mon pa konnen, mon pa okouran.

Tou dimoun i annan *selective memory* ozordi lo ki bann lopeasyon zot ti pe fer. I

paret poudir ti'n ariv en staz dan nou pei kantonnyen ti pe kontrol sef. Ti'n vin en dezord total.

E tou dimoun ti *busy* pe *enjoy* zot lekor, kan Onorab Arissol ti pe kanpanny dan son distrik, kan li Onorab Georges ti pe kanpanny dan son distrik, demande ki son bann Gouvernman ti pe fer *State House* sa bann letan? Sa ki zot bezwen met an tet.

Now, mwan mon'n vin dan sa Lasanble e mwan mon fer kler, mon pa pour swazir ki kouler politik ki en dimoun i annan. Mon'n zwenn mon lofis avek bann *staff* ladan, tou *staff* dan mon lofis i ankor la. Personn pa'n ale.

Tou travayer ki travay dan mon lofis i ankor la pe fer zot louvraz. Sa ki mon demande e egzize avek zot se ki zot delivre e reponn lapel piblik e Lepep Seselwa.

Mr Speaker, annou montre ki mannyer *case* en dimoun i kapab vin en *case* politik. Resaman en madanm ti ekrir mwan, mon kapab nonm son non, aköz son *case* i relevan, Brina. E i ekrir mwan e mon al rod son *file*. Mon ouver son *file*, tou komanter ki zot in mete dan son *file* se; '*bring up file*', '*review file*', '*bring up file*', '*review file*' a leksepsyon en

dimoun ki'n met en komantr poudir sa madanm i devret ganny asiste. In ariv en moman kot son *file* i perdi en kou tou.

Mon pran sa *file* personnelman mon desann avek kot *MLH*, mon met tou dimoun *management* asize e mon get tou komantr ki zot, zot in mete.

Now, finalman sa *file* i ariv kot sa ansyen Minis apre tou sa letan. Tou sa letan personn pa kapab pran en desizyon? E zot dir mwan zot ti pe byen travay, e zot *still* war rezon pou defann sa kalite performans dan en Gouvernman? Nou annan en problem.

Now, si mwan mon osi mon vini mon fer parey mon repet lepe, *then* foutkwa Lepep Seselwa in met nou o pouvwar?

Mr Speaker pandan sa bann dernyen letan mon'n zwenn plizyer dimoun ki zot fanmir i *LDS*, ki zot paran i *LDS* zot paran i US. Ou konnen ler sa bann dimoun i koz ek ou lekel ki pe koz ek ou? Se en Seselwa, pe enport ki zot konotasyon politik.

Nou'n fer sa size politik atraver zot Parti *LDS* vin en size polarizasyon, ziskan zot al menm fer en moniman san demann permisyon dimoun pou met zot non lo en moniman, e

apre dir zot pa ti pe kree divizyon dan sa pei.

Si nou annan divizyon ozordi Sesel lo en baz polarize lo politik, se gras pa en lot parti, se gras a parti ozordi ki trouv son lekor dan Lopozisyon.

Me, nou pa kapab reste lo la. Zot reste Seselwa apre tou, zot bezwen travay ansanm, nou bezwen rod en fason pour nou avans pli devan.

Me sa ki enteresan Mr Speaker - e mon vwar kot keksoz i pli dekonserteran, se ki ler nou regard serten keksoz ki'n ganny dir ankore par bann lezot Manm, e mon pou fini avek sa ki Onorab Georges in dir avan mon al pli lwen.

On konnen Mr Speaker, konman *Leader* Lopozisyon dan Lasanble mon ti aprann en keksoz byen vitman. Ki sak sourir ki Onorab Georges i fer ou, i kasyet en zoure par deryer.

Akoz apre ki in sourir avek lot kote latay, i pa'n zis denigre zot, in denigre nou Prezidan par lefe dekrir nou Prezidan konman en dimoun ki zisteman pa konnen ki i pe fer.

Selman Dr Patrick Herminie i le sel dimoun ki pe propoze pou anmenn en *Fair Administrative Act* dan sa pei ki pe ganny drafte, e koz i en Lalwa konplike, e i pou le sel Prezidan ki pou pas en tel Lalwa

dan sa pei pour enn fwa fini
avek sa zafer ek nou pa ek nou!

(APPLAUSE)

**VICE-PRESIDENT SEBASTIEN
PILLAY**

E mon pou annan gran plezir
Mr Speaker donn en lasirans sa
Lasanble ki enn bann premye
Lalwa ki pou pase lannen
prosenn se sa *Fair
Administration Act*. E mon ava
lanmenm la Mr Speaker pou dir
ek Onorab Georges; “Onorab, *I
told you so!*”

En lot keksoz enteresan
Mr Speaker ki'n ganny dir, e sa
mon pou - mon bezwen reflesir
lo la avan mon koze aköz en
dimoun in dir nou ti *SPPF* e
nou'n sorti aköz nou'n anvi fer
pli byen. Wi, ou ou'n sorti ou'n
ale, be en kantite *LDS* in vin
SPPF. *Ok*.

E sa ki enteresan, ozordi
ou pe asiz lo en mazorite dan ou
distrik ki ou'n gannyen avek *a
US* ki'n vot pour ou, mon krwar
e *a LDS* ki'n vot pour ou, me
selman ou pe perdi ou limilite
koman en *MNA* par adopte
serten pratik ki pa anliny avek
ou personnalite.

E ou vin fer en deba dan
Lasanble kot ou koz lo dimoun
pou disparet parey avan aköz
zot lapartenans politik. Be ler
ou ti *SPPF* savedir i ti *ok* ler

dimoun ti disparet aköz zot
lapartenans politik? Aköz mon
pa rapel dimoun disparet sa
letan!

(Interruption)

**VICE-PRESIDENT SEBASTIEN
PILLAY**

Alors, si rabase ti en lar e i ti en
dimoun i ti debout pou marse,
Onorab Roucou ou ti pou apel
rabase aköz ou pa konnen ki ou
dir.

(Interruption)

**VICE-PRESIDENT SEBASTIEN
PILLAY**

Malerezman Mr Speaker, zot
obliz nou koz koumsa aköz nou
pa kapab kontinyen avek en tel
kalite deba e pa eksepte poudir
nou pou ganny kritik an retour.
Nou pa zis la pour nou sibir, me
nou la pour sey edike e edifye
keksoz ki pe pase.

Lesansyel otour sa deba
sete eski zot dakor ki nou tir
karakteristik politik oubyen
eski zot pa dakor? Be dan sa pa
dakor mon vwar menm Onorab
Woodcock in ariv menm pou fer
kestyon lo Manm ki lo mon
panel.

Mr Speaker, annou
aksepte poudir bann Manm
panel ki la devan zot pa bann
politisyen, zot bann teknisyen.

E zot in teknisyen pandan letan ki'n annan ansyen Minis e zot pou teknisyen probableman ler mon ale.

Sa bann dimoun i bezwen annan en respe. Lekel ki pe mank respe pour sa bann dimoun ler zot, zot pe fer komantr lo sa bann dimoun? *Shame on you!*

(Interruption)

VICE-PRESIDENT SEBASTIEN PILLAY

Be prezan nou zis vini nou vin koz nenport kwa, nou pa dir gran keksoz, be selman ekspekte poudir sa ki nou'n dir i en form deba dan lafason ki sipoze enformen. Kestyon ti senp devan nou. Si nou tir *political characteristic*, eski i pou annan en lenpak lo endividi la deor?

Non, i pou napa en lenpak! En dimoun i a dir ou si – Onorab Georges i dir nou si en dimoun pe koup ou ek en gran kouto, i dir ou mon pe koup ou aköz ou *US*. Mazin byen, in nonm zis *LDS*. Mon pe koup ou aköz ou *US*.

Savedir li pour li, si ou pe koup en dimoun aköz i *LDS* i pa *ok*, me si ou vin koup en dimoun aköz i *US*, i *ok*. Ou largiman i bezwen ouver ou lespri pour ou konpran keksoz

pli byen. I bezwen konpran keksoz pli byen. *Ok*.

(Interruption)

VICE-PRESIDENT SEBASTIEN PILLAY

E ler nou pe koz lo legzanp Mr Speaker. Ler nou pe koz lo legzanp Mr Speaker, nou pe koz lo legzanp, nou le donn legzanp kot nou koz si en politisyen in dir ou pou al fini anba en pon, eksetera.

Mr Speaker, ou konnen, ler nou ti vin dan Gouvernman enn bann pli gro problem ki bann etidyan sorti lo zil ti pe dir nou se ki lo premye zour ki zot sorti lo zil pour zot al Mahe, zot paran i ganny difikilte aköz i bezwen aste tou keksoz pour zot.

Prezidan ti dir, be annou rod en solisyon pou donn zot *at least* en keksoz *one off* pour zot fer. Pandan 5an ki zot in la konman *LDS* zot pa'n zanmen kapab war larzan. Sa pa ni kout en milyon.

En desizyon in ganny fer *overnight* e Prezidan pe fer sir poudir sak etidyan ki kalifye pou al lekol Mahe sorti lo zil i ganny li en *displacement allowance* R2mil pou ed sa paran pou ed li avek bann depans ki annan pou fer. Sa i apel en Prezidan!

(APPLAUSE)

VICE-PRESIDENT SEBASTIEN PILLAY

Sa i apel en boug ki gard son parol! Nou pe koz *long service allowance*, Prezidan i asize i dir be *ok*, be nou pe koz Gouvernman pou rann *long service allowance*. *What about* bann travayer *PUC*, bann travayer dan bann *SOEs*?

Nou telefonn *PUC*, koz ek *PUC*. *PUC* i dir i kapab abzorbe dan son Bidze, en desizyon i ganny pran par Prezidan, *PUC* osi pou pey sa *long service allowance*. Sa i apel en Prezidan!

(APPLAUSE)

VICE-PRESIDENT SEBASTIEN PILLAY

Mr Speaker, nou al devan nou koz lo bann gratwite e nou koz lo bann dimoun ki lo kontra ki'n perdi zot *performance allowance* lo kontra. *Ok*.

Prezidan i dir be *ok*, sa lannen nou pe pey trezyenm mwan alor zot pa pe ganny zot *performance allowance*. Nou bezwen vwar si bann ki kapab gannye i ava ganny zot trezyenm mwan *as part of* zot *allowance*. Sa i apel en Prezidan!

(APPLAUSE)

VICE-PRESIDENT SEBASTIEN PILLAY

Napa fer *file*. *Bring up file*. Retourn *file*. Fer *file*. Mon pran en desizyon konman Prezidan *and it is acted upon* e i ganny *dealt with*. Sa en Gouvernman.

I *call* mwan i dir mon English River nou bezwen rod en fason pou bar sa landrwa aköz sa sityasyon i deplorab. Nou rod en fason pou konmans bare. *MNA* in konmans met an plas son striktir pour li koz ek bann dimoun pou fer bann dimoun konpran. Annou propoz fer netwayaz dan sa bann landrwa. I konn byen li. Sa i apel en Prezidan!

(APPLAUSE)

VICE-PRESIDENT SEBASTIEN PILLAY

I konn byen li. Ou pare pou koz lo sa ki sa msye in fer dapre sa ki i dir ou mal, be sa ki i fer i byen, ou pa pare pou koz lo la.

(Interruption)

VICE-PRESIDENT SEBASTIEN PILLAY

I enteresan sa en, e Lepep Seselwa pe ekoute la deor.

Mr Speaker, i annan lezot size ankor ki mon kapab met devan Lasanble par egzanp, plizyer proze lakaz ki pe ale vini, ale vini, pa ankor al *procurement*.

Prezan i dir, be annou pran en desizyon, nou al *selective tendering*, nou bouze, nou fer ale. Nou pran en desizyon, bouz sa bann proze *to selective tender*. *Selective bidding*. Annou rod kontrakter fer sa bann proze lakaz. Sa i apel en Prezidan!

(APPLAUSE)

VICE-PRESIDENT SEBASTIEN PILLAY

Lesansyel pour nou se pa regarde si sa bann keksoz pou benefisye ki US, ki LDS, akòz i pou annan zanfàn ki sorti lo zil ki zot paran pou US, ki zot paran pou LDS.

I annan travayer dan bann SOEs ki US, ki pou LDS. I annan travayer Gouvènmàn ki lo kontra ki US, ki LDS, Prezidan pa enterese avek pou swazir mon a donn sa enn, i pa a donn sa enn. In donn TOU dimoun parey. Sa i apel en Prezidan!

(APPLAUSE)

VICE-PRESIDENT SEBASTIEN PILLAY

Alors, ler i dir avek nou ki i le anmenn en *Fair Administrative Act* pou tir “ek nou, pa ek nou” dan *public service, mes amis*, se sa en vre Prezidan!

(APPLAUSE)

VICE-PRESIDENT SEBASTIEN PILLAY

Legacy sa Gouvènmàn US i wi, i pour sa Gouvènmàn ki pou inifye sa pep e pour sa enn Gouvènmàn ki'n anmenn sa pep ansanm. Me zot in anmenn konsiderasyon personnel e zot endividi e i enportan pour nou adres sa bann konsiderasyon personnel.

Kestyon ki nou bezwen demann nou lekor; ozordi nou, nou pe propoze *advertise* sa bann *post* an relasyon avek bann landrwa kot apwentman i bezwen ganny fer. *But at the same time*, Lasanble Nasyonal i bezwen konpran, Lepep Seselwa i bezwen konpran.

Pa kapab annan en manm piblik ki son lakaz in brile ki'n sipoze al *meeting* apre *meeting*, apre *meeting*, apre *meeting* e pe espere, e naryen pa ankor ganny fer. Eski sa i normal? Sa pa ti apel en Prezidan.

Eski i normal pou etranze vin dan nou pei *dictate terms* lo bann kontra ki zot pou dir nou ki mannyer zot pou fer e zot ki

pou dir nou ki pou fer dan nou pei? Sa pa apel en Prezidan laba. Sa ki apel en Prezidan se ler i dir mon met en *Stop Notice* akòz ou pa pe respekte regilasyon e Lalwa dan mon pei.

Mes amis, se sa vre, vre definisyon en Prezidan! Sa boug ki'n kapab pran sa desizyon.

(APPLAUSE)

VICE-PRESIDENT SEBASTIEN PILLAY

Alors, mon pa krwar Lepep Seselwa i bet pou krwar lizour pour aswar. Lepep Seselwa i konn tre byen ki deba ki'n pase dan sa Lasanble.

Sa Lalwa ti ganny met an plas wi, pou protez politisyen e mon ti la dan Lasanble ler i ti pase sa zour. E zot rapel ki nou ti ganny dir? Nou ti ganny dir sa Lalwa i bon, i pa bon, nou pou pas li, akòz nou annan kwa? En mazorite. Ozordi mon pa'n fer okenn sa bann komanter, ni fer okenn sa bann konsiderasyon. Sa ki mon'n dir met devan Lasanble en deba serye akòz sa Lalwa i devret pase e akòz i devret fer sa lamannman.

Akòz fodre zanmen ankòr en dimoun i ganny trennen tire kot li, *CID* i vin fouy kot li i pran son telefonn, teroriz son fanmir zis akòz in apel Prezidan en non

oubyen zis akòz in fer en komanter lo *Facebook*.

Nou pe koz retourn dan lepase. Lafason ki nou'n retourn dan lepase pandan sa dernyen 5an pou sok bokou zot la annan. E i annan *file* ki si nou ouver i annan zot pou sorti lo zot sez pou tonm ater.

Mr Speaker, wi i pou annan lenvestigasyon partou. Wi nou pou rode ki'n arive. Wi nou pou *find out* kwa ki'n pase e wi nou pou oule konnen akòz nou'n pey plizyer etranze plizyer milyon Roupie pou fer plizyer travay ki zanmen nou'n war rezilta lo la.

Sa i normal akòz nou en Gouvernman serye akòz sa sete larzan Gouvernman, larzan *taxpayers' money* Seselwa. Enkli *taxpayers US*. Enkli *taxpayers LDS*. Lesansyel pour nou ozordi se rod ki mannyer nou bouz devan. Plizyer Seselwa pe rod loportinite, pe rod konsiderasyon pour zot bouz devan.

Wi, enn bann konsiderasyon se ki nou aret protez politisyen dan en fason serye. *Overnight* Mr Speaker, nou pe koz protez politisyen. *Overnight* Prezidan Herminie in pran en desizyon pou koup bann alawenns palto. Sa i apel en Prezidan.

(APPLAUSE)

**VICE-PRESIDENT SEBASTIEN
PILLAY**

Alawenns ledan. Sa i apel en Prezidan. Alors, nou bezwen konpran en keksoz Mr Speaker.

Ozordi – ozordi *as we speak* bokou *public servant* i pli kontan travay aköz zot konnen kote zot pe ale. Zot konnen ki manner zot travay i sipoze ganny fer e zot konnen ki direksyon zot bann antite pe travay ladan.

Se sa ozordi ki pe arive dan nou pei. Se sa larealite ki pe arive. Me sel keksoz ki annan se ki si ou annan en dimoun ki le met retar travay en Gouvernman, byensir ou bezwen pran ou en desizyon. Swa ou vin en baryer pour progre, swa ou vin en led pour progre. En desizyon fondamantal ki ou bezwen pran.

Akoz sa ki nou nou'n remarke e nou tou ki in al devan laport dimoun tou le Sanmdi sa ki nou'n war se ki i annan bokou nou ser ek frer la deor ki pe *struggle*, ki pe soufer, ki pe esper soutyen, ki pe esper en led e ki nou bezwen anmenn sa kot zot.

Nepli annan letan pour nou vin fer bann konsiderasyon e bann gran, gran *speech* dan

Lasanble Nasyonal e ekspekte sa pou fer tol sa madanm ki pe koule anler Beau Vallon aret koule. Ekspekte poudir sa problem sa madanm ki anler dan leo Mamelles pou sanze. Sa ki nou bezwen fer se adres sa bann problem.

Ozordi nou pa kapab ganny en sityasyon kot en Proze *Waterloo* ki fek ouver pa ni menm lan i devide parey en pannyen e keksoz dimoun i mouye ladan.

Taler la apre midi Mr Speaker, mon annan *meeting* avek sa bann kontrakter pou *find out* ki manner sa sityasyon in evolve. Ki kalite *monitoring* ti annan. Tousala i montre ou Mr Speaker, ki nou bezwen annan en lanfaz ki ganny mete e en regard lo travay ki sipoze ganny fer pour endividi e pour dimoun.

Mon pasyon Mr Speaker se travay pour mon pei, pa pour endividi. Mon pasyon se travay pour mon pep e mon pei premye. Sa Lalwa ki la pa ti dan faver mon pep e pa ti dan faver mon pei. E mon pe propoze ki Lasanble i retir li.

Sa ki pa le retir li e vin en baryer pour progre, kontinyen vin en baryer pour progre. Sa ki le reste dan son *mode* pa konnen kot i ete, si i dan Lopozisyon, si i dan

Gouvernman, reste dan son *mode*. Me pei i bezwen bouz devan.

Mon pa pou dir ou parey ou, ou ti dir mwan ki lisye i abwaye, karavann i pase. Mon pa ni en karavann e ou pa ni en lisen. Mon en fonksyonner piblik, mon travay dan Gouvernman e mon bi se travay pour nou pei.

Alors Mr Speaker, avek sa mon dir ek Lasanble annou donn Sesel en meyer Lalwa, annou donn Seselwa en meyer *service delivery* e annou tou travay pour sa saler ki nou gannnen, aköz apre tou se Lepep Seselwa ki pey nou saler. Mersi Mr Speaker.

(APPLAUSE)

MR DEPUTY SPEAKER

Mersi VP pour ou *right of reply*. Prezan nou pou pran en vot lo merit sa *Bill*. Nou pou demann tou Manm ki an faver merit sa *Bill* pou lev lanmen pou vot. Tou Manm ki kont?

Vot lo merit lamannman dan *Penal Code (Amendment)*, 2025 i konm swivan; 16 Manm in vot pour, 13 Manm in vot kont e 0 abstansyon, ki vadir ki vot lo merit *Bill* in pase.

(APPLAUSE)

MR DEPUTY SPEAKER

Nou ava prezan Madanm Clerk pou fer en *Second Reading* lo la.

MADAM CLERK

Mersi Mr Speaker. “A *Bill for an Act to amend the Penal Code*”. Mersi Mr Speaker.

MR DEPUTY SPEAKER

Mersi Madanm Clerk. Nou ava prezan bouz lo Staz Komite. Mon a demann *Chairman Bills Committee*, eski nou annan lamannman lo – *Bills Committee*, eski i annan okenn lamannman avan nou bouz dan Staz Komite?

Anvi ki napa lamannman nou ava *skip* – nou pou *skip* Staz Komite. Nou a demann LGB pou fer Mosyon pour *Third Reading*.

HON SYLVANNE LEMIEL

Mr Speaker, mon bezwen al lo staz sot komite.

MR DEPUTY SPEAKER

Wi, wi, pou *skip* Staz Komite.

HON SYLVANNE LEMIEL

Mr Speaker, anba *Order 97(1)* mon demann ou permisyon pour mwan *move* pou sispann *Order 70* ziska *75* pou sot Staz Komite. Mersi.

MR DEPUTY SPEAKER

Manm ki segonde?

HON AUDREY VIDOT

Mosyon i ganny segonde Mr Speaker. Mersi.

MR DEPUTY SPEAKER

Nou a pran en vot lo Mosyon pou *skip* Staz Komite. Tou Manm ki pour? Manm ki kont?

Lo Mosyon pou sot Staz Komite anvi ki nou napa lamannman, 16 Manm in vot pour, 0 in vot kont e i annan 13 abstansyon ki fer ki Mosyon pou sot Staz Komite in ganny aprouve. Nou ava prezan bouz lo Mosyon pou fer *Third Reading*.

HON SYLVANNE LEMIEL

Mersi Mr Speaker. Mr Speaker, anba *Order 76(1)* mon *move* ki *Penal Code (Amendment) Bill, 2025* i ganny lir pour en Trwazyenm fwa. Mersi.

MR DEPUTY SPEAKER

Segonnman, Onorab Vidot?

HON AUDREY VIDOT

Motion seconded Mr Speaker. *Thank you.*

MR DEPUTY SPEAKER

Nou ava pran en vot lo Mosyon pour fer *Third Reading*. Tou Manm ki pour? Manm ki kont? Abstansyon? Lo vot pour

Formal Third Reading Penal Code (Amendment), 2025 - 16 Manm in vot pour, 4 ki'n vot kont e 9 in *abstain*, ki vedir ki vot lo *Formal Third Reading* in aprouve. Mon a demann madanm Clerk prezan pou fer *final formal reading*.

MADAM CLERK

Mersi Mr Speaker. "*This Act may be cited as the Penal Code (Amendment) Act 2025*". Mersi Mr Speaker.

MR DEPUTY SPEAKER

Mersi Madanm Clerk. I reste prezan pour mwan dir mersi Vis-Prezidan pour *Bill*. Nou pou annan sanzman lo *panel* mon krwar, non? Vis-Prezidan endik nou.

VICE-PRESIDENT SEBASTIEN PILLAY

Non.

MR DEPUTY SPEAKER

Pou reste parey?

VICE-PRESIDENT SEBASTIEN PILLAY

Yes.

MR DEPUTY SPEAKER

Ok. Bon, avek sa nou pou pran en pti *technical break* pou *allow* Madanm Speaker pou retourn dan *Chair* ki pou prezid lo sa lot

Bill ki pou vini. Nou a donn en 10 minit *technical break* pour nou retournen apre. Wi. Mersi.

(Technical Break)

MADAM SPEAKER

Bon, mon ava dir bonn apre midi tou Manm. E bonn apre midi Vis-Prezidan.

Nou ava prezan pran dernyen *item* lo nou azanda ki *Public Persons (Declaration of Assets Liabilities and Business Interests) (Amendment) Bill*, son *Second Reading* e vi ki 7 zour pa ankore pase nou pou bezwen en Mosyon pou- Onorab Lemiel.

HON SYLVANNE LEMIEL

Mersi Madanm Speaker. Bonn apre midi Madanm Speaker avek tou dimoun a lekout.

Madanm Speaker, anba *Order* 97(1) mon demann ou permisyon pou mon *move* pou sispann *Order* 69(1) pou permet *Public Persons (Declaration of Assets Liabilities and Business Interests) (Amendment) Bill*, 2025 i ganny lir en Dezyenm Fwa malgre sa peryod 7 zour depi son *First Reading* pa ankore pase. Mersi.

MADAM SPEAKER

Onorab Vidot.

HON AUDREY VIDOT

Mosyon i ganny segonde Madanm Speaker. *Thank you.*

MADAM SPEAKER

Nou ava pran en vot lo Mosyon. Tou bann ki annakor. Mersi, okenn Manm ki kont? Bon, lo kekyon ki nou sispann *Order* 69(1), 16 Manm in vot *for* avek 14 in *abstain*. Nou pou alors demande pou ganny en Mosyon *for Second Reading*. Onorab Lemiel.

HON SYLVANNE LEMIEL

Mersi Madanm Speaker. Madanm Speaker, anba *Order* 69(2) mon *move* ki *Public Persons (Declaration of Assets Liabilities and Business Interests) (Amendment) Bill*, 2025 i ganny lir pou en Dezyenm Fwa. Mersi.

MADAM SPEAKER

Onorab Vidot.

HON AUDREY VIDOT

Mosyon i ganny segonde Madanm Speaker. *Thank you.*

MADAM SPEAKER

Mersi. Minis, mon ava demann ou pou prezant *Bill*, silvouple.

VICE-PRESIDENT SEBASTIEN PILLAY

Mersi bokou Madanm Speaker. Bonn apre midi Madanm

Speaker. Bonn apre midi tou Manm Onorab. Mon rekonnet *Leader* Lopozisyon, *Leader* Zafer Gouvernman, ankor enn fwa e tou dimoun ki a lekout.

Madanm Speaker i fer mon gran plezir pou prezant sa Lalwa lo *Public Persons (Declaration of Assets Liabilities and Business Interests) (Amendment) Bill*, 2025, ouswa Lalwa Deklarasyon bann Byen pou bann dimoun ouswa bann zofisye piblik devan Lasanble.

Madanm Speaker, sa Lalwa i anliny avek bann prononsman ki Prezidan Dr Patrick Herminie in fer e osi bann komitman dan tou sa premye 100 zour ki in mete ki nou bezwen pase.

Mon ti a kontan fer kler Madanm Speaker lo komansman ki sa bann prononsman i pa zis bann prononsman politik, me i bann prononsman pou anmenn plis latransparans dan le mezir ki i enn bann pwen enkontrolab ki ti ganny diskite pandan plizyer lannen.

E mon dir plizyer lannen Madanm Speaker, avan ki sa Lalwa ti vin dan son fason ki i ti vin devan Lasanble an 2021 e avan sa osi ler i ti vin dan son form orizinal Mr- Madanm Speaker.

Madanm Speaker, le 30 Septanm 2021, Gouvernman LDS sa letan ti enakte lamannman pou retir lobligasyon legal ki ti egziste dan Lalwa Deklarasyon bann Byen bann Dimoun dan o lofis piblik pour ki zot pa pou bezwen deklar okenn byen ki zot ganny mete lo zot bann manm fanmir e pros e zot zanfan.

I enportan a sa pwen Madanm Speaker, pou mwan aret en pti moman e petet eksplik Lepep Seselwa ki lenportans sa i annan.

Si nou al lo en baz latransparans Madanm Speaker, enn bann keksoz ki ti toultan ganny demande depi lavansman *multi party politics* oubyen politik miltiparti dan nou pei sete ki bann dimoun ki pran bann o fonksyon piblik, savedir ki swa Minis, Prezidan, Vis-Prezidan, Minis, *MNA* e bann lezot o fonksyon piblik i pou annan en *commitment* lo zot pou deklar zot bann byen. Premyerman.

E dezyenmman osi deklar bann byen ki vin lo zot bann konzwen oubyen zot bann zanfan. Rezondet deryer sa se akoz in annan en lager asarnen anmenn par *Leader* Lopozisyon sa letan ki ti Onorab Wavel Ramkalawan ki apre i vin

Prezidan, pou annan zisteman sa provizyon dan Lalwa e fer li pase vin dan Lalwa.

Sete alor avek bokou lantouzyazm ki ler sa Lalwa ti vini pandan letan ki Mr Ramkalawan ti sa letan *Leader* Lopozisyon devan lasanble ki zot ti pas sa Lalwa avek provizyon pou fer ki bann zofisye piblik a sa nivo pou deklar zot byen e osi bann byen zot konzwenn e zot zanfan ki depan lo zot.

Parkont, an 2021 to annan en *complete reversal* lo la, Prezidan Ramkalawan ki ti sa letan Prezidan- *former* Prezidan Ramkalawan ki ti Prezidan sa letan ti *then* fer en sanzman e propoz en sanzman devan Lasanble Nasyonal ki ti ganny aprouve par mazorite devan Lasanble ki fer ki zot ti retir sa drwa, sa lobligasyon plito anba Lalwa pour ki bann konzwenn e bann zanfan, bann zofisye piblik i deklar zot bann byen.

Prezan Madanm Speaker, pou nou *going forward*, nou santi ki koman en Gouvernman ki i nesesser pou anmenn plis latransparans ki nou entrodwir sa provizyon dan Lalwa e fer ki i vin en lobligasyon pou fer sa deklarasyon.

Akoz, enn lo en kote i ede pou montre ki Gouvernman e

bann dimoun ki pou form par dan Gouvernman savedir le 3 brans Gouvernman ki ava enkli Zidisyer, Lasanble Nasyonal, stasyon pli o latet Egzekitiv pe montre en pli o nivo transparan e *accountability* parey ti'n espekte ler premye Lalwa orizinal ti pase.

Ki nou pe dir ler nou *mean* par en konzwenn oubyen en dimoun pros avek sa dimoun? Lalwa i prevwar ki i bezwen annan en definisyon pou sa ki nou apel en *member of sa immediate family*.

Nou definisyon ki pe ganny entrodwir anba Lalwa i se ki anba, an sa ki konsern en *immediate family* an relasyon avek en zofisye piblik sa i ava enkli son *spouse*, ok. Okenn zanfan biolojik oubyen adoptiv ki anba laz 18an, oubyen okenn zanfan biolojik oubyen adoptiv ki li i depan antyerman lo sa zofisye piblik irespektiv son laz.

Mon fer kler la a sa moman Madanm Speaker, aköz sa pwen in ganny mete dan Lalwa, se zisteman pou prekonize parey largiman in deza ganny avanse dan lepase ki si en dimoun in ariv 18an e i pe komans ganny son prop travay, totalman diferan, totalman ki napa okenn relasyon avek travay sa zofisye piblik *then* sa dimoun i annan

drwa pou li fer son travay parey Konstitisyon i permet li pou li fer e si i pe zwir serten keksoz i byen pou li zwir sa bann keksoz.

Parkont Madanm Speaker, sa i bezwen ganny met lo rikord. I pa fer sans pour ki si ou annan en pozisyon o nivo e ki ou konzwen oubyen ou zanfani i zwir atraver sa privez ki ou pa *held accountable* pou sa privez ki ou zanfani oubyen ou konzwen i gannnen.

I neser pou nou met sa lo rikord Madanm Speaker. Mon konnen in annan largiman ki'n ganny avanse ki si kont prive en dimoun i son kont prive, me selman si sa kont prive atraver travay ki ou sa Zofisye Piblik ou fer i pe ganny larzan *then* i pou neser wi ki i annan en deklarasyon byen e par se sa ki Lalwa pe anmennen pou nou fer.

Mon note Madanm Speaker, ki atraver bann diferan *leak* an sa ki konsern bann papye par egzant *Mossack Fonseca Papers* oubyen *Panama Papers* ki dan *offshore* dan bokou ka in ganny vwar ki ler i annan bann politisyen se bann zanfani sa bann politisyen menm anba laz ki ti detanter zot bann *shares* oubyen bann akizisyon ki zot in

fer atraver bann *offshore companies*.

Savedir sa i en fason ki zot in servi pou kasyet zot bann byen lo zot zanfani e lo zot konzwen. Set alors ki i pou neser alors ki pei i *reset* pandil a ler, vi ki nou pe al ver en lapros annan plis *accountability* met an plas bann striktir neser pou asire ki tou dimoun i konfor avek bann provizyon Lalwa pou nou zisteman met an plas sa striktir.

Prezan Madanm Speaker, lekel ki mon pe dir ler mon pe koz lo en zofisye piblik a sa nivo? Savedir i pe dir okenn dimoun ki dan servis repiblik pa averti son eleksyon lo non Lofis Prezidan, Vis-Prezidan avek Lasanble Nasyonal apwentman koman en Minis e osi pou enplik tou bann *public persons* i ganny liste anba premye *schedule* sa landrwa.

Madanm Speaker, i en pe enteresan ki dan zot lamannman zot pa'n retir definisyon e *agent* e zot bann *cross associate* savedir ler LDS ti fer sa lamannman zot pa'n tir bann azan e bann *cross associate* i lozik alors si ou kapab met ou fanmir pros akfer ou pou al met lo ou zanmi.

Madanm Speaker, sa retir sa provizyon Lalwa dan mon

lopinyon ti enn ki ti byen kalkile me ki pa ti neseser. Ti enn ki ti retourn nou an aryer e ti enn ki ti retir latransparans ki ti egziste dan Lalwa orizinal. Si ozordi apre midi okenn Manm Lasanble i vot kont sa Prozedlwa mesaz ki zot pe pase la deor se ki zot pa krwar dan latransparans e ki zot pa krwar ki i devret annan en deklarasyon byen pou bann konzwen e bann zanfann bann dimoun ki dan servis piblik.

Sa ki reste kler Madanm Speaker, lefe ki Gouvernman avan ti menm entrodwir *passport* diplomatik pou bann *spouse*, bann *public persons* i montre ou alors Madanm Speaker, ki in annan lentansyon pou donn serten privez sa kategori dimoun, i donn lentansyon alors Madanm Speaker pou vwar ki zot ava entrodwir serten privez pou sa kategori dimoun pou fer ki, sa i fer ki i ava annan lezot benefis ki ava *accrue* avek Madanm Speaker.

Sa provizyon ti ganny entrodwir Madanm Speaker an relasyon ek *passport* pou ban zofisye pli o dan pei e non pa pou bann *MNA*. Madanm Speaker, sa Lalwa ki ti vin an fors an 2016 sete Gouvernman *US* sa letan ki ti anmenn li me i

ti ganny sipor mazorite Lasanble Nasyonal.

Enn bann premye Lalwa ki Gouvernman *LDS* ti fer pou- ti sanze ler zot ti'n vin o pouvwar sete zisteman provizyon dan sa Lalwa. Alors Madanm Speaker, ozordi i enportan e i enteresan ki i ava en mazorite Lasanble ki i annan *US* ladan ki pou probableman vot an faver sa Prozedlwa avek sipor en lopozisyon ki konpri avek *LDS*.

Madanm Speaker, mon lentrodiksyon in enn ki kler e tre senp, lefe ki nou retourn sa Lalwa parey i ete i pou anmenn plis transparans e pou donn plis konfidans Lepep Seselwa dan sa ki Gouvernman i fer e asire ki bann zofisye piblik i konform zot lo en pli o nivo konportman e osi ganny *held to a higher standard of accountability* parey lezot dimoun i ganny fer.

Nou bezwen realize Madanm Speaker, ki atraver travay ki nou, nou fer, nou la pou fasilite travay ki tou lezot dimoun i fer, mon met devan Lasanble Nasyonal Madanm Speaker Lepep Seselwa ki lamazorite politisyen ki dan en lofis i pa vreman kontribye oubyen kre nouvo larises pou pei, sa ki nou la se dirize, zere, *manage* e fer marse pei.

Se sa bann ki kre larises deryer nou ki annan en lekspektasyon ki nou, nou servi sa ki zot met dan nou lanmen pou kapab fer pei mars pli byen avek. Alors, nou bezwen alaoter sa konfyans ki sa bann dimoun in fer nou.

Madanm Speaker, mon ava aret la, mon ava donn Lasanble Nasyonal loportinite pou fer zot deba lo sa size, mon swete ki nou ava kapab ganny ankor enn fwa en deba plito pli kordyal ki la dernyen fwa e ki sa fwasi nou ava kapab ganny en larepons ki ava anmenn nou ver trouv bann solisyon si zot annan solisyon pou sa size,

Sa ki reste pou nou vwar Madanm Speaker, se si eski tou sa ki non koze pandan plizyer lannen an sa ki konsern latransparans, la demokrasi e louvertir laliberte lekspresyon e menm asire ki piblik i konnen kwa ki pe pase i ti zis bann parol dan vid oubyen i ti bann parol ki vreman serye.

Mon a soumet sa Lalwa avek Lasanble Nasyonal Madanm Speaker pou son laprouvasyon e mon ava ekout deba e apre nou ava donn bann larepons nesesser an relasyon avek bann prononsman ki bann Manm i ava fer. Mersi Madanm Speaker.

MADAM SPEAKER

Mersi Vis-Prezidan. Deba zeneral i prezan ouver lo *Bill*. Okenn entervenans? Onorab Larsen.

HON CECILE LARSEN

Mersi Madanm Speaker. Bonn apre midi a tous, spesyalman zabitan Au Cap ki a lekout.

Madanm Speaker, avek sa lamannman nou Gouvernman pe remet Sesel lo en semen latransparans, bon gouvrenans e responsabilite piblik. En semen ki ti'n komans byen me ki malerezman ti'n ganny detournen an 2021.

Sa *Bill* ki devan nou ozordi i pa zis en pti lazisteman teknik, non, i pe re etabli prensip, preparasyon en lerer ki ti'n ganny fer e en ranforsman bann valer ki tou sosyete demokratik modern i swiv lentegrite e latransparans finansyel bann dimoun ki dan servis piblik.

Ler *Public Persons (Declaration of Assets Liabilities and Business Interests) Act of 2026* ti ganny adopte, son lobzektif ti kler, protez lentere piblik, anpes koripsyon, anpes anrisisman ilegal e elimin konfli lentere. Sa Lalwa ti demande ki bann *public persons*, depite, Minis, *PS*, *CEO*, bann parastatal e lezot i deklare zot prop byen, zot *liabilities*, me osi byen ki

lenter e biznes zot *spouse* e bann manm fanmir ki depan lo zot.

E sa pti keksoz tou dimoun i konnen, par egzanp si ou anvi kasyet larzan ou pa pou met li dan ou prop kont, se pour sa rezon ki bokou pei dan lemonn i demann deklarasyon fanmir osi pou anpes kasyet byen par entemedyer, sa ti bon gouvèmans.

Malerezman Madanm Speaker, an 2021 sa Lalwa ti ganny amande e zot ti retir obligasyon pou deklare byen, *liabilities* ek lenter e biznes pou *spouse* ek *immediate family members*.

Sa desizyon ti fer ki bokou dimoun ti perdi konfyans, i ti ouver laport pou bann dimoun kasyet byen dan non lezot. I ti de balans sistenm latransparans e i ti vin kont sa Lalwa orizinal 2016 e Lepep Seselwa i konnen sa ti en move amannman.

Sa *Bill* ki devan Lasanble ozordi i enportan akòz i pe fer 2 keksoz fondamantal, i pe re entrodwir definisyon *members of immediate family* e klarifye *liabilities*. Sa i pou asire ki napa okenn dout lo ki manm fanmir ki bezwen ganny enkli dan deklarasyon e ki kalite det oubyen responsabilite finansyel ki bezwen ganny fer piblik. I pe

amann seksyon 8 pou remet obligasyon deklarasyon fanmir.

Sa i re entrodwir latransparans total parey Lalwa ti'n demande an 2016 e napa okenn *public person* ki pou kapab kasyet byen dan non son *spouse* oubyen en zanzan ki depan lo zot, e sa i protez lenter e piblik e anpes labi pouvwar.

Madanm Speaker, *good governance* pa zis en slogan politik, i en kondisyon nesese ki pou kre konfyans dan sistenm pou fer en bon klima lenvestisman se pou asire ki bann ki nou swazir pou servi pei pe fer li avek lentegrite.

Kan en *public person* i ken ki son byen e pou son fanmir pou ganny deklare i pou pli konsyan lo son konportman e responsabilite. Sa i agrandi konfyans dan servis piblik e redwir risk koripsyon e anrisman ilegal e desizyon ki ganny pran pou lenter e personnel.

Aprè tou Madanm Speaker, koripsyon i toultan antre par kot i pli fasil, e nou pa sipoze pe kit en trou lot sa i fasil. Madanm Speaker, sa i osi fer ki ler ou al lo bann platform enternasyonal dimoun i vwar nou koman en pei ki serye lo *rule of law*.

Nou ekrir bokou rapor lo *transparency*, *antimony laundering e financial integrity*, me eski nou pou pe *walk the talk*? Si nou Lalwa domestik pa reflekte sa bann prensip? Sa *Bill* i anmenn nou lo menm nivo avek bann pei ki annan bann sistenm deklarasyon fanmir ki solid parey Moris, Sidafrik e *UK*. Sa i fer Sesel en pei ki annan kredibilite politik ekonomik e diplomatik.

Madanm Speaker, ler en dimoun i dan pozisyon piblik, son fanmir osi i dan en pozisyon ki kapab ganny afekte par sa pouvwar. Pou sa rezon bann lorganizasyon enternasyonal i dir li kler, deklarasyon-*declaration of family asset* i en *international requirement* dan bonn gouvernans.

E ou pa kapab dir ou pe fer en bon gouvernans si ou pe fer konpletman. Ler dimoun i konnen ki zot dirizan ek ban serviter piblik i deklar zot byen ek byen zot fanmir, zot ganny plis konfyans e en pei ki annan konfyans son pep se en pei ki atir lenvestisman, annan en popilasyon i pli angaze e en demokrasi ki pli vivan.

Sa *Bill* i fer nou gouvernans pli for e pli transparan, en servis piblik pli responsab. E alors mon pou ede re etabli en prensip

fondamantal ki ti'n ganny retire san rezon valab, e mon demann tou mon bann koleg Onorab pou zot osi donn zot sipor sa *Bill*. Mersi Madanm Speaker.

MADAM SPEAKER

Onorab Tirant.

HON COLIN TIRANT

Bonn apre midi Madanm Speaker. Bonn apre midi *VP* ek ou *panel*, bonn apre midi tou bann koleg Onorab e bonn apre midi tou bann zabitan Glacis.

Madanm Speaker, ozordi zour dan nou pei nou pe ariv en letap ki nou pe ganny bokou difikilte pou nou war bann dimoun travay koman en zofisye piblik. Akoz mon dir sa, set akoz i annan bokou faktè ki vin ek sa bann keksoz. E bokou dimoun, menm si zot ti dan en lanplwa oubyen en lanplwa prive zot pa oule vini akòz bann faktè ki- premye keksoz, pli gro keksoz deklar zot byen. *Ok*.

Sa i en keksoz ki kit zot an deor pou zot vin travay koman zofisye piblik. Me mwan mon annan detwa pti kestyon pou mon met ek *VP* zis pou eklersi mwan en pti pe.

Si mwan mon en dimoun mon'n travay, pandan bann dernyen 25an, mon annan mon zanfan, i annan ki ankor anba 18an, mon'n ouver en kont

labank pou zot, mon pe met en larzan lo zot kont tou le mwan, eski sa i pa byen?

Si mon annan mon en zanfan ki'n sot laz 18an, i pe *study* deor, i ouver en kont aletranze, e mon ganny dir fodre mon deklar son *asset* en kont. Mon zanfan i dir ek mon koumsa be dadi i mon kont personnel, kote mon ale? Ki arive si mon zanfan pa deside pou donn mwan sa lenformasyon ki mon anvi?

Mon zanfan pa isi Mahe li, i aletranze pe *study*, ki mannyer i marse? Mon ti a kontan aköz mon pa pe vwar dan sa Lalwa la mon. Ki mon pe war la i pe dir *members of immediate family and spouse ok*. E en lot pti keksoz ki mon ti a kontan demann VP, bokou Seselwa pe viv koman en *partner* dan lakaz, parey nou dir an menaz.

Eski sa Lalwa i fer provizyon pou sa bann dimoun deklar zot *assets*? Aköz la in mete klerman in *bold spouse*, e *spouse* i vedir ler nou'n marye. Be eski sa i kre bonn gouvènanans? Si mwan Colin mon marye, Onorab John Hoareau i pa'n marye en legzanp ki mon pe donner, eski i normal pou mwan fer mon madanm deklar son byen e Mr-Onorab Hoareau pou li pa deklare?

I annan en keksoz ki mon pa war li mal la- *I mean* mon pa war li i normal. Aköz Lalwa i sipoze aplik pou tou dimoun, aköz nou'n dir se zofisye piblik. Aköz mon pa pe vwar sa dan sa Lalwa ki ou'n anmennen.

E mon pou al en pti pe pli lwen, ler nou dir poudir nou bezwen deklar nou bann *assets*, *ok*. Mete mwan mon fek vin en zofisye piblik, mon pou deklar mon bann *assets* mon pa pou fer parey sa bann lezot dimoun ki'n la pandan 5an pa ti deklare zot *assets* ler ti ganny dir fodre deklare. *But* mon pa pou al pli lwen aköz sa i en lot keksoz nou kapab koz lo la.

Me selman nou, ozordi zour, sa bann ki pa ti deklare laba la, eski ozordi zour anba sa ladministrasyon zot pou deklare? En kestyon mon'n bezwen demann ek mon lekor. So, mon napa tro bokou keksoz pou dir lo la, me selman sa i bann- sa 2 pti kestyon mon ti a kontan aköz pou mwan sa i pa kler ki mannyer keksoz pou ganny adrese.

Zis mon pou fer en pti remark, mon pa'n ganny sans pou mon koz en pti git lo *hate speech* taler. Mon ti a kontan pou mon dir ek tou travayer PUC, pou ganny zot larzan ti'n fini komans koze avan ki

Gouvernman *US* i vin o pouvwar.

E mon ti a kontan pas en lot pti remark ler *VP* in dir poudir bann keksoz ki pe arive dan pei. Vicky- *VP*, ou en zabitan Glacis, nou'n zwe ansanm, nou'n tay partou ansanm lo laplenn, nou koze byen. -*sorry* Madam Chair- atraver ou Madam Chair.

Madanm Speaker, ti ariv en lensidan en mwan pase Glacis kot en madanm 72an ti ganny vin tire dan son lakaz pou al ganny met dan minot aköz, Ladministrasyon *US* ti'n konfiz li pou en lot dimoun ki ti'n pas en remark lo en dimoun dan Ladministrasyon *US*.

Mon ti koz lo la lot fwa me selman la mon anvi pli, sa madanm in *call* mwan i dir mwan be Colin pas mon mesaz. Be *VP* ler in vin la i pa'n dir nou taler sa li, ou konpran mwan *VP*? Mwan mon anvi ki nou koz keksoz byen e fran, annou dir keksoz ki laverite, mon dakor wi ou en politisyen ai, me selman annou dir keksoz ki piblik deor pou kontan pou tandé.

Annou pa fer dimoun vir kont nou ler nou lo semen oubyen mazin en lot fason lo nou. So, sa sityasyon ler ti arive enn parmi sa, sa bann gard ti ganny desizyon pou dir get sa, annou pa met sa madanm dan

minot i pa normal en madanm 72an ou pe met li dan en minot, annou war kote nou pe ale.

So, mon napa bokou pou dir me selman mon ti a kontan ou reponn mwan lo sa 3 pti pwen ki mon'n demann ou *in regard to* zanfán anba laz, anba 18an. Mersi bokou Madanm Chair.

MADAM SPEAKER

Onorab Lepathy.

HON NELSIA LEPATHY

Mersi Madanm Speaker. Vis-Prezidan avek ou delegasyon, bann Manm Onorab, e tou dimoun a lekout espesyalman bann zabitan Grand Anse Mahe bonn apre midi zot tou.

Madanm Speaker, koman en Seselwa, deklarasyon byen par bann politisyen ek zot fanmir ti enn ki ti vreman enteres mwan. Si nou oule annan lentegrite, transparans e konfyans kwa ki nou bezwen kasyet? Be, sa Madanm Speaker. Pa'n zanmen anpes mwan koman en zenn pou vin devan ozordi e pran en karyer dan politik.

Les mwan dir zot aköz ki mwan mon krwar ki nou devret deklar nou byen e pou nou pros. Si ozordi ou war i annan nou dan Lasanble Nasyonal ki'n ganny elekte e pe

reprezant en distrik oubyen nou war Prezidan Herminie in vin Prezidan Sesel, set aköz Lepep Seselwa e bann zabitan dan nou distrik in krwar ki nou, nou onnet e zot kapab fer no konfyans.

Koman politisyen, nou devret travay drwat e zis, i pa vedir ki nou pa kapab aste naryen, i pa vedir ki nou pa kapab fer biznes, oubyen annan plizyer propriyete. Me tou sa ki nou gannyen, nou bezwen ganny li dan en fason ki zis.

Bokou de fwa nou'n tann koz lo koripsyon e souvandfwa nou tann bokou alegasyon i annan kont isi, i annan kont laba, i annan tan bout later, i annan bout later lo son zanfann, i annan biznes isi, biznes laba ki lo non entel. E wi, nou pa kapab dir ki nou pa kapab koz lo koripsyon, me nou koman politisyen nou bezwen komans fer sa premye pa.

Madanm Speaker, avek sa pratik politisyen pou war li pli difisil pou kasyet okenn larzan oubyen okenn byen ki zot in gannyen a malapropo lo kont oubyen lo non en fanmir e sa ava ganny byen *monitor*.

E akse ki piblik i kapab gannyen avek sa bann deklarasyon osi, ti ava osi ede pour ki naryen pa ava ganny kastet. E i ava osi ranforsi drwa

piblik, akse lo lenformasyon. Sa lamannman ki devan nou Madanm Speaker, pou promot latransparans, lentegrite e donn lenformasyon lo kwa ki pe pase osi.

I sagrinan, ki an 2021 letan sa Lalwa ti ganny amande pou benefisye zis serten dimoun, ni *FIU*, ni Anti Koripsyon pa ti lev en ledwa kont sa lamannman, me toudmenm mon oule felisit bann *NGOs* ki ti met zot konsern lo la.

E popilasyon Seselwa menm ti demande aköz ki bann politisyen pa kapab deklar zot byen oubyen pou zot manm fanmir kan ler zot, zot fer laplikasyon sa bann pti Kreol Seselwa ti pe fer en laplikasyon pou lasistans finansyel pou gete- (bann zanfann malelve dan laklas kapab ekoute silvouple?) Mersi.

Ler nou bann pti Kreol Seselwa ti pe sey rod lasistans finansyel pou ekout- pou zot konnen, ki nou ti vwar? Nou ti vwar kot partou ek zot ti pe ganny fouye, ti pe gete si zot annan 4sou lo zot kont, si zot annan loto, si i annan okenn dimoun ki travay dan zot lakour e si sa dimoun osi i annan en pti mwenzan lo son kont.

E nou rapel ki leksplikasyon ti donnen

pandan sa letan ti enn ki ti banal e domaz en serten Onorab ki'n deza dir oparavan e ki ti dir sa letan ki menm si Lalwa pa bon zot pou pas Lalwa. E Madanm Speaker, pandan sa bann letan nou konnen kantite kabri ki ti pe manz salad?

Madanm Speaker, semenn pase dan mon lentervansyon dan mon lentervansyon lo sa Lalwa pou re entrodwir Lazans APDAR, mon ti dir ki i enportan dan nou pei ki nou tonm dakor pou serten fason fer pou byennet nou pei. Nou pa kapab koman en pei kontinyelman vir an ron e les nou zentere personnel pas par lao zentere nasyonal.

Kan sa Prozedlwa ti ganny entrodwir an 2016, i ti ganny sipor mazorite popilasyon Seselwa. Nou pa kapab koz lo latransparans, rann kont, lalit kont koripsyon si nou pa kapab tonm dakor lo bann striktir nesaser ki nou bezwen, met an plas lo nivo nasyonal pou adres sa.

E parmi bann striktir Madanm Speaker, i annan diferan kas legal parmi bann lenstitisyon i byen sir pa pe may kanmarad zanbet. Ozordi 9an pli tar Gouvernman *United Seychelles* pe eksprim son lentansyon pou retourn sa

Lalwa 2016 e angaz popilasyon pou konpran aköz sa lamannman ki ti ganny fer an 2021 ti napa lentansyon pou servi nou pei, me ti annan lentere pou servi zis serten dimoun dan pei.

Madanm Speaker, sa lamannman i annan en gran lenportans, aköz sa ki ti ganny fer an 2021 ti fer bokou nou ban zenn la deor demann en kantite kestyon, e menm perdi plis konfyans dan politisyen. E mwan, koman en zenn politisyen mon pou donn mon sipor sa lamannman ki pe ganny propoze pou fer retourn sa Lalwa 2016. Ki i ava osi ede pou lalit kont koripsyon.

E letan mwan mon pou vot pou sa lamannman, mon pou ler dan mon lespri, e dan mon konsyans e mon konnen ki bann zabitan Grand Anse Mahe osi dan zot lespri e dan zot konsyans pou tre kler ki ankor en fwa nou pou annan en Lalwa ki annan bi kre bann kondisyon tann kont lalit kont koripsyon e latransparans.

Sa ki bann zenn Seselwa i oule pou en meyer Sesel. E set avek lafyerte ki mwan Onorab Balissa Lepathy ki'n ganny elekte pou distrik Grand Anse Mahe. Pou donn mon sipor sa lamannman. Mersi Madanm Speaker.

MADAM SPEAKER

Onorab Adelaide.

HON FRANCOIS ADELAIDE

Mersi Madanm Speaker. Bonn apre midi Madanm Speaker. Bonn apre midi tou Manm koleg Onorab e tou dimoun a lekout.

Madanm Speaker, mon pou fer en pti lentervansyon lo sa bout lamannman Lalwa aköz mon krwar mon ti koz lo la ler mon ti pas sa Lalwa 2021. E i ti pou, nou ti pas sa Lalwa pou en senp rezon, ou konnen ou pa vedir ki ou met plis Lalwa ki ou pou fer ou pep- pou ou responsabiliz ou pep be ou donn li bann opsyon e koumsa keksoz i mars en pe pli byen.

Mwan mon rapel ler nou ti pas sa Lalwa parey mon koleg avan taler in dir, poudir lazenes ti konfize, le problem se aköz i annan zenes ti konfize, ler nou ti pas sa Lalwa se aköz ti annan bokou bann denigans ki pou detourn zot lo vre bi aköz nou ti pas sa Lalwa.

Ou konnen Madanm Speaker, bokou nou la konmela nou tou nou angaze dan bann diferan aktivite e nou tou nou responsab pou sa ki nou fer. E nou bann politisyen mon krwar i vreman enportan ki ler nou pran sa post dan politik nou vin parey nou konnen pou nou

travay pou nou fer- pou nou byennet nou distrik, ouswa byennet nou pep.

Me mwan mon pe gete ler nou pou revin avek sa Lalwa parey *VP* in anmennen mon krwar *VP* petet nou ti devret al en pe pli lwen, nou ti devret al en pe pli lwen pou moderniz sa Lalwa pour ki nou vreman i vreman annan petet parey ou pe dir plis latransparans. Be solman zis pou *bring back*, pou met zanfann ouswa madanm sa zofisyè Gouvènmman mon pa krwar ki sa i *the right approach*.

Byensir, i kapab pran en dimoun, en politisyen pa zis politisyen annou pa koz zis politisyen, mon krwar tou bann *public servant* i annan ban pozisyon kle dan pei. Mon krwar i enportan ki annou pa anvoy sa mesaz deor poudir zot nou krwar poudir nou bezwen met bann Lalwa aköz zot koronpi.

Me mwan mon krwar ki *VP* nou ti devret vin avek en lot fason, en lot *framework* pou nou kapab *untie* sa Lalwa. Par egzanp petet mon ti pe mazin, petet nou ti kapab anmenn bann Lalwa *in regards to whistle blower*. Kot bann dimoun i konnen poudir tel dimoun pe fer tel koripsyon e i annan plito plis mekanizm pou

zot kapab anmenn sa bann keksoz devan e raporte.

Mr Speaker, mon *believe* ki *right to privacy* -sorry Madanm Speaker, mon *believe* nou Konstitisyon i fer sa promosyon *right to privacy* e ou konnen ou parey Onorab Titran in dir taler pa tou dimoun ki anvi ou konn son zakasyon.

Ok, pa akòz mwan mon en politisyen mon deside antre dan politik ki petet mon madanm ki mon'n marye avek i dakor avek mwan, be mwan mon'n fer sa akòz petet mon'n ganny en *calling* e mon krwar mon pe fer en keksoz pou mon pei, be petet li i pa pou tro tonm dakor. Be solman nou ale nou fer li.

Ki pou arive prezan, VP petet ou ava eksplik nou taler, ki pou arive prezan si Lalwa i fors mwan pou mon deklare, e mon sey koz ek sa madanm mon dir li be *ok* nou bezwen deklare be li i dir mwan non i pa pe deklare. So, nou pou bezwen kite ouswa mon pou bezwen demisyonnen?

So, i bann keksoz ki nou bezwen mazin ki mannyer nou pou *tackle* li pour ki byensir nou pe fer ban keksoz ki byen, me selman napa ankor bann lezot latasman ki i fer li vin en pe difisil, pa kestyon ou

pa anvi e i fer li vin en pe difisil pou kapab *adhere* avek.

Ler nou ti as sa Lalwa an 2021 parey nou ti dir nou ti pas li akòz nou ti, oparavan ti napa bokou bann lenstitisyon, ki ti ganny mandate parey Anti Koripsyon, *FIU*, *FCIU*.

So ler sa bann lezot departman in vini, nou'n vwar poudir sa i deza bann lezot kous, bann lezot lenstitisyon ki kapab dil avek ban koripsyon ouswa si i annan petet ban mannev pou *public servant* kasyet bann byen ouswa vol bann byen pou zot lentere personnel.

So, zis parey nou kapab donn legzanp avek Seselwa, lontan petet ou ti bezwen rod ou 4 sekirite, ozordi avek lentrodiksyon *surveillance camera*, so ou war poudir i annan modernizasyon ki fer ki keksoz i vin pli fasil e i vin pli *accurate* tou.

So, vwala rezon akòz nou ti dir poudir *let's do away* avek sa zafer *asset* lo zanf an akòz nou tou nou konnen poudir Seselwa isi- Seselwa isi i malen, si i annan keksoz pou li kasyet i pa pou kasyet lo zanf an sa i en vye taktik i annan bokou plis bann lezot *arena* konmela kot ou kapab kasyet nenport ki keksoz ki ou anvi.

So, zis vin avek sa legzanp nou pou bezwen fer trounen pou nou fer sir ki politisyen pou pli responsab ouswa *public servant* mon pa krwar i *the right approach*, mwan mon krwar nou ti devret asize, mazin bann lezot kantmenm bann lezot fason pli inovativ pou nou kapab *tackle* sa zafer labi avek byen leta pou en endividi.

Mr Speaker- Madanm Speaker, parey mon dir nou bezwen dan lavi nou bezwen evolve. E evolisyon parey nou dir, nou anvi zot *manifesto* i dir zot pou promot en Gouvernman AI, zot pou fer keksoz pli byen, e la mon krwar ti en lepok pou nou kapab fer en keksoz pli byen.

Atraver ou Madanm Speaker, petet mon ava demann VP nou pe dir *declaration of assets*, eski i vreman en *declaration* ki nou fer? Akoz nou pa ti fer sa Lalwa pli modern, nou pa zis anpli en papye kasyet laba personn pa konnen ki i annan, so si mon pa konnen ki ou annan ki mannier mon pou konplent pou al raporte ler i annan en keksoz ki nou doute ou'n ganny *ill will*?

E la petet mon pou demann ou, mon pou ed ou pou fer pli byen, e mon pou ekout ou larepons ou'n dir mon vot pou ou, fer pase sa *Bill*, mon lans sa

challenge avek ou VP, annou fer sa ki ou dir oule nou fer, annou komanse par nou menm, deklar nou *asset* piblikman.

E si ou kapab anmenn sa kot Prezidan Herminie dir li annou deklar nou *asset* piblikman son Minis koman son Prezidan, son VP avek son Minis koman e met sa dan laporte piblik apre nou, nou a swiv. Nou, nou a swiv legzanp.

(APPLAUSE)

HON FRANCOIS ADELAIDE

So, ou konnen ou, par ler i gou nou vini, nou pran bann keksoz i get fasil, i get fasil pou nou asize la devan poudir nou bezwen deklar nou *asset* aköz sa pou fer nou get pli transparans, pou fer nou pli rann kont e pou ou met li an pratik i en pe difisil.

So Madanm Speaker, mon konnen mon letan pe al fini be mon ava ekout ou VP mon'n anvoy sa *challenge* si ou kapab fer sa pou nou, met nou keksoz o kler e *then* apre nou ava swiv ou. Me selman ..., ler nou ti aranz sa Lalwa ti napa naryen ki pou anpes politisyen deklare son *asset* aköz nou ti deza pe deklare, nou ti deza pe anpli papye nou ti deza pe deklare. E nou nou'n santi poudir i pa *fair* si mwan mo annan mon *right of*

privacy ki mwan mon bezwen trenn ou pou ou kapab ou osi vin deklare menm ki ou pa anvi e ou napa naryen pou fer dan politik, ou napa naryen pou frer dan sekter piblik.

So nou ti war poudir i annan en pti *injustice* ladan e nou ti koriz sa e prezan si zot, zot ti anvi amann sa i pou tou depan lo zot, me selman mwan mon ti a kontan ki zot fer, ler zot vin avek bann Lalwa sirtou pou si zot oule nou sipor moderniz li vin fer pli byen ki nou ti fer avan.

So, la zot a ganny nou sipor, e parey mon dir ou mon pou ekout ou apre mon a gete ki mannyer mon pou pran mon desizyon. Mersi Madanm Speaker.

MADAM SPEAKER

Onorab Uranie.

HON ROCKY URANIE

Mersi Madanm Chair. Bonn apre midi VP ankor en fwa, delegasyon, bonn apre midi tou koleg Onorab.

Ou konnen ler mon'n ekout Onorab mon bon zanmi Onorab Adelaide le ri pe rod leskiz akòz manm fanmir pa bezwen deklar *asset*, konmsi pou mwan i en pti pe fer lapenn. Si ou madanm pou bezwen kit ou akòz, ou madanm marye i

bezwen kot ou akòz li i pa oule deklar *assets* oubyen pou li deklare oubyen ou pa pou pran en pozisyon.

Akòz mon krwar nou bezwen tonm dakor dan en pozisyon si ou'n pare pou pran en pozisyon si napa naryen mal, tou keksoz ki ou'n gannyen tou bann keksoz ki ou'n ganny li par merit travay dir so mon pa war naryen mal akòz ou kapa kapab- manm fanmir pa kapab deklar *assets*.

Madanm Chair, lamannman dan sa *Bill Public Persons (Declaration of Assets Liabilities and Business Interests)* i enn ki tre enportan. I enportan akòz sa i kre en kad legal pou promot latransparans, lentegrite, rankont e osi bon gouvènanans sirtou dan Ladministrasyon Servis Piblik.

Sa *Bill* i fer provizyon ki *public persons* zot pa zis soumet deklarasyon zot prop byen, vèdir zot byen personnel, lentere biznes, zot *loan* si zot annan, zot bann kont banker e sonm ki annan, zot transpor, later, lakaz, sa i zot *asset* ki annan e menm bann komite oubyen lorganizasyon ki zot lo la oubyen ki zot afilye avek.

Me sa *Bill* pe obliz, i oblize ki manm fanmir, fanmir pros, fanm. Madanm, zonm imsyè,

zanfan, zanfan biolojik, zanfan adoptif pou deklar zot *assets*.

Sa i enportan akòz i pou anpese ki *public persons*, la nou pe koz bann o zofisye dan Gouvènmàn pa fer koripsyon, pa servi zot pozisyon e pouvwar, zot lotorite pou anrisir zot lekòr oubyen anrisir zot fanmir pros dan bann fason abnormal ki kre dout dan latet dimoun e pa bann fason etik.

Avek sa lamannman dezòrmen, zot pou bezwen deklare pou montre sa latransparans e pa kasyet naryen, zot pou bezwen ganny zot byen parey mon'n dir e atraver merit non pa dan bann fason banal nou kapab dir oubyen *crook*. Zis pou fer piblik rapel ki sa *Bill* ti deza fer sa provizyon pou manm fanmir, fanmir pros pou deklar zot *asset*.

Me apre eleksyon 2020 en nouvo Gouvènmàn, Gouvènmàn LDS ti retir sa bout dan sa Lalwa, zot ti retir sa provizyon, ki ti en fason ki ti en desizyon ki ti nou kapab dir tre drol, donnen lenportans sa Lalwa prene fer ki pei Gouvènmàn, bann o zofisye i demontre lentegrite, bon gouvèmans, latransparans e osi rankont.

E sirtou an vi ki LDS ti koz bokou avan eleksyon 2020 lo sa

bann valè e prensip parey mon'n mansyonnen zot ti koz bokou lo latransparans fodre rann kont, fodre annan lentegrite, fodre annan bon gouvèmans. Me selman nou ti vwar drol ki zot ti pran en desizyon parey pou zot kapab retir sa provizyon ki fer ki bann manm fanmir, fanm, fanm marye, zanfan eksetera pa deklar *assets*.

E Madanm Chair, zot ti fer sa tre vit, zot ti ganny elekte 2020 le 24 Oktob 2020 pa ni menm lan ki zot ti'n vin o pouvwar ti an 2021 an Septanm. Zot ti deside, zot ti anmenn en lamannman pou retir sa lobligasyon ki fer ki manm fanmir, fanmir pros e zanfan biolojik, zanfan adoptif pa deklar zot byen.

Ki ti vre zot lentansyon? Sa mon a kit la avek piblik pou reflesir lo la, ki ti vre lentansyon LDS pou pran en desizyon parey? I annan keksoz ki bon ki en Gouvènmàn i bezwen mentenir. Sa ki pa tro bon nou bezwen evalye e rod pli bon fason fer, i annan en *saying* ki dir *if something is not broken don't fix it*.

Alors, ki ti vre lentansyon Gouvènmàn LDS pou kas en Lalwa ki bon, pou fer annan sa ki nou kapab dir en *loophole* ki kapab ankouraz bann

malpractice parey fer annan koripsyon oubyen ouver en laport pou fer serten o zofisye posed bann byen Malaki e kasyet lo zot manm fanmir.

In annan plizyer alegasyon e sirkilasyon dan sa dernyen 5an apre ki sa provizyon ti'n ganny tire kot i annan serten o zofisye ki nou'n tande in ganny *villa*, zanf an in ganny *villa*, transpor, bato, later, ennler ou tann dir zot in ganny kado, ennler ou tann dir zot in aste, e Onorab Balisa Lepathy boner osi in sit en kantite, tousala pa kler ki fer dimoun kestyonnen lo lafason ki serten *public persons* oubyen zot fanm, fanmir prop i ganny sa bann byen.

Ennler ou tande bann gro sonm larzan in ganny donnen oubyen in sanz lanmen. Ou konnen, zot dernyen, dernyen keksoz ki zot in fer la, zis avan zot sorti *State House* pa konnen si zot in deklare, lisyen li zot in pran, torti ki zot in pran, ban kado ki zot in pran. Konmsi tousala i pas dan konversasyon.

E sa ban ka koumsa napa okenn deklarasyon ki'n fer okenn par pou dimoun kapab fer bann verifikasyon. Alor sa in fer ki napa latransparans e personn pa kapab vreman ganny *challenge* pou fer rann

kont. Parey mon dur sa i lev bokou konsern, sirtou lo rezo sosyal kot ou vwar menm portre pe ganny sirkile sirtou bann byen maternel ki ou vwar pe ganny poste.

Sesel i pti e dimoun ki kontan kit lizye e zorey ouver sirtou lo sa group dimoun ki dan bann pozisyon ki konpran desizyon pou ede diriz pei parey Prezidan, Minis, CEOs politisyen eksetera. Dimoun i toultan pe gard en lizye lo zot, alors fason pli fasil, petet pou ganny bann keksoz se par met lo fanmir pros. E mwan sa i rezon prensipal mon senserman krwar i rezon prensipal aköz LDS an 2021 ti retir sa provizyon dan sa Lalwa.

So, an 2021 nou ti kont sa sanzman pou retir provizyon nou, nou ti dan Lopozisyon sa letan nou ti kont pou retir sa provizyon, nou ti war ki sa...

MADAM SPEAKER

Onorab ou annan ankor 2 minit.

HON ROCKY URANIE

Mersi Madanm Chair- Madanm Speaker. Nou ti vwar ki sa pe kit lespas pe kit trou pou serten *public persons* ki mank lentegrite ganny tante pou servi zot pozisyon pou fer serten koripsyon, aksepte bann byen

oubyen fer serten lesans ma donn byen lo manm fanmir.

An Avril sa lannen dan milye mwan Avril sa lannen 2025 Vis-Prezidan pei ki Vis-Prezidan pei ozordi Onorab Sebastien Pillay ki ti *Leader* Lopozişyon sa letan, ti anmenn en *Private Members Bill on declaration of assets* pou fer ki bann manm fanmir pros dan bann *public person* sirtou politisyen deklar zot bann byen.

Me LDS ti an mazorite e ti annan en mazorite absolü ti vot kont sa *Private Members Bill on declaration of assets* aköz zot ti bann *rubber stamps* mon kapab dir e zot ti anba en lord anba en dirizan ki personn pa ti kapab dir be non sa i mal.

United Seychelles pe rod latransparans, rann kont bon gouvèrnans pe annan en pe pli bon entegrite dan nou pei dan nou dimoun e met lespri nou pep an pe. Motiv nou pep pou ganny keksoz atraver merit, personn dan Lopozişyon dan Gouvèrnman sa letan pa ti oze sipòte.

Madanm Speaker, Lopozişyon i annan labitid fer sa zot, ler zot ti dan Lopozişyon avan tou sa tapaz, zot ti dir en ta keksoz pep Seselwa apre ler zot ti vin o pouvwar an 2020 zot pa ti fer. Zot dlr *no turning back* me selman zot ti *go back* lo zot

parol. La zot ankoler aköz pep Seselwa pe *trust the process* e *process* i byen *on track* pou nou 100 zour.

Zis parey ti dir pou donn nou lenspekter ki endepandan, nou'n annan en Madanm Speaker ki endepandan. Alors, Madanm Speaker Seselwa pandan sa 5an dan Sesel zot in ki'n pran poudir ki zot pa pou les zot ganny anbete zot in vote pou tir sa mazorite absolü e met *United Seychelles* o pouvwar e met Dr Patrick Herminie Prezidan Sesel e Vis-Prezidan pei Onorab Sebastien Pillay.

Ek en lekip serye pou delivre pou pep Seselwa. Alors sa lamannman i pou *set the records straight* dan nou *democracy* dan nou pti pei, anmenn sa latransparans lentegrite, rann kont, bon gouvèrnans e *trust the process* pe ganny fer par *United Seychelles*.

MADAM SPEAKER

Fer ou konklizyon silvouple. Mersi.

HON ROCKY URANIE

Pou terminen, Madanm Speaker, Vis-Prezidan ou kapab kont lo mon sipor avek mon krwar- sipòt tou mon koleg pou nou fer Sesel pli meyer. Mersi.

MADAM SPEAKER

Onorab Bernard Georges,
Onorab Bernard Georges.

HON BERNARD GEORGES

Mersi Madanm Speaker. Bonn apre midi Madanm Speaker. Bonn apre midi Vis-Prezidan, tou bann Manm Onorab e tou dimoun ki pe swiv nou.

Madanm Speaker, mon apel dir en keksoz, boner e kel. *LDS* i krwar dan deklarasyon assets, *LDS* in toultan krwar dan deklarasyon assets e *LDS* in toultan deklar nou bann assets. Lo sa kote latib nou annan en rikord 100poursan, zot konnen ki mon pe dir me nou ant zanmi alor les mwan aret la.

Politik Madanm Speaker, i fasil, i fasil pou fer. Nou tou nou politisyen, nou tou nou kapab fer politik lo en size ki pa merit okenn politik e sa size pa merit okenn politik. Akoz i dan lentere tou dimoun pou ki bann zofisye *senior* e bann *constitutional appointees* i devret kapab deklar zot assets pour ki piblik ava konnen kisisa ki zot annan kisisa ki zot napa.

E si pandan sa letan ki zot in o pouvwar zot ganny plis ki merite zot ganny byen plis ki lavalè zot saler pandan sa peryod letan kestyon nou ava

kapab ganny demande. Sa i en fenomenn iniversel e mon pa krwar ki i annan okenn dimoun dan sa lasal oubyen dan sa pei ki annan okenn rezon pou pa dakor avek en tel sistenm.

Kestyon se pa sa, kestyon se eski sa ki nou pe fer i meyer, i sa ki meyer pou nou pei? E sa se en kestyon fondamantal. *Is the declaration of assets the purpose?* Oubyen eski *purpose* sa ki nou devret pe rode se pa fer en fason pou anpes dimoun ki o pouvwar oubyen ki annan pouvwar parey nou dan sa lasal isi pou pa fer koripsyon e sa se kestyon fondamantal.

Mon demann li la, mon ti demann li an Avril sa lannen, mon ti demann li an 2021 e mon ti demann li an 2016. *That is the key* sa ki nou bezwen se en lalwa ki performan en Lalwa modern ki reponn a legzizans sa ki nou anvi.

Malerezman sa ki devan nou ozordi i pa en tel lalwa, mon ti dir bomaten e mon ti pou dir apre midi e les mon dir la sa ki nou pe fer la ankor enn fwa se *rush job*, nou'n sakrifye *quality for speed*, nou sel lentere anfen non, pa nou, zot se lentere Vis-Prezidan se pou kapab dir la, la en lot promes 100 zour in ganny realize.

Kan nou ti'n pran en pe plis letan nou ti'n kapab ariv

avek en meyer Lalwa ki ti ava reponn a bann legzizans ki Manm lo tou lede kote lata in fer sirtou la apre midi. Me non, Vis-Prezidan *is a man in a hurry*, li avek son Prezidan zot bezwen delivre lo zot promes 100 zour menm si *this is at the expense of* en meyer lalwa.

Se sa mon bann zanmi Gouvernman ki nou annan ozordi pa krwar sa bann zafer ki Vis-Prezidan in dir zot taler, sa se li i pe fer politik. Sa ki nou annan se en Gouvernman ki'n fer en seri promes e ki i oule tenir son bann promes zis pou li kapab dir mon'n tenir mon bann promes menm si i ti'n kapab fer pli byen avek sanmenm sa bann promes.

Quality? Gouvernman vizyoner? En Prezidan ki travay dir? Non, non Madanm Speaker. Sa ki nou annan se parey mon'n dir en *rushed job*, e mon ava eksplik zot aköz. Sa Lalwa ki devan nou la ozordi i egzakteman menm Lalwa ki Vis-Prezidan ler i ti *Leader* Lopozisyon dan sa sez kot mon pe asize ozordi ti anmennen an 2016.

E ler mon ti dir zot bomaten, yer e avantyer ki sel keksoz ki *US* pe fer se *wipe out* sa ki *LDS* ti fer, retourn pandil le 23 Oktob 2020, la prezan zot konpran ki mon pe dir e ki mon

annan rezon. Napa okenn lezot vizyon dan sa ki zot pe fer aparad *turn the clock back*.

E pourtant, zot pa pli bet ki nou, zot konnen bann defayans ki annan, zot ti'n kapab aplik sa bann defayans la ozordi, nou ti'n kapab ozordi swiv swe Vis-Prezidan e vot an faver en Lalwa ki ti pou performan e ki ti pou reponn a tou nou legzizans, malerezman se pa sa ki'n ganny anmenn devan nou.

Mon regrete Madanm Speaker, ki Vis-Prezidan pli boner ozordi in pran en ton *street fighter*, de zour pase i ti mon Prezidan, li ki ti dir, mon ou Prezidan Onorab Goerges, mon ou Vis-Prezidan e annefe la ozordi i pa ti mon Vis-Prezidan la ozordi i ti *back to* Onorab Sebastien Pillay, *Leader* Lopozisyon pe lager avek mon koman *LGB*.

I regretab, i regretab e mon swete ki avan lafen lazournen i ava retrouv son sez Vis-Prezidan ankör e i ava met sa sez Sebastien Pillay, *Leader* Lopozisyon akote. Mon'n dir sa aköz mon pou kritik sa ki in fer e mon oule ki nou konnen ki annandefwa ler ou kritik en dimoun i reazir dan en fason vit, kekfwä ki i pa ti'n devret.

Mon pe demann li dan sa ka, konpran mon byen, ekout sa ki mon pe dir, aköz sa ki mon

pe dir i fer sans, pa akòz mwan mon pe dir, me akòz i fer sans. Lide in ganny avanse apre midi par enn de ki'n koz lo zot kote ki politisyen pa deklar zot *asset*, *fake news* Madanm Speaker. Politisyen in toultan deklar nou *assets*, nou'n toultan deklar nou *assets*, ou plito laplipar nou, nou'n toultan deklar nou *assets*.

Alor, i fo pou dir ki sa Lalwa ki pe ganny anmennen ozordi sa lamannman se pou fer politisyen deklar zot *asset* ler nou pa ti pe deklar nou *assets*. *That's not correct.*

Sa ki sa Lalwa pe fer la ozordi, sel keksoz ki i pe rode se retourn en keksoz ki ti ganny tire an 2021 a savwar ki ou bezwen ler ou en politisyen ek enn sa bann lezot dimoun ki ganny liste dan sa Lalwa, ki pa zis politisyen me i osi bann Ziz bann lezot Prezidan, Vis-Prezidan bann Minis tousala, ou Madanm Speaker.

Nou tou nou bezwen deklar non selman sa ki lo nou non, me lo sa ki lo non- mon pou servi ne mo Kreol, mon a retourn lo la taler nou konzwen e sa se mo ki Vis-Prezidan in servi avek nou *immediate family*, sel lamannman ki pe ganny fer apre midi sel lamannman ki pe ganny propoze la apre midi.

E, nou bezwen dir ki an 2021 ler sa Lalwa ti ganny sanze, pou retir *spouse* avek *immediate family*, *members of the immediate family*, i pa ti zis sa ki ti pe ganny fer me ti en sanzman bokou pli striktirel. Premye sanzman sete ki *declaration of assets* pa ti pou anba manda en komisyoner me i ti pou vin anba ACCS.

E ACCS parey nou konnen *Anti-Corruption Commission of Seychelles* i annan pouvwar pou fouy dan ou byen, i annan pouvwar fer lanket, i annan pouvwar al rod lenformasyon si i sispekte ki ou *up to no good*.

E se dan sa konzonktir ki i ti nepli nesesser pi ou deklar *assets* ki lo ou madanm oubyen ou imsyé, ou byen lo ou zanfán par anba 18an oubyen par la 18an si ou ankor pe siport zot, i ti nepli nesesser akòz i ti annan sifizaman lezot kapasite pou kapab al rod lenformasyon si lenformasyon i bezwen.

Alor, nou bezwen regard sa dan sa konzonktir, i pa ti zis *LDS* ti vini ti tire pou anpes politisyen deklar zot *assets* e la ozordi *US* pe retourn sa pou fer politisyen deklar zot *assets*. Sa largiman i en largiman fo e i napa plas dan sa Lasanble, akòz dan sa Lasanble nou bezwen edik Lepep, edik bann dimoun ki pe ekout nou, edik

bann dimoun ki'n vot pou nou edik bann dimoun ki'n vot pou nou e ki nou pe reprezante isi dan sa Lasanble e pa endwir zot an erer, i enportan - sa i enportan en kantite.

I annan *whistleblowers* ki ti napa neseserman dan en kad legal an 2016 ler sa Lalwa ti pase, me ki ti la akòz anba Lalwa ACCS i annan en posibilite *whistleblower*. Si en dimoun i anvi konnen ki mwan mon annan, zot pa bezwen al get dan mon deklarasyon *assets*, zot al biro lanrezistremman, zot al kot ACCS zot fer fouy dan mon kont labank *whatever, I mean* i annan tou sa bann posibilite pou fer.

Alor, nou bezwen regard sa dan sa konzonktir, me menm sa pa al osi lwen Madanm Speaker, e i pa *fair*, i pa zis i pa korek pou dir ki konmsi nou nou'n sanz Lalwa dan en fason ki zis nou ki'n sanz sa Lalwa dan lemonn.

Mon ti dir an Avril e mon ava repete la ozordi Moris ou bezwen deklar *assets* ou *spouse* avek ou zanfan, egzakteman parey isi avan ki Lalwa in ganny sanze e parey sa Lalwa ki zot pou pase taler.

Onorab Uranie, fer mwan plezir, pa vot an faver sa Lalwa pou montre ki zot pa en

Lasanble *rubber stamp* parey ou fek akiz nou ki nou en Lasanble *rubber stamp*. 5, 6 zot *abstain* oubyen pa vot an faver oubyen vot kont, nou a gete ki zot pa en Lasanble *rubber stamp*.

Espagne, i mandatwar pou *senior public officers* pou deklar zot *assets* me i volonter pou zot deklar *assets* zot *spouse* oubyen zot zanfan, zot deside si zot pou oubyen si zot pa pou. *La France*, pa kouver *wives* ek *children* parey nou, nou ti fer an 2021. *Sweden* menm zafer.

Alor ou war Madanm Speaker, napa en barenm ki nou, nou'n deside kase *LDS* akòz in fer nou plezir, non. Lalwa in ganny pase dan sa konzonktir ki mon'n eksplike taler.

E prezan nou vin lo kisisa ki pe ganny fer la ozordi, dan tou sa bann keksoz ki'n ganny koz lo la, Vis-Prezidan i deside anmenn en lamannman, en lamannman, egzakteman parey son *Private Members Bill* ki i ti anmenn en Avril sa lannen, *takes two word for one*, sel keksoz i anvi se retourn nou dan sistenm ki ti egziste avan lamannman 2021.

Setou ki i anvi fer, *turn back the clock*, se sa ki *US* pe fer. Zot pa ni asize pou zot mazin en be eski i annan lezot

keksoz ki nou ti a kapab mete pou amelyor sa Lalwa, ni sa zot pa'n fer, ler mon dir *you're sacrificing perfection, quality for speed* se egzakteman sa ki zot pe fer.

Ou war Madanm Speaker, sel keksoz ki nou pe kay lo la, se *spouse and children, spouse and immediate family*. E Onorab Sebastien Pillay, eskiz mwan, Vis-Prezidan Sebastien Pillay i pa bet li, i pa'n mansyonn sa mo lo, in mansyonn konzwent, konzwent.

E mon konnen aköz in mansyonn konzwent aköz i pa kapab, i pa kapab zistifye, aköz mon ti lev sa pwen an Avril i pa'n kapab reponn e ozordi osi i pa pou kapab reponn. Mon'n al regarde mon pa zis zot ki kapab regard *AI*, mon'n al regarde mwan, konzwen en konzwen an Kreol sorti dan mon konzwen an Franse *meaning spouse or partner*.

E lala problemn, lala problemn ki zot ti annan letan pou zot rezourd sa problemn. Mon ti'n dir zot an Avril sa lannen, silvouple rezourd sa problemn, non, non zot pou mor ek zot boul aköz zot annan 19 vot pou zot kapab fer pas zot Lalwa.

E Onorab Colin Tirant in fer sa pwen byen. Isi Sesel, 8

koup lo 10 pa marye, i normal nou pa pe pas okenn, pa pe montre okenn ledwa sa se zot swa, zot annan swa fer li. 8 zanfan lo 10 pa ne dan en relasyon maryaz, zot ne an deor relasyon maryaz.

Spouses has not been defined in the law, zot ti kapab zot in kapab *define spouses* pou dir *spouses include partners, or common law partners*, zot ti'n kapab fer, menm sa zot pa'n fer, menm sa zot pa'n fer e sa ti ava regle tou problemn.

Alor sa ki'n arive ozordi sa ki zot pe met devan nou e sa ki zot, zot pou vot an faver mon bann zanmi, mon bann koleg, mon bann koleg Onorab, sa ki zot, zot pou vot an faver se en sistenm kot mwan mon pou bezwen deklar byen mon madanm, mon napa zanfan alor *problem doesn't arise*, me en lot Manm dan sa Lasanble mon siny ki i annan plizyer ki pa'n marye, pa pou bezwen deklar sa ki pou zot, *is this fair?*

Eski Gouvernman US, Gouvernman, sa Gouvernman ki'n vin o pouvwar avek soutyen Lepep Seselwa pou fer en sanzman dan ou lavi? *That's what you're doing?* Ni en definisyon *spouse* zot pa'n kapab anmennen? Kan depi Avril mon pe dir zot, depi an 2021 mon pe dir zot, pa'n war?

I mean come on Madanm Speaker, annou let's get real. But in any event ozordi Sesel, ler dan 3 maryaz 2 i fini- enn i fin i par divors e byento dapre statistik enn lo 2 i fini ek en divors, ou pou al met ou byen lo ou madanm ki annan 50 poursan sans i pe al kot ou demen *or vice versa*, be sa fodre ou fou oubyen ou fol.

Mwan sa kantite divors ki mon'n fer dan mon lavi be zanmen mon pou dir avek en dimoun ki vin rod en konsey kot mwan met sa lo non ou madanm pou personn pa war. Fodre ou bet, e la prezan an plis ki sa, an plis ki sa apre 7an, apre 7an tou sa ki pou ou, lanmwatye sa ki pou ou i al pou li *in any event*. Prezan ou pou al met ou byen pou ou kasyet ou pou al met lo li? Be fodre ou fou.

Sa ki ou fer ou pou fer parey nou war, toulezour Ankour, ou pe la met li lo en lasosyete, lo en lakonpannyen *offshore* ki in anrezistre Moris oubyen ki anrezistre *BVI or whatever, of course* ou pou fer sa. *Now we know*, al rode, zot pa ni bezwen al rode, si zot anvi konnen ki mon byen.

Onorab Loze mon konnen ou pe rode, si ou anvi zis vin kot mwan, mon ma donn ou tou keksoz ma montre ou tou, ou a tir portre ou a fer *photocopy* do

everything, napa okenn problem.

Akoz mwan mon deklare, mon pa'n dir sa, konmsi Bob Marley," *Who the cap fits, let them wear it.*" Ou vwar Madanm Speaker, sa ki nou pe fer la ozordi, nou'n taye, nou pa'n reflesir ase, sel keksoz ki Onorab Pillay in anvi fer. E mon konn li tre byen, napa en dimoun ki konn Onorab Pillay pli byen ki li e kekfw napa en dimoun ki konn mwan pli byen ki li.

Akoz nou'n asiz la o bor kanmarad pandan 5an, mon konn egzakteman ki mannyer sa imsy e i mazin. Mon konn egzakteman ki mannyer i pou reazir ler mon dir en parol ki i pa kontan.

Onorab Adelaide in dir, e mon siport li antyerman, avek tou sa mansyon *AI* ki zot i mete dan zot *manifesto* e i annan mansyon *AI*, partou kot ou gete sak laliny zot pou vin fer *AI*, zot pa ti'n kapab fer en sistenm *AI* avek sa? E aköz ki zot anvi nou'n demann zot sa kestyon, reponn nou, aköz ki zot anvi ki deklarasyon *asset* pou reste *sealed* dan en lanvlop? Aköz zot anvi sa?

Akoz zot pa'n- koman en Gouvernman progresif, en Gouvernman ki anvi *lead by example*, en Gouvernman ki'n

ganny vote par en gran mazorite dan dezyenm *round*, e menm pa avek 50 poursan isi dan Lasanble Nasyonal be sa se en largiman pou en lot zour.

Zot pa'n kapab vini dir lala nou, nou pou montre ou *we lead by example*. Nou ava tal tou sa ki nou annan, oubyen sa pti git ki nou annan *whatever*, zot fer parey, *do that, do that* e nou, nou ava fer parey. *Let's unseal the declaration*, annou dir la ozordi anmenn en lamannman i pa tro tar annou dir ki tou sa bann lanvlop ki nou'n donn avek ACCS la, nou pou ouver, nou pou ouver e nou pou pibliye e nou pou met li lo *Facebook let's do it*.

Mwan ma fer li premye, Onorab Loze pa bezwen al rode kot lanrezistremman ki mon annan i ava konnen egzaktman ki mon byen. *Let's do it*. Oubyen, oubyen, oubyen annou fer en sistenm *AI*, annou fer sa *declaration of assets completely artificial intelligence*.

Tir portre mon lakaz, ki mon konnen zot pe get mon lakaz en pe pre, zot in war ki i annan en prela lo la aköz mon twa i koule, *fine no problem* en zour mon ava ganny en twa ki pa koule, vin tir en, annou tir en portre, annou tir en portre, annou tir en portre tou bann

pake annou met tou kont labank.

Let's do it, aköz ozordi Madanm Speaker, tou keksoz i vizib partou dan lemonn kot Prezidan Lanmerik i bezwen donn son *medical certificate* tou le-z-an pou montre ki i an bonn sante, annou fer parey isi, annou fer parey isi, annou fer. Annou fer montre tou keksoz napa okenn sekre, *let's do it, lets do it*.

Zot pa pou fer, zot pa pou fer, e ozordi menm e ozordi menm nou pou al dan *recess*, - (les Wavel trankil ou, Wavel i byen kot i ete)-. Ozordi nou pe al, Lasanble pe al dan *recess* e ler nou pou retournen nou pou annan *SONA*, nou pou annan Bidze, nou pou annan plen travay.

Me osito Madanm Speaker, la mon pe dir zot, osito ki Lasanble i repran mwan mon pa pou fer en *Private Members Bill* parey Onorab Sebastien Pillay pou vin remet sa ki mon'n tire, mwan mon pou anmenn en *Private Members Bill* pou fer ki deklarasyon *assets* avek *medical records* tou bann dirizan i ganny pibliye ofisyelman.

E nou ava rod zot sipor pou fer sa pase, aköz nou pou bezwen zot sipor pou fer sa pase.

(Applause and comments)

HON BERNARD GEORGES

Mwan Bernard Georges *MNA* Les Mamelles kont lo mwan Fevriye, Mars *Private Members Bill Declaration Of Asset unsealed, public, AI* pou tou dimoun konnen. E pou bann dimoun laba deor ki pe swiv nou bann, bann, bann pti dimoun parey Vis-Prezidan Pillay in fer mwan mazine taler mon pa ti'n koz lo zot, ki zot, zot ava vwar ki sa ki zot, zot fer nou osi nou pou fer parey, zot a konnen ki zot dirizan i annan e ki zot dirizan napa. Mersi bokou Madanm Speaker.

MADAM SPEAKER

Onorab Herminie.

HON WILBERT HERMINIE

Mersi Madanm Speaker. Bonn apre midi Madanm Speaker. Bonn apre midi *VP* e bonn apre midi tou dimoun ki a lekout.

Madanm Speaker, atraver ou nou la lo sa kote latab nou pa'n vin la pou nou *wipe out LDS*, zot in fer sa par zot prop aksyon e par zot dirizan ki pa'n konn anmenn sa pei e Lepep Seselwa ki'n *wipe zot out* in met zot asiz laba lot kote latab.

Madanm Speaker, sa Lalwa ki devan nou, i en non

Lalwa menm si sa lamannman ki nou pe fer i vremen ptipti me son konsekans ki anmenn pou nou pei i vremen gran. Sa Lalwa ti la an 2016, ti form parti ki mon osi tou pou fer pas sa Lalwa.

E nou pa konnen kwa ki ti zot premiz an 2021 pou tir sa bout konzwen ladan, zot ki konnen si ti annan keksoz pou kasyet, si zot Prezidan ki ti dir zot fer sa aköz i annan keksoz ki ti pe al arive nou pa konnen. Me selman la nou, kote *US* nou pe vin koriz en lenzistis ki'n arive kot pou nou anmenn plis latransparans, bon gouvèrnans avek bon fason fer.

Madanm Speaker, sa Lalwa i montre nou ki *US* i pe delivre lo son bann promes, nou ti mete dan nou program 100 zour, wi i dan nou program 100 zour e i en bon keksoz ki nou pou fer pou nou pei. An di-z-an sa Madanm Speaker, koze deor ki nou'n tandè se rezon ki zot ti sanz sa Lalwa an 2021, set aköz serten tranzaksyon ki ti pe al arive.

Parey nou'n tandè, papa ti aste later, met lo piti, piti ti pey later e piti pe pey en *loan* avek papa pou aste later. So, zot kontan fer sa zot, legaliz koripsyon atraver en Lalwa pou fer li vin posib pou nou fer keksoz ki mal epi zot dir zot ti

pe amelyor keksoz. Zot pa amelyor naryen zot, ti annan zot plan e zot kontan fer sa bann keksoz koumsa.

En lot legzanp ki mon kapab donnen Madanm Speaker, sete ler zot ti kas Lalwa atraver aksepte donasyon avek en organizasyon enternasyonal Frederick Newman mon krwar i apele, kot zot ti dir pa zot ki ti peye, Frederick ki ti peye, Newman ti pey Frederick, Frederick ti pey Newman.

Solman epi ki nou ti war? Mr Speaker, i ekrir son lekor e epi i reponn son lekor, pou dir nou kote larzan i sorti. Me solman epi pou zot kouver tousala pou zot legaliz sa koripsyon zot anmenn en Lalwa pou fer sa normal.

So, zot abitye fer sa zot, nou konnen ki mannyer zot *operate*. Prezan nou, nou pe get zot byen kler, e mon kontan VP in vin la devan in eksplik nou byen kwa ki sa Lalwa i *entail*, kwa ki sa Lalwa pe al fer e nou prezan nou pe *plug* sa *loophole* e parey LOTO i kontan dir, in met ankor en gardfou la, kwa ki annan mal si sa bout i antre ladan?

Napa naryen mal avek pou *spouse* deklar son *asset*, ou en *public officer* ou en *public person*. So i normal, avan ou

pran sa desizyon pou ou konnen ou pe al antre koman en politisyen ouswa *any public officer* ou konnen sa i enn parmi sa bann pwen ki ou bezwen, bann *milestone* ki ou bezwen fer pou ou kapab ganny sa pozisyon.

Sa i vremen akseptab li, napa naryen, naryen la avek sa, me ozordi zot in vini, sey eksplik nou diferan fason ki i annan en problem, zot dakor ek sa Lalwa me solman nou servi AI, zot dakor ek sa Lalwa me solman nou pou anmenn en *Private Members Bill*, ki dayer pa'n zanmen tann koz lo la dan sa dernyen 5an, tou keksoz ti *ok*, ler nou ti pe fer piti pran *loan* avek papa pou pey later ti *ok*? Ti napa naryen mal.

La ozordi nou pou anmenn en moderniz nou sistenm, nou pou anmenn sertifika medikal pou tou dimoun, pou met li lo *Facebook*, tousala zot pa ti oule fer dan sa 5an. Nou konnen aköz zot pa ti fer sa. aköz Senyer ki ti pe dir zot ki mannyer pou *operate*.

Ozordi zot in ganny en pe laliberte pou sey **manouve**, prezan zot a pe sey vin donn nou leson. Be nou, non, nou, nou pa pou pran leson avek zot nou, nou annan en Prezidan ki nou'n elekte, nou'n met li la pou li travay, i annan bann zofisye,

nou annan *VP*, bann dimoun ki annan en bon pe lasazes nou konnen ki mannyer keksoz i *operate* e nou pou *trust the process*.

Akoz nou konnen ki nou pe fer. Mersi Madanm Speaker.

MADAM SPEAKER

Bon, nou ava pran 30 minit *break* apre nou ava rekomanse. Mersi.

(BREAK)

MADAM SPEAKER

Bon nou ava rebran bann entervansyon - i reste mwan zis en Onorab lo mon lalis – Onorab Lemiel.

HON SYLVANNE LEMIEL

Mersi Madanm Speaker, bonn apre midi Madanm Speaker, *VP* ek ou delegasyon, tou dimoun ki a lekout. Madanm Speaker, devan nou Lasanble ozordi in vin sa Lalwa *Public Persons (Declaration of Assets, Liabilities and Business Interests) (Amendment) Bill 2025*.

Premyerman enn sa Lalwa letan in ganny adopte – nou ti adopte li an 2016 anba Ladministrasyon Prezidan Faure e rezondet pour ki sa Lalwa li menm ti ganny anmennen se ki pou asir latransparans, nou dir

lintegrite osi e e osi *accountability* osi dan lofis piblik.

Sa Lalwa li menm Madanm Speaker, ti fer spesifikman oubyen ti ganny *designed* pou fer ki nou tou bann public persons – oubyen ki nou dir bann zofisye piblik e nou manm fanmir pros - parey nou msye, madanm oubyen zanfan, Prezidan – Vis-Prezidan, Minis, nou isi dan Lasanble Nasyonal - i konpri tou bann *constitutional appointees* kot ti osi bezwen deklar son *assets* – sa ti an 2026.

Me Madanm Speaker, mon pou dir ki *accountability* dan lofis piblik i pa kapab aret zis kot sa dimoun ki dan sa lofis piblik. Par egzanp, i pa kapab aret zis kot Prezidan, zis kot Vis-Prezidan, zot kot nou bann *MNAs* aköz nou annan nou bann fanmir ki viv avek nou. Madanm Speaker, lepep li menm in elekte en Gouvernman avek en lekspektasyon ki nou desarz byen nou bann responsabilite, aköz nou tou koman bann *constitutional appointees* nou ganny peye pou nou fer sa travay e larzan piblik i devret toultan pe ganny servi pou amelyor lavi nou pep, me non pa petet pou nou zofisye piblik ki dan lofis abiz pouvwat

e an menm tan fer ki nou ganny bann byen – i kapab byen ki nou pa’n vreman travay pou nou gannye. I kapab byen ki nou pa’n vreman ek sa lapey ki nou gannye nou pe kapab peye. Parey sirtou ennler bann *asset* ki nou kapab annan.

Me i malere ki kan pouver dan lofis piblik i ganny egzerse parfwa, sa lentere finansyel li menm souvandfwa ganny garde oubyen administre anba manm fanmir e i pa zis sa. Nou’n ganny dir ki nou konnen sa ki *LOTO* osi in fer resorti – atraver lezot mwayen osi konmela ki bann zofisye piblik zot menm zot pe sey – i pa *trust* sa madanm – i pa *trust* sa msye – pa *trust* zanfan me i war lezot fason pou li al kasyet son bann byen.

Madanm Speaker, sa i en realite ki tou dimoun i konnen sa. E se pour sa rezon ki sa Lasanble li menm an 2016 parey nou’n dir ti demann zofisye piblik pou deklare – pa zis zot prop byen oubyen lentere me osi sa ki zot fanmir i annan.

Mwan an 2016 mwan menm – 2016-2017 an desandan nou’n deklare – mon manm fanmir ti deklare. Me en keksoz ki petet i byen fer resorti parfwa, wi i annan serten manm fanmir ki reziste – ki dir ou li i pa’n anvoy ou dan politik;

ou ki’n deside antre dan politik e alors li i pa pou deklare pou li, ou deklare pour ou. Tousala in annan, me tousala i devret annan en mekaniz an plas ki pou kapab- anpar petet lo kote sa bann difikilte parey oubyen challenge parey ki kapab arise letan ki nou pe fer sa prosedir or letan ki nou pe dir tou dimoun i deklare son *asset* e nou ganny serten rezistans.

Madanm Speaker, souvandfwa nou konnen koripsyon pa ganny fer an piblik li; i rarman lo non nou koman bann zofisye piblik. I rarman lo non sa Prezidan – i rarman lo non Vis-Prezidan – i rarman lo non nou nou menm koman Manm Lasanble.

Pli souvan i ganny fer atraver parey nou pe dir sa bann manm fanmir e nou bann fanmir pros e osi i ganny fer atraver bann *asset* ki ganny met anba non lezot dimoun ou kapab dir - oubyen biznes ki ganny anrezistre lo non fanmir. I pou sa *MNA*, i pou sa *VP*, i pou sa Prezidan, me selman in met li sa biznes lo non en lot dimoun. E lentere sa zofisye piblik li menm, i ganny kasyet atraver koneksyon fanmir.

Sa nou pou dir Madanm Speaker, i realite ki nou Lasanble ozordi i bezwen onnetman konfronte par aprouv

sa *Bill* ki la devan nou. An 2026 avek en Lasanble 15 lo 10 sa *Bill* ti ganny gran sipor bann Manm. E sa ti enkli nou bann Manm ki ti dan *LDS*, zot ti vreman an faver sa, e akòz sa letan se Gouvènmman *US* ki ti o pouvwar e petet zot ti pe mazin petet zis dan *US* ki pas koripsyon. Alòs i enportan ki tou dimoun i siny sa. Sa letan petet.

Me Madanm Speaker, Ladministrasyon *LDS* ti vin o pouvwar an 2020 e nou tou nou konnen ki ti arive. Avek sa mazorite ki zot ti annan, an 2021 zot ti pran en desizyon pour zot fer li diferan. Zot ti deside pou amann sa Lalwa e retir zis sa bout '*family link disclosure*' nou kapab dir dan sa Lalwa. E sa desizyon ki mon'n santi in afebli *accountability framework* e in kre en vid li menm dan sa Lalwa – en vid ki bann ki pe – ou konnen en vid ki petet bann ki ti prefer sa opasite nou kapab dir, olye petet latransparans li menm.

Madanm Speaker, latransparans i pa en pinisyon li. I en proteksyon – proteksyon larzan piblik, proteksyon lenstitisyon, proteksyon bann zofisye piblik ki onnet, ki zot lentegrite pa devret ganny afebli par sekre. Madanm Speaker, sa

Bill pe permet remet sa ki ti ganny retire e petet pou fer sa vid osi. I pe reentrodwir '*family disclosure*' parske *accountability* i pa get ou byen inyor – inyor lentere – pa get ou byen inyor lentere fanmir i pa vreman *accountability* sa si nou pe inyor lentere fanmir me nou pe get zis sa ki pou sa *public person* oubyen rann kont nou kapab dir.

Madanm Speaker, ler nou zis get dan sa zofisye piblik li menm e ferm lizye lo son msye, son madanm, son zanfann, nou pe donn koripsyon en lavantaz e nou pe fer pep perdi konfyans osi. Sa Gouvènmman i pa enterese dan demi mezir. Nou enterese dan kredibilite e en Lalwa ki pou seryezman ganny aplike.

Sa *Bill* pe donn nou en mesaz kler Madanm Speaker. Lofis piblik i konfyans piblik e sa konfyans ki kouver tou lentere finansyel ki annan en lyen avek sa zofisye menm si i ganny met anba non fanmir pros. Alòs Madanm Speaker desizyon ki devan nou Lasanble ozordi, pour mwan i senp, eski nou aksepte en sistenm sipervizyon ki'n afebli kot nou santi petet i pou mank serten latransparans – i pou mank serten *accountability*, oubyen

nou pe met lentegrite dan nou Lalwa, rann kont ?

Madanm Speaker, sa Gouvernman mon krwar in swazir lentegrite, se pour kwa *or* se pour sa rezon ki in vin avek sa amannman dan sa Lalwa pou reentrodwir sa bout kot fanmir pros li menm li osi i deklar son *asset* ? Ki petet mon ti a kontan VP i dir nou dan ka i arive ki sa fanmir pros li menm – sa madanm, sa msye, sa zanfan, sa *public person* li i deside pou li dir pa anvi deklar - aköz mon konnen avan 2018 i annan dimoun ki ti dir mon manm fanmir, mon zanfan, mon msye, pa deklare ou ti ganny dir ekri en let, pou konfirman – ou bezwen donn sa let an ekri. So alors mon ti a kontan konnen petet dan ou repons VP petet eklarsi dout osi bann keston ki'n ganny demande ozordi dan ka ki arive ki en *close family member of* sa *public person* pa deklare ki aksyon oubyen kwa ki pe mazin ganny fer. Mersi Madanm Speaker.

(APPLAUSE)

MADAM SPEAKER

Mersi. Vis-Prezidan, *right of reply*?

VICE-PRESIDENT SEBASTIEN PILLAY

Mersi bokou Madanm Speaker. Bonswar Madanm Speaker, bonswar *Leader* Loposizyon, *Leader* Zafer Gouvernman, tou Manm Onorab e byensir tou dimoun ki a lekout deba lo sa Prozedlwa pou deklarasyon byen pou bann *spouse* e zanfan – sinon bann konzwent, bann dimoun ki san – bann zofisye piblik.

Madanm Speaker in annan e deba ase enteresan otour sa size, in annan plizyer pwennvi ki'n ganny avanse, e i annan plizyer keston ki'n ganny met devan pour ki nou devan isi lo *panel* nou sey reponn pour nou adres sa bann keston.

Mon krwar i enportan pour nou konpran, premyerman si oule lanvergir sa Lalwa e aköz i nesese pou annan en tel provizyon dan Lalwa.

Sa provizyon dan Lalwa i ranforsi Lalwa e fer li bokou pli, bokou pli transparan dan le sans ki i permet annan en lot nivo kouvertir an sa ki konsern bann dimoun ki ganny *endowed* avek byen piblik.

Aköz nou dir sa Madanm Speaker? Mon krwar i enportan pour nou konpran sa perspektiv byen. Pran par

egzanp en dimoun ki li i dan en biznes. Sa dimoun ki dan en biznes i fer en aktivite biznes, i kree larises atraver son aktivite biznes. Atraver larises ki i kree, al dan son aktivite biznes, i anploy bann dimoun, son bann travayer e i osi pey son *tax*, i osi pey son byen. Savedir i kree larises pour pei.

Sa larises ki i kree pour pei i ede pour pei met an kad an plas en kad administratif, e i annan diferan nivo sa kad administratif pour pei. I annan son nivo pli ba, ziska son nivo pli o.

Prezan nou tou nou'n tonm dakor konman en sosyete pour ki pour nou annan en kad administratif pli o, nou fer en prosesis seleksyon.

Savedir en eleksyon ki permet sa bann dimoun ki fer sa bann aktivite swazir lekel ki zot pou met la pou diriz sa administrasyon e son bann kad ki vin ava anba la. Savedir sa bann zofisye ki pour annan sa bann opozisyon piblik.

Mazin byen kot mon ti komanse sete en premiz ki sa dimoun ki kree larises ki permet nou kapab annan sa bann pozisyon.

Prezan ler sa dimoun ki'n kree larises i permet nou kapab annan sa pozisyon i donn nou tou sa bann privez ki vin avek

sa. Eski nou pa drwa sa dimoun en *accountability mechanism*, en striktir transparan pour li konnen, be ki mon larzan pe ganny depanse?

Par egzanp, si bann Manm isi anndan i annan en *laptop* ki ganny donnen atraver Lasanble Nasyonal, sa *laptop* i ganny aste atraver larzan ki pei i zenere e i donn Lasanble Nasyonal pour ki zot bann Manm zot kapab fer zot louvraz e ed zot bann *Constituents*, e delivre lo zot fonksyon.

Me zot pa'n kree en larises pou aste sa *laptop*. Zot pa'n fer en biznes ki kree larises pou aste sa *laptop*. Sa larises i ganny kree atraver an deor, atraver bann diferan aktivite.

So zot en resipyan sa benefis. Me koman en resipyan sa benefis, eski i pa devret annan en sistenm ki gard nou e zot *accountable* pour sa benefis ki ou pe gannnen? Se pour sa kot en Lalwa ki konsern deklarasyon byen i vini.

Prezan ler ou, ou pe ganny sa bann benefis ki vin avek, par egzanp lo pli o nivo sa bann benefis i diferan aköz i ed ou akonplir devwar dan ou louvraz, ki swa pour ou telefonn, ki swa pour en lofis, ki swa pour *staff* dan sa lofis. Tousala i depan lo sa *taxpayer*, sa kontribyab la deor ki permet

nou annan sa bann keksoz ki permet nou fer sa travay pour sa *taxpayer*.

So nou travay pour sa *taxpayer*, me nou gard sa *taxpayer accountable* atraver bann diferan regilasyon nou. Nou met an plas en sistenm *tax* ki swiv li pou fer sir i peye. Byensir nou pey *PIT*, (*Personal Income Tax*), me ki lot sistenm *accountability* ki nou annan nou?

Li i anrezistre avek Rezistrar, i annan bann prosedir ki i bezwen met an plas. Personn isi anndan pa anrezistre ek Rezistrar. So nou sel *accountability system* se nou bezwen *inbuild* bann striktir anndan apard ki sa lot *accountability* system ki li i vin tou le kan?

Tou le 5an, kot nou al debout dan en eleksyon, e la dimoun i deside, mon pour vot pou ou oubyen mon pa pour vot pour ou baze lo program, lo travay lo ou *delivery*, lo ou performans.

Se sa ki nou pe fer. Nou pe donn konfyans sa dimoun an deor pou dir li poudir, be *ok*, nou pe azout en lot *layer* dan sa striktir transparans, pou fer ki ou la deor ou a dir, be *ok*, aköz sa ki mon pe donn li par egzanp admeton par egzanp zot pe donn en transpor. Be sa

transpor i ganny servi petet dan serten ka pou transport konzwen sa dimoun. Sa bann benefis ki a vin atraver lofis sa dimoun pe ganny servi pour siport sa fanmir.

Sa saler ki vin atraver sa dimoun i ganny servi pou siport son fanmir, son devlopman. E se pour sa rezon alors ki ou bezwen ganny *held to en accountability system*.

Now, si pandan letan ki en *public servant* i en – i pa en *public servant*, me en *public officer*. I en *public officer*, i akwat plizyer lezot benefis. Annou get li lo lot kote.

Zot in war lo kote ki mannyer i pou difisil pour nou konman - mon dir nou aköz mon enkli konman en zofisye piblik. Zot in eksplike ki mannyer i pou difisil bann konsern ki zot pou annan. Ki mannyer i pou ete pour en dimoun deklare. Be sa ki zot pa'n eksplike se son lot kote.

Son lot kote kot i posib ou aste en lakaz, e nou dir dan sa lemonn aktyel personn pa pour fer. Ou konnen i annan en keksoz ki toultan nou dir, “si mon ti konnen” aköz Simon toultan ti konnen li. Nou ti ava’n fer en deklarasyon pour bann *spouse* avek bann zanfán.

So dan plas ki nou al dir si mon ti konnen, alors nou met

en deklarasyon pou *spouse* e zanfan, nou met li dan Lalwa. E sa kad legal pa pou reste la. I pa kapab reste statik, i pou bezwen kontinyen ganny evolye pou kontinyen donn konfyans piblik poudir sa larzan ki nou pey nou bann dirizan i anmenn en rezilta pou fer ki nou lavi, zot lavi e lavi tou dimoun, lavi sa pep i vin pli byen. *But at the same time*, zot pe ganny zot osi valer pour zot larzan. Se sa ki ou bezwen demande.

Eski koman *LOTO Leader* Lopoziyon, kestyon fondamantal, eski ou pe donn Lepep Seselwa valer pour son larzan? Eski mwan koman Vis-Prezidan mon pe donn Lepep Seselwa valer pour son larzan?

Sa i en kestyon fondamantal ki nou bezwen komans demann nou lekor aköz nou pep pe komans vin pli edike, pli konpran politik e pli konpran son rol vizavi son Leta.

E se pour sa rezon ki focus i bezwen lo *delivery* me pour kapab *focus* lo *delivery* fodre ou *avoid* bann tantasyon pour ki bann laspe ki kapab ede pour fer *delivery* i ganny retire ek Leta e ganny mete partou isi laba lo *spouse* oubyen sa zanfan, sa ki i pe fer i pe kree en lot nivo transparans.

Ou a permet mwan prezan Madanm Speaker pour reponn

serten kestyon ki'n ganny souleve par bann Manm, baze lo bann komantr ki zot in fer e pour kapab sey eksplike.

E si oule sey konvenk zot aköz ozordi apre midi, i dan lentere sa Lasanble pour aprouv sa premye Prozedlwa an sa ki konsern *Public Person Declaration of Assets* aköz i pour annan ankör ki pour bezwen vini.

I bezwen annan ankör ki pour amelyor li prenon kont son konfigirasyon kot i ete ozordi ki bann mankman ki annan. Me sa ki enportan se ki ozordi ti ava en bon nide, sa ki vot kont sa Prozedlwa oubyen pa sipört li, mon santi dir tou sa ki oule ou pe vot kont latransparans.

Prezan Madanm Speaker annou regard bann, enn de bann - enn de bann pwen ki'n ganny souleve, Onorab Larsen in fer enn bann pwen fondamantal ki in fer se protez lentere piblik e se sa ki mon'n komans mon lentervansyon par eksplike.

Onorab Colin Titrant ou'n koz lo diferan keksoz e ou'n demann detrwa kestyon ki ou ti dir mon reponnpou ou. Par egzantp ou'n koz lo si i annan en diferans ant en konzwen, premyerman ou'n koz lo eski sa pa pou dekouraz bann dimoun

pou antre dan politik akòz zot pe oblig zot deklar zot byen?

I pa pe dekouraz person, sa ki i pe dir ek ou, ler ou vin dan politik, ou ti annan sa boutey ki la, ou deklare ou annan sa boutey. Akòz demen si ou sorti dan politik ou annan 4 boutey, i normal pou leta demande be ki mannyer ou annan 4 boutey ou ti antre en enn. Kan mon ti pe peye pou petet pou ou kapab aste ankò zis enn. So sa 2 lezot ki ou'n gannnen i bezwen annan en fason.

Ou pa kapab koz lo transparans e koz lo sa ki'n pase ki'n arive, san ki ou pare pou met ou pozisyon o kler koman- ozordi koman en dirizan poudir *going forward* sa ki mon oule war.

So, i pa en dekourazman i pa pe anpes person pou dir ou annan en zanfan ki pe al etidye deor, ou pey son *scholarship*, napa person ki anpes ou peye pou kapab pey ou *scholarship*.

Me ou deklare si i ariv en pwèn pou deklare pou dir be mon'n pey *scholarship* mon zanfan ki'n al aletranze, mon pe demann li en *stipend* aletranze, napa naryen mal avek donn ou zanfan en *stipend* aletranze. Tou paran i travay i *save* son larzan akòz ozordi bokou paran ki zot pe fer? Zot pe *save* zot

larzan pou anvoy zot zanfan dan lekòl prive akòz zot santi poudir i a donn en meyer opsyon zot zanfan demen ler i kot lekòl. So, i normal.

E Leta in rekonnet sa ki i annan en zefor ki bann paran i fer. Souvandfwa i pa bann paran ki eze ki tro eze ki pe fer sa, i annan paran ki i bann dimoun ki lo milye, lo klas sosyal lo *middle class* - dan klas mwayenn ki pe *save* en kantite pou anvoy zot zanfan lekòl prive.

Eski i vedir poudir si ou, ou annan en madanm ki ou'n marye avek e en dimoun i annan son partner ki i pa'n marye avek, eski i vedir poudir sa i en de balansman? Be si nou regard Lalwa i osi koz lo sa size *the close associate* - en dimoun ki pou annan en akse finansyer.

Mwan mon krwar si ou en *public servant* e si ou *aspire to be transparent* e form i permet ou pou mete poudir be mon annan en *partner* ki mon donn li en *stipend*, oubyen mon'n donn li en *flat*, oubyen mon'n donn li en apartman, oubyen ou'n donn li en loto *whatever* ki ou'n donn li ou mete.

Sa i *ok*, be si ou napa ou pa'n donner ou pa bezwen donner. Ou pa bezwen mete si ou pa'n donner me si ou'n donner ou mete, akòz in dir ou,

in dir ou si ou annan en tranzaksyon finansyel ki ou pe fer ou mete.

Se sa ki i pe dir ou, i pa pe dir ou pa fer li, i pa pe dir ou napa donner, sa ki i pe dir ou se ki ou deklare ler ou donner, mon pa war kwa ki annan mal avek sa. Petet sa ki ava mal avek sa se ki si ou pa pe donn naryen, ou pa pe ede pou siport sa dimoun e sa dimoun pe viv lo li menm ou pe oublie si sa dimoun pou deklar son *asset*, me Lalwa i kle sa, si sa dimoun pe siport son lekor i napa naryen pou li kasyet.

Ki aktivite finansyel ki ou pe fer dan en pei ki ou pou bezwen kasyet? Eksplik mon sa kekyon fondamantalman. *Unless* i en aktivite ilegal eski i annan en rezon pou ou kasyet en aktivite ki pou permet ou ganny ou gannypen? Pa vwar rezon, so se pour sa rezon ki i bezwen annan en prosesis pou kontinyen fer deklarasyon *asset* e se pou sa rezon ki sa Lalwa pe vin dan sa perspektiv.

Eski sa Lalwa i fer provizyon pou bann dimoun ki an menaz, wi *to a certain extent* aköz si parey ou regard kot *civil* apre en serten letan menm si ou pe viv dan en *common law relationship* savedir ou pa'n marye ou pou ganny konsidere koman en *partner* sa *spouse* sa

dimoun depandan lo la kantite letan ki ou annan.

So dan *close associate* i kouver en morso, be sa dimoun ki pe viv dan menaz i pou ganny kouver anba sa definisyon ki *Civil Code* i la. So i deza egziste provizyon legal pou fer sa kouvertir, so si ou annan en *partner* ki ou pe viv avek pou 5an, 6an, 7an i pou ana en kouvertir ki ganny fer.

Akoz i pou vin ou *common law spouse*, aköz li menm leritaz in prevwar poudir ler ou fer sa dimoun pou mor ou pou bezwen kit en larzan pou li menm si ou'n annan en relasyon avek li pou plis ki 7an aköz in *subsist* pou sa kantite letan, in egziste pou sa kantite letan.

Sa ki pa ti deklare avek ladministrasyon avan eski zot pou deklare sa fwasi? *Well*, i enportan ou nenport dimoun ki pa'n fer son deklarasyon pou fer li pou anliny avek Lalwa.

I neser pou tou dimoun reste anliny avek bann provizyon Lalwa si nou pe, si Lasanble Nasyonal i pas en Lalwa e ou ki sa- ki pe pas sa Lalwa ki ou'n vot kont, ki ou'n vot pour, *at the end of the day* ou ganny en responsabilite kolektiv aköz i pou dir ou se Lasanble ki'n pas sa Lalwa ou bezwen reste anliny avek ban

provizyon sa Lalwa. Sa i neseler.

Petet en keksoz ki Gouvernman avan in fer ki petet se en fot, se ki ler ou'n pas li anba ACCS, ACCS son *focus* parey nou tou nou'n vwar i lo bann case ki annan, i annan pou fer ek koripsyon eski sa legar ki'n ganny mete lo sa Lalwa i parey ki si i ti annan son *commissioner* pou li menm, ki ti ti pe regard li.

Akoz pa bliye, ti annan en letan avan ki sa Lalwa i al kot Mrs May De Silva ti Mr Bernadin Renaud. So, i eski bann sanzman ki zot in fer pa zis dan sa konteks me sanzman kot nou pas sa Lalwa sa i fer li byen. Ti annan osi en prose en provizyon pou fer *online declaration*, me sa i tou depan lo sa lazans ki pe fer pou li war ki mankman ki i ana e pou *oppose* bann lamannman.

Me si sa lazans pa vin devan pou dir nou kekfw ki manke dan sa Lalwa i pou en pe difisil pou nou konnen ki pou propoze ou bezwen dir nou kwa ki manke pou ed ou pou fer *monitoring* ou Lalwa.

In annan serten komanter ki'n ganny fer Madanm Speaker, lo par egzantp lo sa ki nou'n anmennen koman *Private Members Bill*, avek la e mon krwar Onorab Uranie e Onorab

Adelaide. Onorab Adelaide petet en keksoz ki mon bezwen demann ou se ki, nou 2 frer, nou'n dan Lasanble i a fer nou trwazyenm fwa nou rankontre. 2 manda, 2 manda ansanm.

Be ou ti annan en mazorite mon ti anmenn en Lalwa ki ti pe propoze pou fer sa deklarasyon piblik e ou ti vot kont e ou ti koz kont. Mon ti menm anmenn en provizyon Dan sa Lalwa pou fer ki sa lamannman i vot retrospektiv, e zot ti vot kont zot ti koz kont.

Ozordi zot vini zot dir ek mon poudir la zot, zot pe al anmenn atraver Onorab LG-Onorab LOTO i pe al anmenn en *Private Members Bill* prezan li. Eksa i enteresan tou pouvwar ti dan zot lanmen, provizyon ti ganny anmennen zot pa ti oule ozordi zot oule, selman zot menm zot, zot menm zot dan tou zot diskisyon ki zot pe dir e sa mon bezwen sey fer en pep Seselwa konpran.

Dan tou sa ki zot pe dir zot, zot kont pour ki bann *spouse* e zanf an i deklar zot *asset*. Tou zot largiman i vir otour sa me selman zot oule anmenn lamannman pou fer Lalwa pli transparan. E zot lamannman ki zot pou oule anmennen kote pou komanse, i a bezwen zis Prezidan, Vis-

Prezidan avek bann Minis ki bezwen fer.

I enteresan, mon'n tann sa lot largiman lo bann rapor medikal i paret mon poudir bann avoka ki'n toultan argimante ki rapor medikal en dimoun i sipoze prive e konfidansyel, i ozordi vin propoze ki rapor medikal en dimoun i vin en size piblik.

Konmsi ou konnen, Onorab Georges i dir mon konn li, i konn mon tre byen, i konnen poudir mon ou bezwen montre poudir in annan en labsous dan son largiman aköz in sey anbet Lasanble me i pa'n reisir aköz nou'n war li dan kler. E mon war li en pti pe ankoler, pa ankoler Onorab.

Sa ki mon bezwen dir Madanm Speaker, nou'n ganny dir poudir nou pe sakrifye *quality of a speed* non sa ki nou pe fer se donn Lepep Seselwa loportinite pou vwar ki ler ou en Gouvernman e ou fer en *commitment* avek li atraver en *manifesto* ou bezwen delivre lo sa *manifesto*. E mon krwar i pou dan sa konteks Prezidan Herminie pou en *torch bearer*, so to speak.

I pou en *flag bearer* aköz i pou enn parmi bann Prezidan ki koman in antre dan lofis son *delivery rate* lo son bann *commitments* i parmi bann pli o

ki'n deza annan. E si nou konpar *the previous 5 years* kot sa ki nou'n tande se ki i annan fristrasyon dan *public service* premye lannen e fristrasyon dezyenm lannen e fristrasyon trwazyenm lannen.

Prezidan Hermine pa'n koz ditou lo fristrasyon, in koz plito lo ki bann keksoz ki annan pou fer dan son premye 100 zour e in set son lekip en latas e mwan mon form parti son lekip e mon la mon siport son travay aköz mon krwar dan son vizyon e ozordi parey yer mon'n vin devan Lasanble pou fer sir ki sa vizyon i ganny realize.

Se sa linite ki annan dan *United Seychelles*, se sa *unity of purpose* ki nou annan pou nou delivre i pa, i napa naryen pou fer avek konsider konotasyon politik en lot dimoun sa, i annan pou fer avek anmenn en Gouvernman ki ou delivre pou Lepep aköz nou en Gouvernman ki pou Lepep par Lepep e sa i enportan pou nou konpran.

Madanm Speaker, in annan bokou largiman lo aköz nou pa ti'n anmenn sa depi avan, aköz nou pe *rush*, aköz nou bezwen fer sispann *Standing Order* en keksoz ki mwan personnelman ler mon ti *Leader* Lopozişyon mon ti ekstrememan kontan,

well be aköz nou'n gat en mwan koman tranzisyon.

Nou pei i fors- *sorry* pou dir Lepep Seselwa, nou'n gat en mwan koman tranzisyon aköz pandan en mwan tranzisyon Gouvernman in annan zis 2 dimoun, in annan Prezidan e Vis-Prezidan e Prezidan ti Minis pou tou keksoz. In bezwen fer tou sa travay.

E pou mwan i formidab ki mon pa konnen is ou pe rod rikord medikal Dr Herminie be selman pou li kapab *run* en pei lo li tousel pandan pres en mwan mon krwar ki in fer tou sa travay mon krwar ki son rikord medikal i koz pou li menm. So, pa vey rikord medikal nou Prezidan vey zot rikord medikal, petet kekfwa pou zot ki annan en problem.

En keksoz ankor Madanm Speaker, ki'n arive pandan sa en mwan sa tranzisyon se ki non perdi letan aköz zisteman *public service* pa ti konnen ki pou fer.

E *sorry for*, mon pa pe blanm *former President*, me an sortan i pa'n fer i sa rol Egzekitiv ki in donn son lekor anba Lalwa ki ti ganny amande i pa'n fer, i pa'n zwe, in napa okenn kad administratif ki in donn desizyon. Ni pou fer okenn keksoz, ni pou pran en desizyon lo okenn naryen.

So, pei in perdi en mwan e se pou sa rezonn ki nou pou bezwen revwar sa zafer tranzisyon aköz i zis kre en dezord dan lafason ki Gouvernman i fonksyonnen e fer ki ozordi Gouvernman dizour i ganny blanmen aköz nou pe anmenn en Lalwa devan Lasanble e ki mazorite ki reprezant Gouvernman pe bezwen demann sispann *Standing Order*.

Nou pa ti pou bezwen demann sispann *Standing Orders* si nou ti'n ganny sa 1mwan pou nou servi pou fer sa travay. Madanm Speaker, i enportan ler nou koze pou nou regard la realite an fas, la realite an fas i senp.

E mwan mon komans konpran, mon konpran sa tre byen pandan letan ki nou'n fer kanpanny, e fodre za zafer dir en dimoun met son figir lo poto fodre nou aret dir sa, fodre nou aret dir. Aköz souvandfwa la ler ou pe dir en dimoun met son figir lo poto tasyon zour i mete apre ou war li kot i arive e prezan ou komans blanmen. *Ok.*

I enportan ki zot bezwen met an perspektiv Madanm Speaker, aköz sa Lasanble i bezwen devlop li en lot kiltir travay en kiltir travay ki pa melanz diven ek delo. Zot in

prefere apre midi dan plas koz lo sa lamannman e sa son merit sa lamannman ki zot, ki zot dakor avek an prensip me selman zot pa pou sipote pou kelkonk rezon aköz i form par program 100 zour Prezidan.

I pa ase *smart*, i pa ase *quality driven*, me selman ler ti donn ou en *quality driven* ou ti dir zot ki annan mazorite e zot ki dir ki pou fer e vot kont sa Lalwa. Sa ki en problem avek zot ozordi, e ozordi nou pa kapab blanm person pou prodwir ki nou pe gannyen aköz sa i prodwir ki bezwen anmenn nou *to the next step*.

E mwan mon krwar tou dimoun ki pe ekoute la deor, pou get zot ozordi. Zot in ganny en dezyenm sans, premye sans zot ti gannyen zot ti vot kont, ozordi ankore zot in ganny en sans e zot pou fer, zot in fer letour sa largiman, lekout sa largiman pou koz lo ki mannyer i pou vin en problem pou al rod mon *spouse* deor mon piti deor eksetera.

Lalwa in dir ou s aki depan lo ou, me sa ki depan lo ou, *ok*, sa ki depan lo ou. Zis parey sa madanm 72an ki Onorab Tirant pe dir mwan in ganny arete malapropo. Mwan si mon ti dan lopozisyon sa madanm ti'n ganny arete sa tapaz ki mon ti pou fer, la anndan lo son *behalf*

pa ti pou bar mwan e tou dimoun i konnen sa.

Akoz mon ti pou defann lentere sa madanm ki'n ganny arete malapropo *for wrongful arrest*. Me vin konplent dan Lasanble *about it* Onorab, ou ti devret fer ou louvraz Onorab, sa ki ou ti devret fer. Sa ki mon kapab dir ek sa Lasanble Madanm Speaker, sa ki mon kapab dir ek sa Lasanble i senp, devan zot, zot annan en propozisyon pou en lamannman ki zot devret vot an faver.

Akoz zot devret vot an faver aköz i en *step in the right direction*, in *set out* sa ki nou oule fer, in menm annan konsesyon lo lapar Gouvernman lo sa ki nou pe fer, zot ion koz lo persekisyon napa landrwa dan sa Lalwa ki dir ki retrospektiv.

Nou ti'n kapab al pli lwen nou, nou ti'n kapab dir poudir sa Lalwa pou pran lefe 2021 ler lamannman ti pase nou pa'n dir. Aköz, aköz sa bann dimoun ki ava annan zot *case* ki zot oule anmennen al devan ACCS al fer li. Sa ki nou pe dir poudir nou Gouvernman *going forward* nou pou fer sa.

Si zot Gouvernman pa'n oule fer, *too bad* Lepep Seselwa in fer son desizyon lo zot e ozordi zot dan Lopozisyon zot

nepli dan Gouvernman. Be nou Gouvernman pou montre Lepep Seselwa poudir nou annan en o nivo transparans nou oule *accountable* avek zot e nou oule delivre lo sa ki zot in met devan nou.

Pandan sa bann dernyen zour Madanm Speaker, ki mon ganny sans enterakte avek plizyer dimoun enkli dimoun i dir bonzour ki klerman pa'n vot pou nou, enkli dimoun ki sorti dan sa bann fanmir e sa ki kler se ki tou dimoun i oule en keksoz pou Sesel *going forward*.

I oule en Gouvernman ki travay ki delivre, i oule ne Gouvernman ki kapab fer sir poudir realiz lo bann proze lo bann promes ki ganny fer e si promes pa kapab ganny realize *être* fran *être* onnet, vin devan Lepep e dir sa bout mon pa kapab fer. Pa pretann pou fer 26 miting dan 26 distrik pran 200ekek ka par distrik apre naryen pa ganny fer lo sa bann ka.

Mon'n dir bomaten poudir mon pe pas mon letan regard dan sa bann *file* zisteman pou adres en kantite sa bann problem. Mon *issue* Madanm Speaker, i senp, ozordi Lasanble i annan en swa, vot kont lo sa kote lans en lapel avek- lans en mesaz avek Lepep Seselwa poudir zot in fer *the*

exact choice ki zot ti devret fer. Vot an faver, e zwenn avek US pou nou travay pou sa pei. Mersi Madanm Speaker.

(APPLAUSE)

MADAM SPEAKER

Bon in ariv ler prezan pou nou prezan pran en vot lo merit *Bill*. Tou Manm ki annakor? Mersi. Okenn Manm ki kont? Mersi.

Lo kestyon merit *Bill*, vot lo merit *Bill* - 17 Manm in vot pour e 13 in *abstain*. Mon ava demann Clerk pou fer *Second Reading* silvouple. *Sorry* 13 -13 in vot kont. Mon ava demann Madanm Clerk pou fer *Second Reading* silvouple.

MADAM CLERK

An Act to amend the Public Persons (Declaration of Assets, Liabilities and Business Interests) Act, 2016. Mersi Madanm Speaker.

MADAM SPEAKER

Mersi. Avan nou al dan *Committee Stage*. Mon pe vwar ki nou napa okenn amannman lo sa *Bill*. E alors si napa okenn amannman, nou ava petet pran en Mosyon pou *suspend the Standing Orders* pou... Onorab Lemiel?

HON SYLVANNE LEMIEL

Mersi Madanm Speaker. Madanm Speaker, anba *Order 71(1)* mon demann ou permisyon pou mwan *move* pou sispann *Order 70* ziska *75*, pou sot *Committee Stage*.

MADAM SPEAKER

Onorab Vidot?

HON AUDREY VIDOT

Mosyon i ganny segonde Madanm Speaker. Mersi.

MADAM SPEAKER

Mersi. Nou ava pran en vot lo Mosyon. Bann Manm ki aprouve? Mersi. Okenn Manm ki vot kont?

Alors lo Mosyon pou sot *Committee Stage* e sispann *Standing Orders*, i annan 17 Manm ki'n vot pour, avek 13 abstansyon. Alors, nou ava sot *Committee Stage*. E mon ava demann en Mosyon for *Third Reading*.

HON SYLVANNE LEMIEL

Mersi Madanm Speaker. Madanm Speaker anba *Order 76 (1)*, mon *move* ki *Public Persons (Declaration of Assets, Liabilities, and Business Interests) (Amendment) Bill, 2025* i ganny lir pou en *Trwazyenm Fwa*. Mersi.

MADAM SPEAKER

Mersi. Onorab Vidot.

HON AUDREY VIDOT

Mosyon i ganny segonde Madanm Speaker. *Thank you*.

MADAM SPEAKER

Mersi. Nou ava pran en vot lo *Third Reading*. Tou bann Manm ki annakor? Mersi. Okenn Manm ki kont *Third Reading*? Mersi.

Lo *Third Reading*, vot lo *Third Reading 17* Manm in vot pour e 13 in vot kont. Nou ava demann Clerk pou fer *Third Reading* silvouple.

MADAM CLERK

Mersi Madanm Speaker. *This Act may be cited as the Public Persons (Declaration of Assets, Liabilities and Business Interests) (Amendment) Act, 2025*. Mersi Madanm Speaker.

MADAM SPEAKER

Mersi. Avek sa *Bill Public Persons (Declaration of Assets, Liabilities, and Business Interests) (Amendment) Bill* in pase. Nou ava remersye Vis-Prezidan avek son tim e eskiz li dan *Chamber*.

E avek sa ki nou alors termin tou bann biznes ki lo *Order Paper*. E mon'n ganny en konpran ki dan bann dernyen lannen, dernyen Lasanble ti en

tradisyon ki tou bann Manm in ganny en sans poudir en pti mon pou 1 minit. Mon ava komans avek *Leader* Lopezisyon. Onorab Georges?

HON BERNARD GEORGES

Mersi Madanm Speaker. Madanm Speaker, eski mon'n konpran ou poudir tou bann Manm pou ganny sans koze? Wi. Mersi.

Mersi Madanm Speaker. Madanm Speaker, mon ti a kontan. Mersi Madanm Speaker. Mon ti a kontan pran sa lokazyon pou remersye ou pou donn nou sa loportinite avan ki nou al dan nou *recess* ozordi, pou dir detrwa mo lo nou par.

Madanm Speaker, mon ti a kontan premyerman remersye ou Onorab Clerk, Onorab Deputy, tou bann *staff* Servis Lasanble pou zot sipor depi ki nou'n retournen dan sa 4enm term sa Lasanble. Sa premye term 8enm Lasanble, e 4enm term sa lannen ki nou ladan la ozordi. Zot travay in ganny byen apresye.

Mon ti a osi kontan remersye tou Manm mon *Caucus* ki'n la pou donn mwan sipor. E osi tou bann Manm *Caucus US*, dirize par mon koleg Onorab Lemiel pou sa *entertainment* ki zot in donn

nou depi ler nou'n vin isi. In fer nou travay eksitan. In fer nou travay enteresan, nou pa'n toultan dakor mon kapab kekfw dir nou pa'n zanmen dakor.

Me *at least*, nou'n pas en moman enteresan ansanm. E mon swete ki bann nouvo Manm lo tou lede kote in aprann detrwa keksoz la avan ki nou al dan *recess*. E zot ava retournen lannen prosenn avek en pli enportan.

Mon ti a kontan osi lo lapar mon *DA*, Mrs Mercia Denis, Mon Clerk Manmzel Nathanielle Agricole. E mwan menm remersye bann zabitan Les Mamelles pou konfyans ki zot in mete dan mwan pou anvoy mwan ankor enn fwa isi dan Lasanble Nasyonal pou reprezant zot dan sa 8enm Lasanble.

Mon remersye zot dan fon mon leker, zot konnen mon pou la pou zot toultan. E mon profit sa moman pou mwan swet zot en Zwaye Noel e en Bon Erez Ane. Mersi Madanm Speaker, parey mon'n dir pou donn nou sa lokazyon.

Mon swete ki zot tou *staff* Lasanble *including* ou Clerk e Deputy Clerk i ava pas en bon moman festivite. E nou ava retournen an Zanvye avek plen determinasyon pou nou

komans en lannen travay.
Mersi bokou Madanm Speaker.

MADAM SPEAKER

Mersi. Onorab Lemiel.

HON SYLVANNE LEMIEL

Mersi Madanm Speaker. Madanm Speaker, Madanm Clerk, Deputy Clerk. Tou bann *staff* Lasanble Nasyonal, tou mon bann koleg *LDS*. E tou Manm isi lo kote *US* nou swet ou, nou swet zot sirtou lo kote sekretarya ou menm Madanm Speaker, Madanm Clerk, Deputy Clerk e tou *staff* Lasanble Nasyonal en Zwaye Noel ki pe vini. E en Bonn Erez Ane.

E mon espere ki komansman lannen tou keksoz nou komans li *fresh*, nou komans li byen. E nou remersye ou Madanm Speaker, pou ki ou'n byen diriz nou Lasanble depi ki nou'n antre. E mon swe se ki 2026 ki i reste parey. E nou kontinyen *improve* lo nou bann febles, nou sirtou koman bann Manm Lasanble.

Madanm Speaker, i donn mwan en loportinite ozordi osi pou mwan lo non *Caucus* pou nou remersye tou dimoun ki'n vot *United Seychelles* dan Gouvernman ozordi. E ki nou donn zot sa garanti ki avek sa konfyans ki zot in fer dan nou,

nou pou vremen delivre pou pep Seselwa.

So, lo non *United Seychelles Caucus* tou Manm ki lo nou kote latab nou dir pep Seselwa mersi pou zot sipor. E nou demande ki zot kontinyen donn nou sa sipor, nou kontinyen travay ansanm pou ki lannen 2026 i ava en lannen ki anmenn bokou plis prosperite, plis boner pou tou dimoun.

E Madanm Speaker, dan sa bann letan osi Nwel nou konnen i en lannen lapartaz. I en letan lapartaz, i en letan lanmour, i en letan lape. Kot nou dir nou *care* pou kanmarad, nou *share*. So, i enportan osi ki nou mazin bann dimoun. Dan mon distrik li menm Anse Royale, e osi dan tou distrik. I annan dimoun ki sa lannen i pa'n en bon lannen pou zot.

E alors nou leker i avek zot, sirtou bann ki'n perdi en Manm pros dan zot fanmir. Nou konnen petet sa enn nwel i pa pou en Nwel ki zot pou *happy*. I pou en Nwel ki kekfw a pou anmenn en bon pe sagrinasyon pou zot. Me nou priye ki Bondye i donn zot sa kouraz ek sa lafors.

E Madanm Speaker, i pa zis petet zot in perdi en pros, i annan ki annan en problem

lasante, i annan ki malad. Petet zot pa pou pe war zot pe kapab anmiz zot lekor parey zot ti abitye dan sa bann letan dan sa bann moman parey.

Nou swet zot kouraz, nou konnen Bondye i avek zot dan zot parkour, soufrans ki zot ladan. E ki i ava soulaz zot, e ki zot ava kapab war en soutyen i a soutenir zot pou ki sa bann zour festivite ki pe vini, i ava en letan kot zot bliy en pti pe sa lapenn ki zot ladan. Zot ava antoure avek zot bann manm fanmir ki kontan zot.

E ki zot ava kapab pas en bon letan. So, an terminan mon pou dir lo non *United Seychelles Caucus* nou swet tou Lepep Seselwa, ou Madanm Speaker, ou fanmir, Madanm Clerk son fanmir, Deputy Clerk son fanmir, tou mon bann koleg *LDS* avek zot fanmir en Zwaye Noel, e en Bon Erez Ane 2026. Mon pe tay ek sa lannen, 2026. Mersi Madanm Speaker.

(APPLAUSE)

MADAM SPEAKER

Mersi. Onorab Arissol.

HON SANDY ARISSOL

Mersi Madanm Speaker. Bonswar tou dimoun ki a lekout. Madanm Speaker, mon ti a kontan komans avek

sekretarya Lasanble Nasyonal anba ou gidans mon ti a kontan dir mersi tou bann *staff* Lasanble Nasyonal pou zot servis ki zot kontinyen rann nou sanses, menm nou fini en pe pli tar parfwa. Mersi bokou.

Mon ti a kontan dir mazin osi bann koleg Manm Lasanble Nasyonal tou lede kote latab dan Lasanble Nasyonal, pou mwan dir ek zot mersi bokou.

E mon ti a kontan osi remersye tou bann dimoun ki ti'n enterakte avek mwan dan tou sort fason, dan travay ki nou fer, ki mon fer koman en politisyen mon ti a kontan dir zot mersi bokou pou zot gidans, mersi pou zot konsey, zot lanmour lafason ki zot in resevwar mwan pandan sa lannen.

Mon osi mazin tou bann Seselwa ki'n perdi - zot in perdi zot plas travay la anvi ki nou pe antre dan letan festivite. Mon mazin osi tou bann dimoun ki'n perdi en Manm zot fanmir dan sa moman letan nou, nou pe al i annan nou ki pou pe selebre.

Me zot, zot pou dan lapenn. Mon mazin tou bann dimoun ki kontinyen fer tou keksoz byen pou nou pei, bann keksoz pozitiv.

Alor, lo sa note mon ti a kontan remersi zot tou. E swet zot tou en Zwaye Noel e en bon

lannen 2026. Ki Bondye i kontinyen beni sakenn de nou. E bondye i kontinyen beni nou pti pei Sesel. Mersi bokou.

(APPLAUSE)

MADAM SPEAKER

Mersi. Onorab Gill.

HON CHURCHILL GILL

Mersi Madanm Speaker. Bonn apre midi Madanm Speaker. Mon osi mon a komans par remersye ou koman latet nou lenstitisyon, avek tou *staff* sekretarya enkli bann *staff* ki travay avek nou dan Lasanble koman sipor. Madanm Clerk, Deputy Clerk ek lezot ankor. E nou apresye sa sipor ki nou'n gannyen pou sa premye trimes 8enm Lasanble. E nou swete ki sa i kontinyen.

An menm tan tou koleg dan Lasanble, tou lede kote latab zot osi nou apresye nou konnen nou travay ki'n *achieve* me selman nou apresye ki apre en letan travay nou kapab al dan *canteen* ansanm asize pran en rafresisman e retourn dan nou travay. E alors mon swet zot ek zot fanmir en Zwaye Noel e Bonnane.

E osi mon oule remersye tou dimoun dan distrik Baie Ste Anne pou sa travay formidab ki nou'n fer. E tre byento zot pou

selebre Nwel ek Lannen. Alors, mon swe se zot fer li dan lape e dan larmoni kot tou dimoun i kapab anmize byen. Me selman dan en fason dan lape. E an menm tan mon oule remersye Egzekitiv, Prezidan Larepiblik, son Vis Prezidan ek son *Cabinet* pou bann travay ki pe ganny fer ziska ozordi bann promes ki pe ganny delivre.

E mon swet zot tou ek zot fanmir en Zwaye Noel e Bonnane. E ki nou tou nou a kapab pas sa letan festivite dan en latmosfer armonye e dan la trankilite. E tou keksoz i a pas byen, san ki i annan okenn dezakor antre nou. Mersi Madanm Speaker.

(APPLAUSE)

MADAM SPEAKER

Mersi. Onorab Monthy.

HON PHILIP MONTHY

Mersi Madanm Speaker. Mon a tou dabor profite pou remersye tou zabitan Cascade ki'n fer ki mon la pou en 2enm manda ankor dan Lasanble Nasyonal ki ankor enn fwa mon pou zot lavwa dan sa Lasanble Nasyonal, pou sa prosen 5an ki pe vini. E pou sa mon remersi zot en kantite. Mon remersi mon bann aktivis ki'n ede ki nou'n kapab fer sa travay.

DA ek son lekip kot Ladministrasyon Distrik Cascade nou'n pas dan bann moman difisil. Me nou'n kit nou latet anler tou kou, nou'n travay. E zabitan in rekonnet sa travay ki'n ganny fer. Mon a osi profite pou remersye ou Madanm Speaker, pou lafason ki travay in deroule ziska prezan.

E parey lezot in dir mon swete ki nou kontinyen dan sa menm fason parey nou'n komanse. Mon remersye sekretarya. Mon remersye tou bann *staff* Lasanble, bann ki mon zwenn granmaten ler mon vini. Souvan mwan premye Manm pou arive isi dan bomaten.

E mon remersye sa ki mon zwenn ki pe netwaye, mon remersye tou *staff* ki ede pou fer nou letan ki nou pase isi kot Lasanble pli konfortab posib.

E an zeneral mon remersye tou Seselwa, sa 31mil ki'n met zot konfyans dan LDS. Kontinyen fer nou konfyans nou pou la pou kontinyen defann zot lavwa, e zot lentere. E osi mon remersye mon bann koleg Onorab pou sipor, e osi bann lezot Onorab lo lot kote latab.

Nou *leader* isi Onorab Bernard Georges ki en lespri enkrwayab ki nou santi nou

vreman nou pe ganny dirize dan en fason ki egzanpler. E ler nou, nou anba son direksyon nou santi nou vreman alez e pare pou fer nenport ki travay ki ganny met devan nou, pou nou fer. E osi *leader* lo lot kote, Onorab LGB Onorab Lemiel ki nou annan en bon lantant menm si ennler nou ganny en pti konfli.

Me selman i mon MNA, mwan mon en zabitan Anse Royale. E mon swet li de bon dan son nouvo responsabilite ki in pran. E an zeneral Zwaye Noel, Bonnane tou Seselwa. Ki nou fet dan lape e nou komans en nouvo lannen 2026 dan lape e nou kontiny travay pou sa pep. Mersi.

(APPLAUSE)

MADAM SPEAKER

Mersi. Onorab Aglae.

HON EGBERT AGLAE

Mersi Madanm Speaker. Dabor mon ti a kontan remersi nou lenstitisyon Lasanble Nasyonal. Premyerman ou menm Madanm Speaker, Madanm Clerk, Depite tou *staff* sekretarya an zeneral pou sa sipor ki Lasanble pe gannyen pou kontinyen fer sa travay.

Mon osi oule remersye tou mon bann koleg Onorab isi lo

kote latab *US*, depi *LGB*, *Chief Whip*, depite pou sa sipor ki zot pe donnen e travay ki nou pe fer pou dan lentere pep Seselwa. E osi mon rekonnèt *Leader* Lopozisyon pou bonne korperasyon, son *Chief Whip* e tou bann Manm pou ki lavansman Lasanble i kontinyen.

E mon ekspekte sa arive lannen prosenn. Mon osi oule remersi premyerman osi mon fanmir ki'n siport mwan pandan sa parkour politik ki mon ladan. Tou nou bann siporter distrik Port Glaud, enkli tou zabitan menm si ou pa'n vot pou mwan, mon la pou travay pou ou e pou ekout ou.

E osi mon rekonnèt *staff* Ladministrasyon Distrik ki enkli mon *DA* Ms Clarence, *office manager* e son bann *supporting staff* pou ki travay ki nou'n fer pandan sa lannen 2025.

E mon oule swet Prezidan li menm, son *Cabinet*, tou bann dimoun dan servis piblik, tou Seselwa an zeneral pou zot pas en bon Zwaye Noel e en Bonn Erez Ane 2026 dan lape e prosperite avek lespwar ki tou keksoz i ava dan lentere sa travay ki nou fer, i ava dan lentere pep Seselwa.

E ki lannen 2026, nou a kontinyen ganny zot sipor pou

nou kapab ganny plis sa kouraz ek determinasyon pou kontinyen ek lagras Bondye. Mersi.

(APPLAUSE)

MADAM SPEAKER

Mersi. Onorab Clarisse.

HON DENISE CLARISSE

Mersi Madanm Speaker. An premye Madanm Speaker mon oule senserman remersye distrik Bel Ombre an zeneral, spesyalman sa group dimoun ki'n vot pou mwan.

E osi pou sa ki pa'n vote, aköz koman en distrik en keksoz ki mon ti dir dan mon konpanny se asir enklisivite. Asire ki tou dimoun i ganny valorize, e se sa ki mon pe donn garanti distrik Bel Ombre mon pou fer pandan sa 5an ki pe vini.

E parey zot konnen pou mwan i mon premye manda ki mon pe deservi, e ki mon pe zwenn Lasanble Nasyonal. E alors mon profit sa lokazyon pou remersye sekretarya Lasanble Nasyonal tou son *staff* ki'n fasilite sa prose pou mwan kapab *settle* Lasanble tre byen, pou mwan santi mwan tre konfortab.

E osi pareyman pou tou mon bann koleg *LDS* e tou bann

lezot koleg *US*, apre tou nou tou nou imen. Nou bezwen travay ansanm malgre diferans e lapartenans politik, akòz apre tou nou bezwen fer keksoz *for the betterment of the people of Seychelles*. E nou koman *LDS*, e mwan koman en Onorab Elekte pou distrik Bel Ombre mon met mwan a dispozisyon tou dimoun.

E mon swete ki pandan sa letan festivite, nou fer li avek plen ferver dan lape, larmoni. Pli enportan fanmir ki swa sa lannen okenn dimoun ki'n perdi en pros ouswa pou en rezon ou en lot zot Nwel e Lannen pa pou neseserman enn ki vreman akeyan, oubyen zot kapab zourir. Pa zanmen bliye zot pa tousel, i pou toultan annan en dimoun en zorey pou lekout. E mwan mon swet tou de bon sekretarya Lasanble Nasyonal, tou Seselwa an zeneral.

E mon swete ki Nwel e sa lannen 2026 i komans lo en bon not. E parey mon kontan dir toultan, i enportan pou nou anmenn sa lekip an tim. E mwan mon vreman, vreman apresye.

Mon annan Onorab Bernard Georges koman *the head of* nou tim. Mon pou aprann bokou e definitivman nou pou kontinyen bouz devan 2026 lo semen pozitivite

ansanm avek *LDS* sirtou distrik Bel Ombre. So, avek sa mon ava dir ou mersi Madanm Speaker.

(APPLAUSE)

MADAM SPEAKER

Mersi. Onorab Vidot.

HON AUDREY VIDOT

Mersi Madanm Speaker. Madanm Speaker, premyerman mon oule dir en granmersi Bondye Papa pou *at least* sa lannen antye 2025 pou lasante. E bann *blessing* ki'n vin dan mon lavi diran sa lannen 2025. E sipor, gidans, dan bann moman difisil ki mon'n fer fas avek dan sa lannen 2025.

Mon oule osi remersi tou mon Manm Fanmir ki'n la touzour akote mwan pou donn mwan sa sipor. En remersiman osi pou mon lekip *campaign* ki'n donn mwan en kantite sipor dan sa dernyen eleksyon, pou ki permet mwan avek gidans e byensir avek konfyans remersiman ankor pou mon bann zabitan Roche Caiman pou ki zot donn mwan sa konfyans ankor enn fwa, en 3enm manda pou reprezant zot dan Lasanble Nasyonal.

E parey mon ti donn mon langazman ansanm avek zot, nou pou travay pou byennet nou kominote Roche Caiman

pou anmenn plis linite. E pou nou travay pe enport nou diferans ki nou kapab annan.

Me lesansyel nou travay ansanm pou byennet nou distrik. Mon remerci spésyal pou Madanm Linda Moustache ki'n toutan la akote mwan diran mon karyer politik, koman mon *political aid*.

In toutan gard sa lwayote. E tou bann ansyen Manm Lasanble 6enm, e 7enm osi ki'n la pou donn mwan sa koudmen. E byensir mon bann koleg osi ki la dan 8enm Lasanble, mon oule remerci zot tou pou nou langazman ansanm pou nou kapab fer sa diferans pou Sesel.

Mon oule remerci sekretarya Lasanble komansman par ou menm Madanm Speaker avèk tou ou lekip ek tou bann travayer ki depi ler nou bann Manm nou antre dan sa baro pou vin travay nou dir zot merci.

Mon oule remerci tou bann dimoun tou bann travayer dan Ladministrasyon Distrik Roche Caiman pou zot devouman e travay ki nou'n annan ansanm.

Mon pa kapab terminen par osi dir en gran merci pep Seselwa pou konfyans ki zot in donn *United Seychelles*, pou ki ozordi nou kapab anmenn en nouvo souf pou Sesel. E byensir

avèk en lekip solid dan Lasanble Nasyonal pou nou kontinyelman defann zot lentere, zot byennet.

E mon ti a kontan avèk ou permisyon Madanm Speaker, mon konnen mon koleg Onorab Jean Toussaint pou rezon medikal i pa la. me lo son non i oule profite pou dir en remersiman son zabitan bann dimoun Anse Boileau. E nou a swet tou pep Seselwa e zabitan Roche Caiman, zabitan Anse Boileau en Zwaye Noel e en Bon Lannen 2026. Merci.

(APPLAUSE)

MADAM SPEAKER

Merci. Onorab Hoareau.

HON JOHN HOAREAU

Merci Madanm Speaker. Mon oule premyerman remerci ou Madanm Speaker, avèk tou ou bann travayer Lasanble ki Bondye in ekler nou pou nou pas en bon trimes ansanm.

E osi lo mon non personnel e lo non mon klark Nathalie Jeanne, e mon *DA* Mrs Tahiri Laurencine mon oule swet tou zabitan Beau Vallon en Zwaye Noel e en Bonnane 2026.

Fotespere ki lannen prosenn i a anmenn bokou plis boner ek prosperite pou zot. E mon reste touzour a zot lekout.

E osi mon remersi zot pou sa konfyans ki zot in donn mwan, zot in met dan mwan pou mwan kapab debout pou zot ankor pou sa prosen 5an. Avek sa mon a remersi ou Madanm Speaker.

(APPLAUSE)

MADAM SPEAKER

Mersi.

HON NELSIA LEPATHY

Mersi Madanm Speaker. Mon oule premyerman remersi ou. Sekretarya Lasanble Nasyonal, nou bann *leaders* mersi pou zot gidans koman en nouvo Manm e mersi pou zot sipor osi.

Mon oule osi remersye zabitan Grand Anse Mahe ki'n fer mwan konfyans dan sa prosesis eleksyon ki nou'n fek pas ladan pou fer mwan konfyans pou vin reprezant zot dan en vre Lasanble Nasyonal.

Mon oule osi remersye mon DA Ms Retania Leon ki mon krwar in donn mwan en kantite sipor depi ler mon'n antre dan lofis koman en MNA. Mon *political aid* osi, e tou bann endividi ki'n la osi pou donn mwan sipor. E sa i enkli osi mon Manm fanmir.

E mon a profit sa lokazyon osi pou mwan swet en Zwaye Noel, e en Bon Erez Ane 2026

pou ou Madanm Speaker, Deputy Clerk, Madanm Clerk, tou bann Manm Onorab isi dan Lasanble.

E en Zwaye Noel e en Bonne Erez Ane 2026 spesyal pou tou bann zabitan dan distrik Grand Anse Mahe. Mersi.

(APPLAUSE)

MADAM SPEAKER

Mersi. Onorab Tirant.

HON COLIN TIRANT

Mersi Madanm Speaker. Avan mon komanse mon ti a zis profite pou mwan senpatiz avek lafanmir Savy, en koleg ki mon'n travay avek pandan bann dernyen 15an. Mon konnen ki la dan biro sa Nwel ek sa Lannen pa pou parey, lafanmir osi pa pou parey.

Mon ti a kontan senpatiz avek son madanm Christina, son fiy Stephanie ek son garson Steven. Nou tou nou konnen ki pa pou parey Charlie pa la konmdir koze sa papa ki ti la ki ti ed nou, ki ti gid nou. Ek lagras Bondye zot kapab sirpas tou keksoz.

Madanm Speaker, mon ti a kontan remersi ou ek ou sekretarya pou byen resevwar nou, mwan espesyalman koman en zenn Onorab premye

manda ki mon'n ganny elekte.

Mon ti a kontan remersi tou zabitan Glacis ki'n ed mwan. Ki'n siport mwan pandan sa eleksyon ki ozordi mon pe asiz la lo sa sez.

En remersiman spesyal i al pou mon madanm, mon 2 zanfan, mon paran, mon frer ek mon ser, e Mrs Regina Esparon ki'n ed mwan e ki ankor pe ed mwan dan mon travay ki mon pe fer.

Mon ankor bezwen li dan mon kote pou kontinyen gid mwan dan tou sa ki mon fer. E mon ti ava profite pou mwan lans en lapel avek tou zabitan Glacis *no matter* si ou'n vot pou mwan, ou pa'n vot pou mwan.

E mon lebra i ouver, mon biro i ouver pou mwan ed nenport ki dan nenport letan zot pare, kapab pare pou apros mwan kot mon lofis.

Mon osi remersi mon *political aid* Michel ki pe devoue li osi premye fwa ki i pe fer sa louvraz, ek lagras Bondye mon krwar nou ava fer en bon louvraz. So, mon ti ava profite pou mwan dir tou zabitan Glacis Zwaye Noel e en Bon Lannen 2026. Mersi.

MADAM SPEAKER

Mersi. Onorab Claudette Louise.

HON CLAUDETTE LOUISE

Mersi Madanm Speaker. Pareyman mon ti a kontan swet ou avek ou lekip sekretarya dir zot mersi e swet zot en bon repo pou lannen ki pe vini.

Mon ti a kontan osi remersi lafanmir, mon remersi DA avek son lekip, mon Clerk Mis Anne e remersi osi tou bann ki la akote mon pou lannen 2025, mon annan en bon tim ki'n la kot mon'n arive ozordi, lenplimantasyon ki'n arive mon pa'n fer li mon tousel.

E mon swete ki lannen prosen kontinyen annan sa langazman e komitman dan bann travay lo nivo distrik. Mon profite pou swet tou dimoun en zwaye noel kantmenm i en letan festivite lanmizman, annou mazine osi reflekte lo sa ki non akonpli e lo kote nou ti ava anvi ete lannen prosen.

E mon swet zot tou en lannen beni avek bokou plis sikse. Mersi Madanm Speaker.

MADAM SPEAKER

Mersi. Onorab Romain.

HON GEORGES ROMAIN

Mersi Madanm Speaker. Madanm Speaker, premyerman mon ti a kontan remersi tou zabitan Anse Etoile pou zot sipor ki zot in donn mwan pou

mon retourn ankor dan Lasanble.

Mon ti a kontan remersi mon Clerk Mrs Dugasse, mon DA Shirley e osi mon ti a kontan remersi ou Madanm Speaker, ek tou ou *staff* pou lafason ki mannyer Lasanble in deroule. E Madanm Speaker, osi mon ti a kontan pou dir– pou tou bann dimoun frer, ser, Seselwa ki'n perdi zot travay e tou bann ki'n perdi enn zot pros mon dir zot kouraz e ki Bondye i a beni zot ki zot a kapab bouz devan dan zot lavi.

Mon ti a kontan osi remersi tou Seselwa dan en fason dan en lot ki'n siport, parey nou'n dir, ki'n siport LDS an 30 mil ekek ki'n siport LDS, mon dir zot fodre nou pa *give up* nou kontinyen. E mon ti a kontan swet tou Seselwa en zwaye noel e en bonn erez ane. Mersi Madanm Speaker.

MADAM SPEAKER

Mersi. Onorab Uranie.

HON ROCKY URANIE

Mersi Madanm Speaker. An vi ki nwel i en moman festivite kot nou senm lanmour e lazwa, linite.

Well, mon oule senpatiz avek bann zabitan Zil Pros, Digwa ki'n perdi enn zot pros sa lannen, yer menm nou'n perdi

enn nou frer Andre Ladouce, mon senpatiz avek lafanmir pou sa. Ki Bondye i donn zot kouraz e lafors pou zot kapab fer fas avek sa sityasyon.

Mon remersye mon *Caucus United Seychelles* anba gidans nou nouvo LGB Onorab Lemiel ek nou *Chief Whip* Mr Churchill Gill. Mon osi remersye mon bann koleg lot kote latav LDS pou nou kapab partaz sa letan ansanm isi.

Ankor mon remersye mon DA Barbara Barallon e mon *political aid* Heidi Gabriel ek tou Digwa ki'n siport mwan pandan sa letan kanpanny eleksyon e bann ki'n vot pou mwan e osi bann ki pa'n vot pou mwan mon swet zot en Zwaye Noel e en Bonn Erez Anne.

E mon remersye ou Madanm Clerk- Madam Speaker, Madanm Clerk, *Deputy Clerk* avek manm sekretarya san zot nou la nou pa pou kapab fer gran keksoz. Nou remersye zot alors pou tou sa sipor ki zot in donn nou pandan sa letan la. Alor mon swet zot osi en Zwaye Noel e en Bonn Erez Ane. Mersi.

MADAM SPEAKER

Mersi. Onorab Roucou.

HON MICHEL ROUCOU

Parey tou bann lezot koleg in dir Madanm Speaker, mon swet ou ek ou fanmir, Depite Speaker ek son fanmir, tou ban *staff* Lasanble.

E osi nou 2 *leaders* dan Lasanble *LOTO*, Onorab Georges, *LGB* Madanm Lemiel e *Chief Whip* Onorab Arissol e tou mon bann koleg Onorab dan Lasanble lo tou lede kote, pou zot pas en bon Nwel ek en bon Lannen ek zot fanmir zot osi. Reste *safe* ki nou ava retournen lannen prosen pou nou kontir sa travay.

Madanm Speaker, mon osi oule remersi *DA* ek son bann travayer kot Ladministrasyon Distrik, Madanm Clerk, Madanm Betina Madeline ek son fanmir espesyalman zabitan mon distrik Mont Fleuri ki nou kontinyen sa travay.

Zabitan Ile Aux Cerf osi tou ki tonm dan mon distrik pou zot pas en bon Nwel en bon Lannen ek zot fanmir e ki Bondye i kontinyen beni nou zoli distrik e tou Lepep Seselwa an zeneral nou swet zot en Zwaye Noel e en Bonn Erez Ane. Mersi.

MADANM SPEAKER

Mersi. Onorab Sandra Sultan

HON SANDRA SULTAN

Mersi Madanm Speaker. Parey Onorab Tirant in dir, mon osi mon oule senpatiz avek enn nou zabitan Anse Aux Pins Mr Savy. E mon oule dir avek lafanmir ki mon konnen poudir sa pert i pa fasil sirtou dan sa ban letan la, e ki Bondye i donn zot kouraz pou zot kapab sirmont sa defi.

E Madanm Speaker, mon oule remersi ou avek ou tim, Madanm Clerk, *Deputy* e tou bann Manm Onorab osi ki'n fer nou lavi- vi ki nou nouvo la dan sa Lasanble ki'n fer nou lavi ase fasil. E zot i ede osi pou nou kapab entegre byen dan Lasanble e pou sa mon dir zot en gran mersi.

E en mersi spesyal pou tou bann zabitan Anse Aux Pins, mon'n ariv la gras a zot, e mon la pou travay pou tou dimoun, bann ki'n met mon e ban ki pa'n met mon osi mon la ou zot tou. E mon sete ki nou kontinyen travay ansanm kontinyen ganny sa sipor.

E en remersiman spesyal pou mon *Clerk* Mis Marcaine Esther e nou *Acting DA* Naomie Nourice ki Bondye i beni nou e donn nou sa kouraz pou nou kapab- kontinyen travay ansanm pou anmenn Anse Aux Pins pli devan e *Merry Christmas and Happy New Year to you all*. Mersi.

MADAM SPEAKER

Mersi. Onorab Woodcock.

HON WAVEL WOODCOCK

Mersi Madanm Speaker. Mon pou komanse par remersye mon bann koleg Onorab, sirtou lo nou kote latib pou zot sipor, nou annan bon lantant avek kanmarad sa solidarite. An menm tan mon pou osi remersye mon bann koleg ki la e bann ki ti avek nou dan setyenm Lasanble osi.

Mon pou osi remersye sekretarya nou Lasanble, mersi pou zot sipor pou *accommodate* nou pou la, pou donn nou tou sa sipor ki nou bezwen koman bann Manm Onorab. Mon pou osi profit sa lokazyon pou remersye mon Clerk, *well political aid*, Machella Constance ki'n toultan dan mon kote pou donn mwan sa sipor.

An menm tan Madanm Speaker, mon pou osi senpatiz avek nou bann frer ek ser ki'n perdi zot louvraz pandan sa bann dernyen letan la, sirtou la ki nou pe apros nou dan sa ban moman festivite. En senpati osi pou nou bann fanmir, frer ek ser ki'n perdi en pros pandan sa lannen.

Mon pou osi profit sa lokazyon pou swet tou Seselwa

sirtou zabitan Praslin, Grand Anse Praslin e distrik kot mon sorti en Zwaye Noel e en Bonnane 2026. Finalman en mansyon spesyal pou nou gran fanmir *LDS*, nou pou toultan a koze zot, nou pou toultan la pou defann zot e sipor zot.

Ankor enn fwa mon swet tou Seselwa en Zwaye Noel e en bon lannen 2026. Mersi.

MADAM SPEAKER

Mersi. Onorab Gabriel.

HON CONRAD GABRIEL

Mersi Madanm Speaker. Dabor, ma pran lokazyon pou swet ou menm ou *all the best*, mersi pou ki mannyer ou'n diriz nou Lasanble. Apre osi mon ti a kontan remersi sekretarya, Madanm Clerk, Deputy Clerk ek tou zot *staff*, mon dir zot mersi pou zot sipor.

E mon ti a kontan osi remersi mon fanmir ki'n ed mwan en kantite dan mon parkour vreman difisil, mon remersi mon *campaign team*, mon *winning team* Pointe Larue, mon dir zot mersi pou sa zefor, sa sipor ki zot in donn mwan e mon ti a kontan osi remersi nou *Caucus US*, *LGB*, *Chief Whip* ki'n donn nou tou sa sipor. E ziske la nou'n reisir mentenir nou pozisyon.

Nou'n byen fer pou sa premye trimes la e mon krwar i annan bokou travay pou fer ankor. Mon ti a kontan osi remersi tou mon zabitan Pointe Larue ki'n siport mwan *throughout* sa *campaign* 2025 kot nou'n fer li e nou'n fer li byen dan lape, lanmour e i montre ki i annan bokou keksoz pou nou fer, travay fek komanse, *I believe there's a lot for us to do*, i annan en ta keksoz pou nou fer ansanm.

Mon ti a kontan remersi sekretarya kot biro distrik li menm son *DA* ek son tim, mon *political aid* Mis Bernadette avek tou nou bann aktivis dan Distrik Pointe Larue mon dir zot en gro mersi ki Bondye i beni zot e *merry Christmas, happy new year 2026*. Mersi, *thank you*.

MADAM SPEAKER

Mersi. Onorab Labonte.

HON ANDY LABONTE

Mersi Madanm Speaker. Tou laglwar e loner i al pou Bondye papa, mon dir li mersi pou sa lannen ki nou'n pase. E mon anvi dir poudir *Merry Christmas* e en bon lannen 2026 ki pe vini pou zabitan Larivyer Anglez avek tou Seselwa.

E fotespere ki nou pas sa bann lannen ki pe vini dan en

fason ki apropiye e mon dir ou Madanm Speaker avek tou ou sekretarya avek dimoun la antye pou dir mersi pou sipor e en bonn lannen e Nwel ki pe vini. Mersi.

MADAM SPEAKER

Mersi bokou. Onorab Sopha.

HON GERRY SOPHA

Mersi Madam Speaker. Madam Speaker, mon ti a kontan remersi ou, Madanm Clerk, Madanm Deputy Clerk tou *staff* sekretarya e tou *staff* la pou sa bon servis ki zot in kapa ofer nou pou kapab fer nou fer byen nou deliberasyon.

Pou mwan sa i en premye leksperyans e mon'n apresye bokou. Mon ti a kontan osi remersi tou nou bann *leaders* lo tou lede kote latab, tou nou bann Onorab menm nou'n annan diversite nou'n kapab travay ansanm apre ler nou zwenn an deor sa *Chamber* nou kapab fer en pti konversasyon e pran en keksoz ansanm mon remersi zot bokou.

Mon ti a kontan osi Madanm Speaker, remersi nouvo ladministrasyon anba direksyon Prezidan Patrick Herminie, Vis-Prezidan Sebastien Pillay, Minis Prensipal Mr Wallace Cosgrow e tou lezot Manm *Cabinet*, tou

bann aktivis Parti *US*, tou siporter *US*, tou Lepep Seselwa en Zwaye Noel e en Bonn Erez Ane.

Ki lannen 2026 i ava anmenn plis prosperite pou nou pei Sesel. Mersi Madanm Speaker.

MADAM SPEAKER

Mersi. Onorab Naidu.

HON SATHYA NAIDU

Mersi Madanm Speaker. Si mon la ozordi se gras a zabitan St Louis, si pa ti pou zot mon pa ti pou la, dabor mersi pou sa sipor ki zot, zot i donn mwan.

E zisteman remersiman i al pou tou dimoun dan en fason ou ti'n zwe en rol firamezir ki mon'n desarz mon responsabilite ver zot e set fwasi mon pe deservi mon dezyenm manda, byensir 2025 in en lannen tre enteresan ranpli avek en kantite leson ki kapab ed mon pou agrandi e pli byen deservi zot koman zot serviter.

Zisteman, an relasyon avek travay i annan bokou pou fer pou nou kapab avans nou distrik de lavan, malgre sityasyon politik travay i kontinyen. Mon swet tou mon bann zabitan e Lepep Seselwa en Zwaye Noel e en Bonnane 2026.

E pou sa 31mil siporter *LDS* nou pa pou zanmen les tonbe i reste en pwen for a sa ki konsern lafason ki non selman nou apros nou krwayans politik e osi lavi lafason ki nou regard lavi irespektiv sirkonstans ki nou trouv nou ladan fodre ki nou vwar sa kouraz pou nou kapab re debout pou nou kapab kontinyen avek lavi.

Akoz kot nou'n arive nou, nou pou bezwen kontinyen pou nou kapab bouz nou pei atraver diferan responsabilite ki nou annan koman en sitwayen pou nou deservi nou responsabilite dan en fason ki byen e ki zis pou nou kapab asire ki tou keksoz i al byen. Mersi.

MADAM SPEAKER

Mersi. Onorab Larsen.

HON CECILE LARSEN

Mersi Madanm Speaker. Mon ti a kontan pran sa loportinite pou mon dir mersi zabitan Au Cap pou sa konfyans ki zot in fer mon pou fer mon vin dan Lasanble.

E mon ti a kontan dir mersi osi Prezidan, Vis-Prezidan, *staff* Lasanble Nasyonal, *Caucus US* ki'n donn mwan sa sipor e striktir *US* Au Cap ki *still* pe donn mon bokou sipor, mon fanmir, mon bann

zanmi mon ti a kontan dir zot en gro mersi.

E dernyerman mon ti a kontan swet Seselwa e espesyalman zabitan Au Cap en Zwaye Noel e en Bonnane 2026. Mersi Madanm Speaker.

MADAM SPEAKER

Mersi. Onorab Valdana Sultan.

HON VALDANA SULTAN

Mersi Madanm Speaker. Madanm Speaker, la ki lannen pe al terminen, mon'n ganny sans form par setyenm Lasanble e mon dir mersi mon Parti *LDS* pou konfyans ki zot in remet dan mon pou mon retourn koman en Manm Proporsyonnel *like* wityenm Lasanble.

E lo sa Madanm Speaker mon anvi dir sekretarya Lasanble mersi zot osi, pou zot travay, zot devouman, devosyon anver tou Manm Lasanble pa zis mon.

E en mersi osi pou mon fanmir, pou mon zanan ek mon konpany pou konpran mon bann moman ki petet mon pa'n kapab sitan la parey avan dan lakour pou ede avek bokou lezot keksoz kot lakour e pou zot sipor.

E mon dir osi mersi pou bann zabitan Port Glaud, pa zis pou mon bann aktivis e mon

political aid Allain Ernesta, me pou tou bann sipor *LDS* bann ki ti'n met sa konfyans dan mon, mon pa'n arive fer li me selman travay i kontinyen.

E lo sa not, letan ki mon pe koz lo zabitan Port Glaud, mon pa'n anmenn mon sipor fizikman me selman mon dir bann zabitan Port Glaud ki'n fizikman oubyen in materyelman ede pou zot fer sa zoli dekorasyon dan Port Glaud nou dir zot mersi, akòz menm ki mwan mon pa'n partisipe me selman mon apresye ki i annan sa bann ki'n arive kon partisipe pou donn Port Glaud en zoli vizaz. Mon asire ki pou ana bann ki pou sorti lwen pou vin get Port Glaud.

E pou tou dimoun ki pa'n dan sa lannen petet zot in perdi en pros mon konnen i pa fasil, me mon swete ki zot war sa pti moman lazwa dan zot lekor e pou zot pa'n osi anmenn en moman lazwa nou konnen koman kretyen nou selebre Nwel i en moman lazwa e en moman lapartaz ki nou kapab war sa pti moman dan nou lekor pou nou al get sa lot ki petet li osi i bezwen nou sipor.

E mon osi dir mersi mon bann koleg dan mon *Caucus*, sirtou koleg Lasanble tou lede kote sirtou mon *Caucus LDS* pou ou sipor e osi sa bon

lanmitye ki nou annan antre nou ki non fer ki nou kapab travay byen ansanm. E mon dir tou dimoun sirtou zabitan Port Glaud en Zwaye Noel e en Bon Ane. Mersi Madanm Speaker.

MADAM SPEAKER

Mersi. Onorab David.

HON ROBERT DAVID

Mersi Madanm Speaker. Premyerman mon ti a kontan remersi Bondye papa pou son lagras e osi aköz san li nou pa naryen.

Madanm Speaker, mon ti a kontan remersi mon fanmir ki'n siport mwan pandan sa bann letan e remersi osi tou dimoun Mont Buxton ki'n met konfyans dan mon, ki'n donn mon sa loportinite pou vin zot Manm Elekte pou nou distrik e osi tou bann dimoun ki reste dan Mont Buxton ki osi pa'n vot pou mon be selman mon reste zot Manm Elekte e mon pe dir zot ki mon pa pou abandonn zot e mon pa pou perdi personn.

Mon ti a kontan remersi osi nou Komite Egzekitiv Distrik Mont Buxton, nou lekip ki travay avek mon, mon lekip sipor osi Lotorite Distrik Mont Buxton e mon *political aid* Ms Kisha, madanm Dogley.

Madanm Speaker, mon ti a kontan osi remersi ou avek ou

lekip ki'n permet nou kapab fer sa tranzisyon byen e fer nou vin konfortab dan nou travay, mon konnen ki i annan bokou pou nou fer ansanm. E mon rekonnet zot zefor e zot konpasyon ki zot annan pou nou.

Mon remersi osi tou bann dimoun ki swiv travay Lasanble dan Sesel osi bann ki aletranze. E osi Madanm Speaker, mon ti a kontan remersi tou Seselwa ki'n vot pou parti *United Seychelles* afen ki nou pei in kapab fer sa tranzisyon. Osì tou Seselwa mon swet zot tou bonn sante, e swet tou dimoun en Bonn Fet Noel e osi en Bonn Erez Ane pou 2026. Mersi.

MADAM SPEAKER

Mersi. Onorab Savy.

HON DOMINIC SAVY

Mersi Madanm Speaker. Madanm Speaker, mon ti a profit sa lokazyon pou mon remersi dimoun Takamaka, pep Takamaka, remersi DA Takamaka ek son *staff*, remersi mon *political aid* Ms Burka, e tou bann dimoun ki'n donn mon en koudmen dan mon travay Takamaka pandan sa bann letan.

Mon swet zot tou en Zwaye Noel e en Bonn e Erez Ane 2026. Lo kote Lasanble

Nasyonal, Madanm Speaker, ou menm, Depite Speaker, *Caucus US* gide par Onorab Lemiel, *Caucus LDS* gide par Onorab Georges, mon oule remersye zot bokou pou sa lakey ki zot in donn mwan ler mon'n antre dan Lasanble mon vreman apresye. Mon swet zot tou en bonn e erez Ane 2026 e mon *look forward* pou no retournen pou nou travay lannen prosenn.

Avan mon fini mon oule dir donn en swe spesyal pou tou dimoun Takamaka fotespere zot pas en bon Nwel en bon lannen dan lape. Mersi Madanm Speaker.

MADAM SPEAKER

Mersi. Onorab Herminie.

HON WILBERT HERMINIE

Mersi Madanm Speaker. Tou dabor mon a komans par remersye ou menm koman latet nou Konstitisyon pou sa sipor ki ou donn nou e travay ki ou pe anmennen.

E mon anvi remersi madanm Clerk e *Deputy Clerk* e tou *staff* Lasanble pou ki mannyer zot in akonpanyi nou dan sa bann letan ki non la pou sa premye trimes.

Mon a remersi tou bann koleg Onorab lo tou lede kote lataab, i pa'n toultan fasil me selman travay in bezwen ganny

fer so mersi zot tou pou sa sipor. Mon osi anvi remersi mon fanmir ki'n la par deryer mon pou donn mon sa sipor pou mon kapab delivre dan mon travay.

Mon osi anvi remersi tou dimoun dan distrik Grand Anse e osi dan distrik Larivyer Anglez ki'n sipor nou dan sa parkour e osi tou dimoun zeneral dan Sesel.

Mon anvi pas mon swe pou sa bann letan festivite pou sekretarya pou Madanm Speaker, ou ek ou fanmir pou swet ou en Zwaye Noel E En Bonnane 2026. Tou Manm koleg Onorab mon swet zot menm parey e osi en mansyon spesyal pou tou bann siporter *US* ki'n sipor nou dan sa parkour *from* 2020 ziska kot nou'n arive la ozordi, mon swet zot en Zwaye Noel e en Bonnane 2026. Mersi.

MADAM SPEAKER

Mersi. Onorab Adelaide.

HON FRANCOIS ADELAIDE

Dabor Madanm Speaker, mon oule swet ou avek sekretarya Lasanble tou de bon dan lavenir e pou sa Nwel avek sa nouvo Lannen ki pe vini. Mon dir zot mersi pou tou zot sipor esperon ki lot lannen nou a kontinyen travay e fer bouze nou pei.

Dezyenmman mon ti a kontan osi remersye tou bann lezot *staff* Lasanble pou tou zot led ki zot donn mon depi ler nou'n antre dan wityenm-menm dan setyenm menm dan wityenm. So, ankor parey mon'n dir mon espekte ki nou kontinyen lo menm semen lannen prosenn e nou fer nou lenstitisyon bouz devan.

E trwazyenmman mon pa oule mank lokazyon pou mon remersye tou zabitan Baie Lazare pa neseserman ban ki'n vot pou mon me zot tou an zeneral pour ki nou a kontinyen travay ansanm malgre diferan pwennvi, diferan Polisi be solman nou a fer sir ki Baie Lazare i pou reste nou priyorite e fer sir ki nou fer nou distrik parey nou ti dir vin sa pli zoli distrik dan Sesel.

E mon pe kont lo zot sipor e mon pou touzour la pou siport zot, pou fer sir ki nou *attain* nou lobzektif. Avan mon fini Madanm Speaker, mon oule osi remersi nou *Cabinet* sortan, Prezidan Ramkalawan avek tou bann Minis e son delegasyon pou zistans ki zot in anmenn Sesel pou nou, pou nou ek pou nou zanfana.

E esperon ki nou kontinyen fer nou travay menm kantmenm nou pa dan Gouvernman me nou kontinyen

fer nou travay pou benefis Sesel. Mersi bokou.

MADAM SPEAKER

Mersi. Onorab Grandcourt.

HON ALVIN GRANDCOURT

Mersi Madanm Speaker. Zabitan, Grand Anse Praslin, Madanm Speaker, sekretarya Lasanble, *Caucus United Seychelles, LDS*, Lepep Seselwa, mon fanmir e tou dimoun ki a lekout.

Nou pe antre dan sa moman festivite e i en moman pou refleksyon, premyerman nou dir mersi pou tou dimoun ki'n ede pou nou ariv la ozordi. Nou remersye tou bann siporter, tou dimoun ki'n krwar dan sa ki nou reprezante e Sesel an zeneral, tou zabitan Grand Anse Praslin mon remersye zot o fon mon leker.

Mon pou kontinyen reste sa reprezentan ki pou reprezent tou dimoun Grand Anse Praslin e tou dimoun osi ki mon zwenn ki bezwen en sipor, *United Seychelles* pou reste *united* e nou pou touzour reprezent Lepep Seselwa.

Avek sa mon swet tou dimoun en Zwaye Noel e en Bonnane ki lannen prosenn i aport bokou bon keksoz e keksoz pli enportan se linite ki lannen prosenn nou war en

Sesel pli ini, pli zwaye e pe pli byen prospere. Mersi.

(APPLAUSE)

MADAM SPEAKER

Mersi. Onorab Loze.

HON JOHAN LOZE

Mersi Madanm Speaker. Mon pa pou long akòz tou sa ki bezwen ganny dir in ganny dir par tou lede kote.

Madanm Speaker, lafen lannen dan nou pei i toultan vwar nesans en moman leksitasyon, en moman lafet en moman diverti kontan ou nou pep kot apre en lannen travay dimoun i santi en moman lazwa, en moman lafet menm.

E mon ti a swete petet selman ki nou pran en moman dan nou letan ver lafen lannen pou nou enn eksprim remersiman pou sa 12mwan, pou sa nou lasyer ki nou'n mete sa rannman ki in aporte, nou zanfan ki nou'n fer grandi, nou fanmir ki nou'n kapab reisir et sa lakol pou kol zot ansanm ki zot reste otour nou.

Mon ti a swete ki nou kapab vwar en moman refleksyon pou nou serse ki mannyer nou trouv lape personnel, lape pou nou lekor, nou lespri e nou larm ki nou kapab aport sa lape dan nou

fanmir e senm li dan nou sosyete.

I mon swe ki mon kapab trouv en moman pou nou koman endividi nou nasyon an antye serse ki mannyer nou kapab ogmant larises, trouv larises e senm larises dan nou pei en fason ki nou tou nou *burdens* i ava en pe pli eze e nou pep i a viv en pe pli konfortableman.

Avek sa Madanm Speaker, mon swet tou dimoun dan nou pei en *bonne fin d'année*. Mersi Madanm Speaker.

(APPLAUSE)

MADAM SPEAKER

Mersi. Onorab Trevor Louise.

HON TREVOR LOUISE

Mersi Madanm Speaker. Madanm Speaker, sekretarya Lasanble Nasyonal, tou *staff* Lasanble Nasyonal, tou bann koleg *LDS* e osi ki *US Caucus* mon oule remersi zot pou lafason ki mannyer zot in resevwar nou pandan sa bann dernyen letan. Mersi pou zot bann dernyen gidans e sipor.

Mo egalman oule remersi tou zabitan Bel Air ki'n donn mon loportinite pou reprezant zot, mon oule remersi Lotorite Distrik osi pou zot lakey, mon oule remersi mon fanmir, mon

bann zanmi, tou bann *friends of* Bel Air ki pe donn nou en sipor ou en lot e nou pe swete ki lannen 2026 nou a kapab travay ansanm pli pros.

Mon oule egalman remersi bann *staff Maison Du Peuple* pou zot devouman e zot travay ki zot in fer pandan sa letan kanpany ki'n kapab permet nou tou ariv la kot nou ete ozordi. E tou Lepep Seselwa ki'n fer nou konfyans pou kapab ariv la kot nou ete.

Mon swete ki sa enn sezon festivite i ava enn ki av annan pli avek bokou plis lazwa, bokou plis lape e ki lannen prosenn nou tou nou a kapab trounen avek bokou plis matirite politik pou asire ki non selman nou vin reprezant nou distrik me osi fer sa ki byen pou Lepep Seselwa. Mersi bokou.

(APPLAUSE)

MADAM SPEAKER

Mersi. Onorab Athanase.

HON KENETH ATHANASE

Mon a dir mersi Madanm Speaker. Premyerman mon a remersi Bondye papa, si ou war ozordi nou la, nou ankor vivan nou tou, mon dir mersi Senyer.

E osi mon remersi mon fanmir, mon madanm mon bann zanfand e osi tou bann

Manm Lasanble espesyalman osi en remersi spesyal pou tou ban zabitan Perseverance ki'n donn mon sa sipor ki ozordi mon la.

E mon swete ki zot a pas en bon Nwel ek en bon Lannen 2026. E ki Bondye a kontinyen beni nou, ki nou a kontinyen travay ansanm. Mersi.

(APPLAUSE)

MADAM SPEAKER

Mersi. Mon ava komanse par dir ki tou sa bonn swe ki mon'n gannyen pou mwan e pou Lasanble pou sekretarya sertenman i bon lenerzi e sertenman nou tou mon krwar nou pou byen pas nou letan kot nou pe al repoze kot nou pe al fer en pe refleksyon.

Mwan mon ti zis anvi osi dir ki pou mwan tou finisyon i osi en komansman e tou komansman i en landrwa pou en loportinite. E ler nou pe fini lannen, nou pe al komans en lot, nou ganny loportinite pou nou komans nouvo pou nou fer bann sanzman ki nou bezwen fer, pou nou retourn dan landrwa kot nou bezwen retournen pou nou fer refleksyon ki nou bezwen fer.

Mon anvi dir avek tou dimoun ki regard Lasanble, tou dimoun ki ekout Lasanble pou

mazinen ki anndan la tou sa bann dimoun ki la anndan i osi imen ki zot, i osi travayan ki zot, i osi devoue ki zot.

So, letan zot pe zet en regar lo Lasanble Nasyonal, e zot annan tou keksoz pou zot dir lo Lasanble Nasyonal, bann kritik ki zot annan bann bon keksoz ki zot annan pou dir. Annou mazin byen ki mon'n deza dir en fwa tou *public servants they are also human* e ennler nou bliy sa.

Lasanble i en landrwa kot i annan manifestasyon valer, manifestasyon bann nide e kot diverzans lopinyon i en landrwa kot i vin ansanm e nou vwar li ganny eksprimen dan diferan fason dan bann diferan, avek diferan karakter avek diferan *level* ou kapab dir pasyon.

E i pa zis en legzersis dan- i pa zis en legzersis oratwar kot zis dimoun pe koze me i annan en kantite keksoz ki vin apre ki vin avan e ki benefisye Lepep antye.

Mon ti a voudre dir mersi, mersi bokou pou bann *MNA* Lasanble Nasyonal espesyalman sa 2 *leaders*, Onorab *Leader* Lopozisyon, Onorab *Leader of Government Business*, *Chief Whip*, Deputy Speaker, zot sipor i vreman enportan, pou mwan i vreman enportan pou Lasanble i

vreman enportan pou sekretarya Lasanble Nasyonal.

Tou bann Manm osi pou fason ki zot konport zot dan Lasanble, pou fason ki zot koze dan Lasanble. Mersi bokou pou tou sa bann ve, pou tou sa bann bon keksoz ki zot in dir.

Pou sekretarya Lasanble Nasyonal, *Clerk*, *Deputy Clerk*, tou *staff*, *staff* dan lofis Speaker, e *staff* dan lofis 2 *Leaders* osi mersi bokou pou tou zot sipor pou zot travay dir. Nou pran sa loportinite la pou nou prezan al repoze, al fer refleksyon e nou retournen an Zanvye.

E sel keksoz ki reste pou mon dir zot se bonn repozman, *enjoy* letan avek e zot fanmir e *enjoy Festive Season* ki pe vini e mon ava vwar zot tou an 2026. Mersi. Alors nou ava *rise pou recess*.

(APPLAUSE)

(ADJOURNMENT)

